

# DISHIÏKILA



Tùshaalàayi biimànyine kuulu mpindyewu patùdi twinyika mitù yetù apa.

Mukalenge Yesù, tudi ànu munkaci mwà kwitabuuja cyanàànà. Wèwè udi mutwàmbile ànu bwà kwitabuuja cyanàànà, nènku's ke twètù aba twitabuuja mpindyewu. Ne tudi tuKwela twasàkidila ne tukupà butùmbi bwà bitùkaadi bamanè kuumvwa ne bamòne, bìdi byèlesha diitabuuja dyètù lwongò. Mùshindù mwine wutùdi tuKwela twasàkidila bwà mukwàbò mpùngà wa kulwa bwà kuyiisha aba bàdi mu lukèngelu lwà bintu. Mpindyewu ndi nKulòmba, Nzambi, bwà kukùmbaja majinga ètù dilòlòlò edi bilondèshile mulayi Wèbè. Mu Dîna dyà Yesù mmutùdi tulòmba nùku. Amen.

<sup>2</sup> Tudi ne disànkà dyàbùngì dilòlòlò edi bwà dyèsè edi dyà kwalukila cyàkàbìdi ku tabernacle, bwà—bwà...ne Èvànjeeliyò wa Mukalenge Yesù mubiike ku lufù. Kàdi mvwakù mufikè pashishe ndambù. Mvwa ne bwalu bwà lùkàsàlùkàsà bwà buumukila ku Michigan ànu mpindyewu mene ewu. Kàdi Mukalenge mmwènzè cintu cilenga cyà dikèma ànu díbà adi mene bwà mukàjì awu. Ekelekele, mùshindù mwine wùdiYe mumanyè kantu ne kantu ne ùkàtèeka ànu... Kabyèna bikèngela bwà kuMwambila to; Yèyè mmumanyè, Yèyè mmumanyè ànu cidici. Ne pa nànkù tudi ne kusàkidila kwàbùngì. Bantu bendèshe màshinyi ditùkù dijimà bwà kufika kaaba aka. Nènku, díbà adi, tudi ne kusàkidila kwàbùngì bwà bwalu abu. Mpindyewu, kanùpu mwoyi. . .

Mukàbà wa mèyi ewu udi munkaci mwà kukwàciibwa anyi? [Mwanèètù Neville ùdi wàmba ne: “Ki mbota wa diteema ne dijima bukènkè nyèyè awu mwaba awu.”—Muf.] Kaa, mbota wa diteemesha ne dijima bukènkè. Ndi mmòna.

Kanùpu mwoyi masangisha à—à lumingu lùlwalwà elu to, mu diisàtù dilòlòlò, ne mu dyàlumingu dilwalwà mu dindà, ne mu dyàlumingu dilòlòlò. Panwìkalà mu nyùngulwilu emu, ku mutumba eku, ndi mumanyè ne mbafwànyine kwikala bushùwà menemene ne disànkà dyà kwikala neenù mwab'ewu.

Nènku mpindyewu, nwànsambidilaayikù, pàndi ngènda nya mu myaba mikwàbò apu, ne ndi ntèkemena ne nèngàalukilè cyàkàbìdi àbìdi àdi paanshì aa.

<sup>3</sup> Ndi muswè kunùsàkidila nwènù bwònsò bwà musangeelu wènù ne bivùlukilu byà binùdi bangenzèle ebi. Nènku mwanèètù kampànda ùdi ùfùma kudintùmina bilàmbà byà nkooci byùmukila lwà kuntu kwàka mu kaèkèleeziyà kakesè kàa mu Georgie. Nènku—nènku bantu abu. . .Bìdi ànu bilenga be. Kàbìdi ndi muswè kusàkidila bantu bàà ku Kentucky kwàka,

bâmvwà naabò lumingu lushààle elu mu diikisha. Ne byónsò bidì Mukalenge mutwénzèle kwòkò aku, cyanza cinène, cyà bukolè citùvwà baMumòne, cyàkenzàYe aci.

<sup>4</sup> Mpindyewu tudi ne dyeyemena dyà kunùmòna cyàkàbidì ànu àbidì àdì panshi aa, pàndì ànu ngààlukila kunweku eku, ndi nya ku New York bwà disangisha. Kwinè aku nku Stone Church ne Mwanèètù Vick, kubangila, ngèela meeji ne mmu dyà matùkù dikumi ne àbidì à ngondo wa kaswàbàngà. Nènku netwikalè mwaba ewu, ndambù wa matùkù kumpàlà kwà díbà.

Pashiishe tudi twalukila cyàkàbidì, tuya ku—tupweka ku Shreveport, mu Louisiane, ne Mwanèètù Jack Moore. Aku's nku Disàkidila, lumingu lwà Disàkidila, bwà kwikalakù ku Shreveport kwàka. Cidi ku mboodi wa mamanyisha, ngèela meeji, paanyimà pààpa mu mamanyisha.

<sup>5</sup> Ne pashiishe tudi tutèkemena bwà kwikala ne bàmwè bàà ku balundà bàà ku Sud paanyimà pàà Noël. Ne netwikalè mu Phoenix mu ngondo wa cyongo. Ne pashiishe bindile dibikila dyà dyàmwàmwà dyà mbù, bwà twamònakù mwà kulongolola masangisha bwà kuya dyàmwàmwà dyà mbù. Bàdi munkaci mwà kukwàtapù mudimu mpindyewu, ngondo wa ndekeelu ewu, Mwanèètù Borders, ùdi wàndamuna ku mikàndà ne bikwàbò, bwà dinyunguluka pa buloba bujimà dyà ditwàdija ànu patùdi ne twalùlongòlòlu, kàdi tudi ne cyà kwindila bwà mishìngà.

<sup>6</sup> Misùmbà yà bantu yìdi yà mikùùkùku kuntwaku, mu mùshindù wà katùyi mwà kuyitèèka mu nzùbu to; bikèngela ànu kuyisòmbesha panshi pambèlù. Ne míngà misangu bàdi bàpita búngì, bàdi pabwípì ne búngì kabùyì kwambangana naabò, míngà misangu bìpacila ku binunu nkàmà yìtaanù. Aci's ncutipà cyà mùliyò mujimà wà bantu mu disangisha dimwèpelè; kaciyì búngì bwà bantu bàdi bàbwela mu masangisha matùkù àbúngì to, kàdi disangisha dimwèpelè. Nudi bamanyè's, pa ciibidilu batangadiki batu bàbala búngì bwà bantu bàtù bàlwa mu mbingu yisambòmbò. Nudi numòna anyi? Kàdi tudi—tudi tubala búngì bwà bàdìmu ditùkù adi, bwà musangu ùmwèpelè awu. Ke mùdibi ne míngà misangu kakùtu mwaba wà kubàsòmbesha to, nudi bamanyè, bitùkèngela ànu kubàtèèka ànu pambèlu apu basòmbe panshi.

Tudi ne cyà kupeta mivù yìdi mvùla kàyì ùlòka ne wa wìcikila panshi nànsha. Ne bantu bàdi bakwàte ne byà luse abu basòmbe pambèlu apu... Ndi mumòne bakàjì basòmbe pambèlu pààpa ne nsukì yàbò mipwèke panshi, bantu balwàte bimpè, nènku ànu—ànu basòmbe mu mvùla amu mu bule bwà ditùkù dijimà. Basòmbe ànu mwaba awu, mvùla ànu munkaci mwà kutùnkumuka, ne ùtuuta makùbàkùbà, ne wèla mikenyi, ne bipeepèlè bikolè bituuta, kàdi pààbò ànu bàtwa paanyimà bàtwa kumpàla balamàkànàngàne mùshindù awu, basòmbe ànu mwaba awu mene, bindila too ne pawàlwà bwà kubàsambidila.

Nwamònu anyi? Mpindyewu, nudi bamanyè ne Nzambi ùtu ùtwa diitabuuja dyà mùshindù awu mushinga. Yèyè ùdi wènza nàнку.

<sup>7</sup> Bikèngela bwà wèwè kwenza cintu kampànda bwà Nzambi àtwe mushinga. Nudi numòna anyi? Udi uMuleeja. Bantu bàdi ne bintu byònsò bibàpèèsha mu cianza bipeepèle menemene, kabàtu pa ciibidilu. . . Bòbò—bòbò kabàtu ne cidìbo bènza naabi nànsha cimwè to, nudi numòna's. Bìdi bikèngela bwà wèwè. . . Dipà adi ndyà ku bitupù, aci's ncilelèlè, kàdi bìdi bikèngela bwa wèwè—wèwè ku. . .

<sup>8</sup> Mbimwèke mùshindù awu, nudi bamanyè's, bu mùtùbo bàmba ne: "Pawìkalà mulediibwe ne mishìkù yà busàngù," nukàatu bùumvwe nàнку awu, "kwènà ucyànyisha to." Kàdi pàdìbi bikèngela bwà wèwè kukwàta mudimu bwà kucìpeta, ki wèwè kwanyisha mushinga wàci.

<sup>9</sup> Mpindyewu nwènù bàdi ku mikàbà yà mèyì abu, ndi muswè bwà—bwà. . . Ngèèla meeji mpindyewu ne ndi. . .

Mu dindà emu, diyiisha dyà mu dindà emu dìvwa, bwànyì mèmè, Mukenji mutàmbe kwikala wà pabwàwù wà mudimu wànyì wònsò wà bwambi; mu dindà emu, nwamònu's, Mukenji wà mutàmbe kwikala wà pabwàwù wà mudimu wànyì wònsò wà bwambi. Dìngà ditùkù nèn nwàmbilè mwàkalwàwu. Ne ndi mumanyè ne maalu wònsò mmenzèke munda mwà ngondo ne ngondo ne ngondo, too ne ku Mukenji ùmwèpelè awu, ènda àbànda bwà kukafika too ne mu mwaba awu. Aci cìvwa ncikondo cyà dyashiibwa dyàwù dyà cifulu, nudi numòna's. Nènku cidi. . .

<sup>10</sup> Mpindyewu ndi mutwìshìibwe, anyì ndi ntèkemena ne, nudi bùmvwè cìvwa Cimanyinu cìswa kwamba aci. Nwamònu anyi? Cimanyinu ncimanyishilu cyà ne Mashi àkaadi malaabiibwe. Bwà ne, mushinga wùkaadìbo balòmbe, mulòmbe kùdi Nzambi awu, Yesù wàkafuta mushinga awu ku dyela dyà Mashi Èndè Sungasunga panshì. Wàkenza nàнку. Pashìishe, ku mwoyi Wèndè aku nk wàkalwà Nyumà Mwìmpè. Ne pàdi Mashi malaabiibwe kùdi, Nyumà Mwìmpè n' Cimanyinu cyà ne mushinga wèbè mmufuta; Nzambi mmukwakidile, nènku aci's ke Cimanyinu. Vùlukàayi ne, ke Cimanyinu ncyòci aci. Mpindyewu, kùdi bantu bàabùngi bàdi kabàyi, bòbò—bòbò kì mbamanyè ne Cimanyinu aci ncinyì to, nwamònu's. Nènku bikèngela nùcyenzè bu nè muntu nànsha umwe kì mmucimanyè to, nwamònu's, bwà bòbò bònsò bàacyùmvwa.

<sup>11</sup> Ànu mùdi kuyiisha kwà lupàndu amu, tudi ne cyà kuyiisha lupàndu mu mùshindù wà ne muntu yònsò, ndwà muntu yònsò, pàabi, twètù bamanyè ne kì ndwà muntu yònsò nànsha. Bikèngela tùyiishè dyondopa dyà kùdi Nzambi bwà bantu bònsò, kàdi pèètù bamanyè ne kabyèna nàнку to. Nwamònu anyi? Yesù wàkalwa bwà kusùngila aba bàvwa mu Mukànda wà Bupikudi kumpàla kwà difukà dyà dyulu ne buloba. Yèyè wàkalwa

ànu bwà kusùngila bôbò abu. Bôbò abu mbanganyì, ncyéna mumanyè to. Nwamònu anyì? Kàdi wèwè...Muntu nànsha umwe kèna mwà kwikala ne diitabuuja paùdi kùyi wamba ne mbwà ewu yònsò to; ne bìdi ne, muntu nànsha umwe kèna mwà kulwa pàdi Nzambì kàyì mumubiikile to. Aci's ncilelèlè. Pa nànkù kùdi bantu bààbùngì bìikalà kabàyi basùngidiibwe to. Tudi bamanyè bwalu abu. Bôbò, èè, Nzambì ùvwa mumanyè aci kumpàlà kwà dyulu ne buloba kubangabi ne, kabàvwa mwà kusùngidiibwa to.

<sup>12</sup> Kùdi bààbùngì bìikalà kabàyi mwà kwondopiibwa, nwamònu's, bààbùngì kabàakwondopiibwa to. Kabèèna ànu mwà kucyènza to, kabèèna mwà kucibàkula to. Kì mbamanyè cidìci to. Bààbùngì nebòndopiibwè. Kàdi tudi tubiyiisha ne mbwà bantu bònsò, bwalu katwèna bamanyè ne muntu awu nganyì to; katwèna ànu bamanyè to. Kàdi mwinè awu ng'ewu yònsò, kàdi bàmwè bantu kabèèna mwà kubàkula diitabuuja adi to.

<sup>13</sup> Mpindyewu, nènku ncintu cimwècimwè aci bwà Cimanyinu eci. Cimanyinu, tudi baakùle ne Cimanyinu díbà dyònsò, kàdi mpindyewu ndimwènesiibwa dyà Cimanyinu. Nwamònu anyì?

<sup>14</sup> Mpindyewu, tutu misangu mikwàbò bacyanyishile. Ba-Luthériens bàakacyanyishila bwà ne: "Kwitaba Dìyi; kwitaba Kilistò bu Musùngidi wa sungasunga." Ba-Méthodistes kwambabò ne: "Paùdi upeta disànkà bùngì bukùmbàne bwà kwela mbilà, ki Cyôci aci." Beena Mpenta bàdi bàmba ne: "Paùdi wakula mu myakulu, nànkù waCipeci." Ne tudi tusangana ne byònsò abi bìvwa byà mashimi. Nwamònu anyì?

Cimanyinu n'Cimanyinu. Ngwèwè ne Kilistò bu bantu pàmwè. Nwamònu anyì? N'Nyumà Mwímpè, Mwoyi Wèndè munda mwèbè, mwikàle ùkwàta mudimu ne Mwoyi Wèndè—Wèndè Yèyè mwinè munda mwèbè. Ciinè aci mbwà mubanji, mupèlè, anyì bwà ewu yònsò waCyàkidila awu. Mpindyewu vùlukaàyi ne, Cimanyinu ke cyùdi. . .

<sup>15</sup> Uyaàya ku kùmpànyì wa njila wa njanja ne usùmba tiki webè. Kùdi musinga, musinga wa difuta. Twàmba ne ùdi ùyiila meeyà makùmi àtaanu bwà kubwela ewu—ewu njila wa bisè anyì njila wa njanja, kuumukila apa too—too ne ku Charlestown, mu Indiana, udi utùula meeyà makùmi àtaanu. Èè, mpindyewu, kùmpànyì ùdi ùpàtula bimanyinu bwà ne...Nwamònu anyì? Mpindyewu, cintu cyùdi wenza, udi upweka ne muntu kampànda ùkusùmbila tiki webè wà lwendu, meeyà makùmi àtaanu. Bàdi bàkupèèsha cimanyinu cidì cikupà bukenji ku kàwulù aku too ne kùyaayàku kafika, ní nkwepi kwònsò kùdi kàwulù aku kàya. Nwamònu anyì? Cidi cikupèèsha. . .Ki cimanyinu ncyôci aci.

<sup>16</sup> Mpindyewu, mu ebu bwalu, mashi ki àvwà cimanyinu. Anu mùdibi byà bushùwà emu, bìvwa bikèngela kulaabiibwawù,

bwalu àvwa ànu mwengùngù cyanàànà ki cyònsò cìvwàwu naaci, bwalu àvwa mmashi à mwànà wa mùkòòkò, nyama, mashi à mwànà wa mùkòòkò. Pa nàнку mwoyi wùvwà mu mashi awu, mwoyi wùvwà mupàtùke awu, pa nàнку mashi àkeediibwa panshì. Nwamònu anyi? Mwoyi wàkapàtuka, kàdi kawùvwà mwà kwalukila pa mwena kwitabuuja to, bwalu nnyama. Kàdi cìvwa cyàmba ànu bwà kondo kàà mwoyi kìmpè, ne kùvwà kùlwa Kampànda, Mulàmbù mupwàngàne.

Nènku, bwà kuwùvwija Mupwàngàne, Mulumbulwishi yònsò nkòong, Nzambi wa mu Dyulu, wàkalwa Mulàmbù; Mulumbulwishi, Kasùmbù kàà bakòshì bàà bilumbù, ne Mulumbulwidyanganyi. Nwamònu anyi? Yèyè wàkalwa Mulàmbù. Ne pashìshe pàakapàtukà Mwoyi Wèndè, cìvwà ciikàle Nzambi. . . Nènku díyì mwaba awu, kùdìdì dilwa: “Nènku Nèmbàpèèshè Mwoyi wà Cyèndèlèlè.” Mpindyewu, mu cyena Ngelikà. . . Ndi mumanyè ne ndi ngàakula ne bamanyi bàà mabàla. Ndi mmòna bàbìdì anyi bàsàtù. Nwamònu anyi? Nènku ndi. . . Ne mwàkù awu mu cyena Ngelikà, wùdì Zoe. Z-o-e, mu cyena Ngelikà, wùdì wùmvwija ne: “Mwoyi Sungasunga wà Nzambi.” “Nènku Nèmmupèèshè Zoe, Mwoyi Wànyì Sungasunga.” Kilistò ne Nzambi bàvwa Umwe.

<sup>17</sup> Dìbà adi, Mwoyi wùvwà munda mwà Kilistò awu n’Nyumà Mwìmpè, kì m’Mupersona mwisàtù to; kàdi Mupèronà ùmwèumwè awu, mu mmwènekèlu wa Nyumà Mwìmpè, ulwe pambidi pèbè, bu Cimanyinu cyà ne nsòmbèlu wèbè ne musinga wèbè wà lwendu mmumana kufuta, udi mwitàbìibwe. Pàdì cimanyinu aci kaciyì cilwè to, kwèna mwanyishìibwe mu cibeaba to, kwèna mwanyishìibwe mu. . . mu—mu njila wa bisè to; kwèna mwanyishìibwe bwà kubwelamù paùdì kùyì mwà kuleeja cimanyinu eci to, ne cimanyinu aci ke musinga wèbè wà lwendu. Nènku mpindyewu Bìdì bileeja ne Mashi mmeediibwe panshì ne malaabìibwe kùdì, musinga mmumana kukufucila, ne wèwè udi ne Cimanyinu cyà ne Mashi mmalaabìibwe kùdì ne wèwè udi mwitàbìibwe. Nwacyùmvù mpindyewu anyi? Kaa, ekèlekèlè! Kaa!

<sup>18</sup> Mpindyewu—mpindyewu, kì ng’ànù cileeji kampànda to. Nwamònu anyi? Wèwè udi wamba ne: “Mwanèètù Branham,” ndi ncyùmvwa mu meeji èbè amu, udi umòna’s, “nèmmanyè bwà cinyi?”

Tàngilà, wèwè uvwa cinyi, ne wèwè udi cinyi? Mùshindù awu ke wùdì umanya. Nwamònu anyi? Wèwè uvwa cinyi kumpàlà kwa Cimanyinu eci kutèekiibwaci? Udi cinyi paanyimà pàà cyòci cimanè kutèekiibwa? Majinga èbè àvwa cinyi kumpàlà, ne majinga èbè àdì cinyi pashìshe? Dìbà adi udi umanya ne Cimanyinu nciètèekiibwe anyi kì nciètèekiibwe. Ne bintu bikwàbò ebi bìdì ànu dyàkàmwè byèndela pàmwè ne Cyòci aci. Nwamònu anyi?

19 Kí—kí mbyenze bu mùdi kwakula bwàcì to, kàdi kwamba ne: “Myakulu’s ke cileeji.” Mpindyewu, nentwalè, nsumbè mukòlò wà bisàbaatà, ludimi kí ncisàbaatà to. Lùdi lùlwa ànu ne cisàbatà, nudi numòna’s. Lùdi ànu lùlwa ne cisàbaatà. Nwamònu anyi? Mpindyewu, ncintu cìmwècimwè aci bwà Cimanyinu. Cimanyinu n’Kilistò. Kàdi dyakula dyà mu myakulu, ne diipata dya badémòns, ne dyanza dyà bintu abi, ne diyiiisha, ne bikwàbò byònsò, ke cileeji cyà ne Cìdimù, cilelèlè, kàdi kí—kí n’Cyôci to. Nwamònu’s, ndipà dyàCì. Bu mèmè mwà kunwambila ne. . .

20 Wèwè udi wamba ne: “Ndi—ndi muswè bwà wèwè, Mwanèètù Branham,” ne mèmè ndi nkupèèsha dipà kampànda, wamònu’s. Èè, awu kí mmèmè to, adi’s ndipà dyànyì.

Myakulu ndipà dyà Nyumà Mwímpè, kí n’Nyumà Mwímpè to; dipà kampànda dyà Nyumà Mwímpè.

21 Ne dyabùlù ùdi mwà kutentula cintu kanà cyònsò cyà ku bintu abi, kàdi kèna mwà kwikala Nyumà Mwímpè to. Nwamònu anyi? Yèyè ùdi mwà kutentula mapà aa, kàdi kèna mwà kwikala Nyumà Mwímpè to.

Ne Nyumà Mwímpè n’Cimanyinu cyà ne Mashi mmalaabiibwe, bwalu Ùdi ùlonda Mashi kubangila ànu ku Mukàndà wà Bupikudi. Nwacyümvù anyi? Ke cìvwà kavwidilà Kèndè aci’s. Ke cìvwàYe wènda ùlonda mu cikondo ne cikondo cyònsò ncyôci aci. Cikondo cyònsò Ûvwa ùlonda cyôci aci, bwà kumòna ne nCitwàdibwe, ne bôbò kabàvwa mwà kuvwijiiibwa bapwàngàne twètù katuyikù nànsha. Nènku mpindyewu Nyumà Mwímpè mujimà ùdi ùmwènekela Èkèleeziyà, wèna Nzambì mu mubidi wà buntu; ànu mwàkenzàYe kumpàlà kwà Sodoma, dyoshiibwa kuntwaku, cìvwà cifwànyikijilu. Pashùishe, Abraham, Yèyè wàkamumwènekela.

22 Ne bintu byònsò bìdiYe kàyikù mwenzè munda mwà bikondo abi, mu bikondo byà èkèleeziyà, ke bìdiYe munkaci mwà kwenza mpindyewu. Wàlukila ku Dìyì, bwalu mikenji ne mikenji ne bívwa ne cyà kudìbwinka byònsò mu Dìyì dijimà. Nènku mu matùkù àà ndekeelu emu, Bitampì Mwandamutekète munkaci mwà kukàngudiibwa, bìvwa mbwà kwambula kantu kònsò kàvwà kashàale ku luseke kakàyi munda mwàbì, ne kuvwija cintu cyònsò mu kaabujimà mubidi munène wùmwèpelè wà Mukàji-musèla, bwà ne aba bàvwà ne mwoyi kale wàwa kabàvwa bapwàngàne to pàvwà Èkèleeziyà ewu kàyi mupwàngàne, kasùmbù kàà Mukàji-musèla wa mu matùkù à ndekeelu aka, bwà kubàbwejamù, ne bònsò pàmwè kwangaciibwabò muulu. Nwamònu anyi?

23 Cimanyinu, Yesù Kilistò, Nyumà Mwímpè, ùdi munkaci mwètù. Bívwa bikèngela twètù kwikala ne kaneemu bwà cyôci aci. Twètù—twètù—twètù—twètù katwèna mwà kudipwekeshakù bikolè bikùmbàne to. Kuvùula bisàbaatà byènù, anyi kuya kwènù kwà ku binù, kí nkufwànyineku kumana

bwalu to; kî mbifwànyine—kî mbifwànyine kusànkisha to, kî mbifwànyinekù kukùmbana to; kàdi mwoyi wùdì wùkwàma mamuma à Nyumà!

<sup>24</sup> Mpindyewu mamuma à Nyumà ncinyi? Nwamònu anyi? Dinanga, disànka, ditalala.

<sup>25</sup> Nudi bavùluke mu dindà emu anyi? Didilongolola, kutùma mùsànjeelà ne Mukenji. Cintu cidi cìlonda cyàkenzàYe, paanyimà pàà Yèyè mumanè kutùma mùsànjeelà ne Mukenji, Wàkatùma Dikunji dyà Kapyà bu dishindika. Cintu cìvwà cìlondà cìvwà, paanyimà pàà cyôci aci, cìvwà mmusumb-. . . anyi busàmbi. Nwamònu anyi? Nuvwa bamanyè ne cìvwà cyà bushùwà, nuvwa mu ditalala. Tudi mu ditalala ne Nzambi, ku Mukalenge Yesù Kilistò. Nwamònu anyi?

<sup>26</sup> Mpindyewu dilòòlò edi netwikalè mwà kusambidila babèedi, ne ndi ngèela meeji ne bàdi ne mèèsà à Mukalenge. Ne—nenwikalè ne dibàtiiza, mudimu wà dibàtiiza anyi? [Mwanèètù Neville ùdi wàmba ne: “To.”—Muf.] Anu mèèsà à Mukalenge cyanàànà, mèèsà à Mukalenge. Nènku tudi baswè nùshaalè bwà mèèsà à Mukalenge.

<sup>27</sup> Nènku mu—mu tusunsa makùmi àsàtù ne tùtaanu anyi makùmi ànaayi tudi ne kiipàcìlà kàà kwikala bajikije ne kudìlongolola bwà mèèsà à Mukalenge. Nènku mpindyewu, mààlabà ke cikondo cyà Ditùkù dyà Beena Mudimu, bwà nwamòna mwà kwikishakù. Mpindyewu, ngămbì ne aci ke cìvwà meeji ètù, nudi numòna’s. Katwèna bamanyè ne ndìbà kaayi to. Ndi muswè kwikala mutwishìibwe ne ncyùmvwika bìmpè.

<sup>28</sup> Mpindyewu, mu dindà emu mvwa munwămbìle ne, bu mùndi ncìyi neenù to, Ndi—ndi ngèela meeji ne tuvwa ne Diyiisha dikwàbò dyà mèbà àbidì anyi àsàtù mu dindà emu. Kàdi—kàdi ndi—ndi mfùma ku dibanga, ke mêmè kudyàmbidila ne ndi mufwànyine ànu kutùngunuka ne bwalu abu dilòòlò edi, kàdi bìvwà ànu bitambe bulenga. Ncyèna mumanyè bantu ní mbacyumvwa anyi ki mbacyumvwa. Ndi ntèkemena ne bàdi naaci, myaba yònsò. Ne ndi ntèkemena ne kùvwakù mikàbà yà mèyi mîmpè yà cyôci aci, bwà bààmòna mwà kuyipàtula, bwà kumanyikayi, ne ndi ngiitabuuja, ne Mukenji wònsò ùnkàdiku kacya mutwàle, kakùyi mpata to aci cìvwà cìlongolola kùdì Nzambi, pa kuumusha. . . Mu bushùwà bwà bwalu, mudimu muntuma naawù wa ciibidilu, bu mùdì Bitampì Mwandamutekète ne bikwàbò, bìvwà buludi Dìyi dyà Nzambi. Ndi ngàakula bwà Mukenji wà kuyiisha; ndi ngiitabuuja ne awu ke ùvwàwu, nwamònu’s, wà—wà, ke ùdì ùkèngela bwà kulondawù Bitampì Mwandamutekète abi.

<sup>29</sup> Mpindyewu tàngilàayi nùmonè cìdì cìlwa paanyimà pàà Bitampì Mwandamutekète: didisanga dyà bantu, bimanyinu bisanga, bukènkè bukùnze bùdì munkaci mwà kupenya mu matùkù à ndekeelu, cimanyinu cyà bakàji bàtamba kulengela, ne

balùme, cìvwàbo mwà kwenza. Bimanyinu byònsò byà Nyumà Mwímpè ebi byènda bilombola, pashiishe kwalukila buludi ku dyashiibwa dyà cifulu dyà Mayiisha ònsò awu kubangila ku Bitampì Mwandamutekète. Mmaashiibwe cifulu mu cintu cimwèpelè eci, Cimanyinu, cyà ne tudi bímpè, nwamònu's, ànu kudikenketa twètù biinè ne kumòna ní tudi mu Diitabuujà.

<sup>30</sup> Mpindyewu, Mukalenge ànùbènèshè. Nènku mpindyewu kumpàlà kwà twètù—kumpàlà kwà twètù kubuulula mu Bible, bwà kusambidila babèèdi. . . Tudi bakonke mu dindà emu ne, mbanganyi bàvwàbo basambidile mu dyàlumingu dishààle dilòòlò, bàvwà—bàvwà—bàvwà bwondopiibwe, bàkaavwà bamanè kwondopiibwa elu lumingu, ne pàmwè ne bònsò mwab'ewu bàvwà beelè cyanza cyàbò muulu, aci cìvwà mmu disangisha mu dyàlumingu dishààle dilòòlò. Mpindyewu, ncintu kampànda, nudi nuumvwa's. Ncintu kampànda cidi. . . Cidi, ndi munkaci mwà kukwàta cyôci eci bwànyì mèmè mwinè.

<sup>31</sup> Kùvwa mwànà mukesè wa balùme, uvwabò bafama ku dyambila, mufùmìne ku Chicago, Màndàmù mutekète. . . Mukàjì awu, Peckinpaugh, Peck-. . . Màndàmù Peckinpaugh ùfùmina ku—ùfùmina ku. . . Mmwanèètù wa bakàjì mwena Kilistò mulenga. Nènku ùvwa mutwàle muntu kampànda mwà—mwànà, mùshindù ùndì ncyùm vwa, mwànà wa balùme mutekète anyì cintu kampànda, cìvwà—cìvwà ba. . . bangàngàbukà kabàyi nànsha bamanyè ne ncinyì cìvwà cimwenza to. Bisùlùsùlù byèndè bivwa bibi be, anyì cintu kampànda, mu mùshindù wà ne—kabàciyi mwà kwenza. . . kabàvwakù mwà kumubweja mu kàlaasà anyì cintu kampànda to. Ùvwa bibi, bibi byà menemene. Ke yèyè ne, Nyumà Mwímpè paanyimà menemene pàà Mukenji, kwakula ne mwànà mukesè wa balùme awu, ne kumubiikila, kumwambila ngiikàdilù wendè ne bikwàbò, ne kujikula lwondapu lwèndè.

Ke lumingu elu kuyayè, maamù anyì baledi, anyì ní nganyì yònsò uvwaku awu, kwalukila nendè kùdì ngàngàbukà, ke ngàngàbukà kwambayè ne ùvwa ne bisùlùsùlù bipyabìpyà, nwamònu's, bisùlùsùlù byà bipyabìpyà. Ne mùshindù ùndì ngùm vwa, ne—ne baledi anyì muntu kampànda ùvwa mubiikidile ntàntà mule, anyì mùshindù kampànda, bwà kucimanyisha kùdì disangisha. Nwamònu anyì? Mpindyewu, Nzambì, Mufùki awu, ùdi mwà kwenza bisùlùsùlù.

<sup>32</sup> Ndi—ndi ngiitabuujà bulelèlè ne tudi mu—mu cibweledi cyà cimwè cyà ku bintu byà bitàmbe kutùmbuka cikaadiku cilengè buloba kacya ku matùkù à Mukalenge Yesù. Nwamònu anyì? Nwamònu anyì? Kàdi mpindyewu tudi mwà kwikala bamanyike bu. . . Necitambè kwikala cipwekèle. Nwamònu anyì? Nwamònu's, cidi muntu ùbiikila ne *ncyà bukolè* aci, Nzambì ùdi ùbiikila ne “ncinyangu.” Kàdi cidi muntu ùbiikila ne *ncikùtākàne* aci, Nzambì ùdi ùbiikila ne “ncyà bukolè.” Nwamònu anyì? Pa nànku citàngilaayaaku mpindyewu,



nwamònu's, necitambe kwikala cipwekèle bikolè mu mùshindù wà ne kwàkucipangila...ne newùcipangilè's wè wèwè kùyì ne Cimanyinu mwaba awu bwà kucikenketa, udi umòna's. Nwamònu anyi?

<sup>33</sup> Nganyi uvwakù mufwànyine kwikala mwelè meeji ne mikùnà yivwa yitupika bu bimpàngà byà mìkòòkò, ne mabèjì àvwa àtuuta bikàshì, pàvwà mupròfetà ùpàtukila mu cipèèlà; cyàkambiibwà kùdi Yeshàayi, bidimu cinunu ne nkàmà yìbìdì...anyi bidimu nkàmà mwandamutekète ne dikùmi ne bibìdì kumpàla. Ne myedi ku cibanga kwònsò, ne cipese cyà cisebà cyà mùkòòkò, kàyì nànsha ne cyambilu ciinè cyà kuyiishilamù to, mwipata mu maèkèleeziyà wònsò, mwimàne ku mwelelu wà Yadènè, wèla lubilà lukolè ne: “Nyingàlálaayi!” Ne ùbìikila bantu ne musumbà wà “nyòkà yà ntòòkà,” nyòkà. Kàdi's ke cyàkamba Nzambì ncyòci aci, ne pààlwàYe, “mikùnà neyitùpìke bu twànà twà mìkòòkò.” Nwamònu anyi? Badìpwekèshe bàakacimòna ne bàakasànka.

<sup>34</sup> Mmuniyì mùvwàbo bafwànyine kuumvwa aci...ne Maasiyà munènè awu, uvwa mudyànjila kwamba mu cipròfetà kubangila ànu ku ntwadìjilu mene kwà Mukàndà awu, mu Genèsè nè, Yèyè ùvwa mwà kulwa, Musùngidi? Milàmbù yònsò, ne bapròfetà bònsò, ne cintu cyònsò cìvwa cimufunkune ànu Yèyè. Ne pashiishe pàakalwàYe, byenze bu ne ndilediibwa dyà mu masandi; taatù uvwa kàyì nànsha musèle mamw'Endè to, byènzè bu nàнку. Nwamònu anyi? Nènku mukàjì awu wàkapeciibwa ne difù dyà mwànà kumpàlà mene kwà kusèlanganabò. Nènku Wàkalwa mu mùshindù awu, ne mulediibwe mu—kakesè...Èè, bàdi bàmba ne mmu cikùmbi cyà nyama, mu Bible. Kàdi cikùmbi mu miinè matùkù awu cìvwa nzùbu wa mwinshi mwà buloba paanyimà—paanyimà mu cimanu. Ngàkatuutakeena ne mwaba bu nàнку mu Arizona cikondo kampànda, muye kalemba nyama. Kùvwa cikùmbi cyà nyama paanyimà mwinshì mwà mukele wà mabwe. Nènku ke mùshindù awu ùvwà Yesù mulediibwe's, paanyimà mu cikùmbi cikesè cyà mu mukele pa cidilù cyà bisoosà ne bituuta, mu cikùmbi cyà ngombe, nwamònu's, mwaba ùvwa diyeebà disanganyiibwa.

<sup>35</sup> Ne wàkakoleshiiibwa bu Mukwàcishi wa mukoonyi wa mabaya, ne mmuniyì mùvwà Aci mwà kwikala Yèhowàh wa bukolè awu? Kàdi's ke cìvwàYe, nwamònu's. NcìvwàYe. Nwamònu anyi? Mupersona wa mùshindù wà pabwàwù menemene. Kàdi, kaa, dibà dicìvwàYe ànu Nsongàlùmè, Wàkakèmesha baakwidi ne dimanya dyà Dìyi adi. Bwà cinyi? Yèyè ùvwa Dìyi. Nwamònu anyi? Yèyè ùvwa Dìyi.

Kacya Yèyè kàakafùndakù mukànda to. Kacya Yèyè kàakafùndaku—Yèyè kàakafùndakù mwàkù to. Dìyi dimwèpelè ditùYe kacya mufunde, ngèèla meeji, Wàkadikùpula, mu—mu lusenga, cikondo cìvwà mukàjì mukwàciibwe mu masandi. Kacya Yèyè kàakafùndaku mwàkù kampànda to. Bwà cinyi?

Yèyè ùvwa Dìyì. Nwamonu anyi? Yèyè uvwa Dìyì. Kabìvwa bikèngela bwà Yèyè kuDifunda to; nsòmbelu Wendè ùvwa ùDìleeja. Yèyè ùvwa Dìyì. Pìikalàbi ne Yèyè... “Pìikalàbi ne Ncyèna ngèza byenzedi byà Taatù Wanyì to, nàнку kanùNgiitàbùùjì to.” Nwamònu anyi? “Mémè nciyì ngèza ànu menemene cìvwà Dìyì dyambè ne Nèngènzè aci to, nàнку ncyèna Dìyì to. Kàdi bu . . .” Ke cìvwàYe muswè kwamba ncyòci aci. Yèyè ùdi Dìyì.

<sup>36</sup> Pa nàнку mpindyewu dilongòlòlaayi mpindyewu bwà mudimu wà—wà dyondopa wùdì wùlwa ne mèèsà à Mukalenge. Tudi bafwànyine kwikalà ne disànkà bwà wèwè kushààla neetù bu wèwè mwà kushààla. Wèwè kuyì mwà kucyèza to, netùjikijè dyàkàmwè.

<sup>37</sup> Nèнку kanùpu mwoyi to, nùnsambidìlaayikù ne nùsambidilèku mukàjàànyì, mukàjì wa mutàmbe kalolo wa buloba bujimà, ne—ne bwà bàna bàanyì. Nèнку mpindyewu ndi mubàlòmbe, muntu ne muntu, bwà Mukalenge Yesù.

<sup>38</sup> Mpindyewu, Becky ùdi ànu mu cikondo cyà kaaRicketta, nudi bamanyè's, ànu—kàà bidimu dikumi ne byà munjila, mutùvwà tucibìkila kale. Nèнку yèyè ùdi ànu mu cikondo aci. Kàdi, mpindyewu, yèyè mmwànà wa bakàjì wa kalolo kààbùngì, ne ndi—ndi nsàkidila Mukalenge bwà bwalu abu; kàyì ùnwà mfwankà to, kàyì ùnwà maalà to, kàyì ùnyeemakana eku ne eku to, cintu nànsha cimwè. Kàdi yèyè ùdi ànu mu cikondo aci, yèyè—yèyè kèna ùditàcisha bwà cintu to. Kì mmuswè kuya mu èkéleeziyà to, nèнку, yèyè muswè kuya, ùdi ùsòmbela lwà paanyimà pàapa munkaci mwà kucyànkunya bàzòkà, ùjuuka kuulu ùpàtuka ùya. Aci's, nwamònu's. Ndi muswè kumumòna muujìbwe tètè ne Nyumà Mwìmpè.

<sup>39</sup> Ndi muswè kumòna Joseph, ndi muswè mwànà wa balùme awu... Ndi ngiitabuujà ne dīngà ditùkù pangìikalà nciyì mwà kuya kàbidì ku cyambilu to, ndi muswè kwangata Bible musùnsùke wa kale ewu kumupèèshayì, kwamba ne: “Joseph, shààla Nendè, mwanàànyì wa balùme.” Dìbà adi ndi mudilongòlòle bwà kubànda muulu. Ndi muswè kuumvwa lupeepèlè lùtuuta mwaba kampànda, kutàngila muulu, kunyungusha cyanza cyànyì, kuya.

Tùsambilàayi.

<sup>40</sup> Taatù Nzambì, mwoyi wètù wònsò mujimà mmuvùngila mu Cyòci aci, bwalu Cìdi Wèwè, ne Wèwè udi Mwoyi wètù. Mpindyewu kùdi bàmwè kaaba aka, Mukalenge, bàdì—bàdì mene bakwàte Cimanyinu cìmvwà mwakùle eci. Mbakwàte Cimanyinu aci, kàdi biikàle bàsaama. Nèнку ndi muswè kwakula dilòlò edi pa kubàpèèsha bukitù, bwà—bwà kubàkolesha ku mwoyi bwà kwangata makenji adi mafila kùdi Nzambì. Bàdi ne bukenji bwà kucimuna démon awu.

Ûkaadi mumanè kucimunyiibwa, ne yéyè ùdi ànu ùbàdingàkaja cyanaàna. Ndi mbànana, Taatù.

<sup>41</sup> Mpindyewu nkwàcishèku bwà kwamba Dîyi. Wèwè akwilà ku memè, Mukalenge, ne tuumèyi etu tukesè tûndi mufûnde mwab'ewu, ne Mifûndu mikesè yidi mifûnda. Ndi ndòmba bwà Wèwè kunkwàcisha, Mukalenge, ne kubwela mu Dîyi ne kubàpa diitabuuja bwà butùmbi bwà Nzambi. Mu Dîna dyà Yesù mmûndi ndòmbela emu. Amen.

<sup>42</sup> Mpindyewu ne lùkàsàlùkàsà lwònsò, ndi muswè nùbuululè mu Bible mu Mukàndà wà Yelèmiyà ne nshapità wa 29, panwikalà baswè kubala. Anyi, kanùyi benzè nànkù to, cìfûndaayi ànu cyanaàna. Yelèmiyà, nshapità wa 29. Nènku netùbangilè ku mvensà wa 10 wa Yelèmiyà, mvensà wa 10 wa nshapità wa 29. Kàbìdi, netùbalè mu Luukà, nshapità wa 16, tubangila ku mvensà wa 14.

<sup>43</sup> Mpindyewu ndi nùpèèsha cyena-bwalu cyànyi, panùdi—panùdi—panùdi nwenda nubuulula apu. Cyena-bwalu cyànyi dilòlò edi cidi *Dishiikila*. Nènku ndi...*Dishiikila*, nènku, mpindyewu, nwènù nudi bamanyè cidi dishiikila dyùmvwija.

Nènku mpindyewu netùbalè mu Yelèmiyà nshapità wa 29, mvensà wa 10.

*Bwalu emu mmùdi MUKALENGE wamba, Ne paanyimà pàà bidimu makumi mwandamutekète bimanè kukùmbana ku Baabùlònà Mémè nènnumwènèkèlè, ne kukùmbaja dîyi dyànyi dîmpè kunùdi, mu dinùfikisha ku dyalukila mu mwaba ewu.*

*Bwalu ndi mumanyè meeji àndi nnwèlela... (Abi kí mbyà kalolo anyi?)... mmùdi MUKALENGE wamba, miinè awu mmeeji à ditalala, ne kaàyi a bubì to, bwà kunùpèèsha ndekeelu mwanyishìibwe.*

*Dìbà adi nenùnsòkè, ne nenùyè ne nenùndòmbè, ne mémè nennumvwilè.*

*Ne nenùnkèbe, nenùmpetè, panwikalà mwà kunkèba ne mwoyi wènù wònsò.*

*Nènku nenùmpetè, mmùdi MUKALENGE: ne nengùmushè bupika bwènù, ne nenùsangishè kuumukila ku matunga...ònsò, ne kuumukila mu myaba yònsò yimvwà munùsàke, mmùdi MUKALENGE wamba; ne...nennùtwàle kàbìdi mu—mu mwaba ùmvwà munuumùshe bwà kunùtùma mu bupika awu. Kunwàluja ku mpenta!*

Ndi mwelèmu aci, mémè mwinè. Kacyèna cyàmba aci to. Aci ncìmvwà nswa kwambila Èkèleeziyà.

Luukà 16, kubangila ku mvensà wa 15, anyi mvensà wa 16.

*Mikenji ne bapropheta byakadiku too ne ku Yone: kubangila anu pa diine diba adi bukalenge bwa Nzambi mbuyiishibwe, ne muntu yonsò udi udyenzeja bwa kubwelamu.*

“Muntu yonsò udi udyenzeja bwa kubwelaMù.” Kabiyi anu kubwelaMù cyanàanà, bipeepèlè to, kadi bikengela kudyenzeja bwa kubwelaMù. Nwamònu anyi? Mpindyewu: “Panùdi nunKèba ne mwoyi wènu wònsò, diba adi nèmpeciibwè.”

<sup>44</sup> Ne Yèyè wàkalaya ne Ûvwa mwà kwalukila ne kulwa ne bantu, munkaci mwà bàvwà batangalajjibwe pa buloba bujimà abu, paanyimà pàà bidimu makumi mwandamutekète abi, bàalukila mu Yelusàlèma mwàkuumukàbo; ne Yèyè wàkacyènza anu mùshindù awu. Ncyà bushùwà.

<sup>45</sup> Mpindyewu netwàkulè pa—pa *Dishùikila* munda mwà tusunsa tukesè emu mpindyewu. Pa ciibidilu, bìdi bikengela ngiikadilù wa cimpicimpi, bwa kutukùpa mu dishùikila. Nwamònu anyi? Mbibi be bwa mùdici ne cyà kwenza nàнку, kadi bantu mbatàmbe kwikala ne lujòòkò lupite mu meeji àbò, mu mùshindù wà ne bìdi bikengela cimpicimpi kampànda. Cintu kampànda cidi cijuuuka, ne pàdici cijuuuka, diba adi cidi—cidi cibàkùpa mu dishùikila adi. Ne mu bulelèlè, mu kwenza kwà cyòci aci mu dishùikila amu, cidi cipàtula cintu cilelèlè cyùdi aci. Cidi cileeja cyùdi mwenjibwe naaci, mu cikondo cyà dishùikila. Pa ciibidilu citu anu cipàtula bintu bimpè byònsò bìdi munda mwèbè abi.

<sup>46</sup> Mu cikondo cyà lufù, mwawa mùmwè bantu pàvwàbo bamanyè ne bàvwa bàpunga ne lufù, bintu bivwàbo babùte matùkù àbò wònsò à mwoyi, bòbò, mu dishùikila, bàvwa bàteeta bwa kubitonda. Nwamònu anyi? Ne bateeta ne: “Angata *cikampànda* ne ucilongòlòlè; ndàaku, bu wèwè mwà kuswa; ndàaku, wènzè nàнку,” nwamònu’s, mu dishùikila. S’bivwa bikengela kwikalabò benzè aci kumpàlampala kwònsò aku, nwamònu’s, kabayi bìndila too ne ku cikondo cyà cimpicimpi to. “Udi muswè kungenzelaku *cikampànda* anyi?” Bwalu bwa cimpicimpi bùdi bùlela dishùikila. Pààbì, bivwa bikengela twètù kucyènza kakùyì bwalu bwa cimpicimpi abu to.

<sup>47</sup> Mpindyewu tudi tumòna, dilòlòlò edi ne, tudi twangata bimfwànyi byà Paasàkà. Ne Paasàkà wàkangaciibwa mu bwalu bwa cimpicimpi, mu bikondo byà dishùikila. Nudi numòna mu—mu Ekèsòòdè nshapità wa 12, ku mvensà wa 11 wa nshapità wa 12, ngèèla meeji ne nyèyè, udi wamba ne: “Dyàyi Paasàkà ewu ne bisàbaatà ku makàsà kwènù, ne mikàbà miswika mu bimònù byènù, ne dikombo mu cianza cyènù,” nwamònu’s, nwènù nudi numudya mu dishùikila.

<sup>48</sup> Bàkaavwa bamòne cianza cinène cyà Nzambi. Bàkaavwa bamòne bishimà Byèndè byònsò abi, ne pashishe kulwàbo mwinshi mwà cimanyishilu cyà Cimanyinu aci. Nènku pàvwàbo

mwinshì mwà cimanyishilu cyà Cimanyinu apu, bàakangata mèèsà à Mukalenge mu—mu dishiikila, bwalu bàvwa bamanye pa díbà adi ne Nzambi ùvwa pabwípi ne kutuuta ne dinyoka.

<sup>49</sup> Nènkú cívwa ncikondo cyà munyúkunyúku. Cívwa ncikondo cívwa muntu ne muntu údyèla ku diteeta, bwalu Díyi dyà mupròfetà kadívwakù dipangile musangu nànsha ùmwè to. Dívwa díjaadikiibwe ne mbulelèlà. Cyònsò cyàkambàye aci, ncyenzèke ànu menemene mùshindù wàkacyàmbàye awu. Díkunji dyà Kapyà dícívwa ànukù. Nènkú, pashiishe, mupròfetà úvwa mumanyishe ne Nzambi ùvwa ne cyà kupicila pa mutù pàvwàYe ùmòna cimanyinu ku ciibi. Nènkú cívwa ndishiikila.

<sup>50</sup> Ndi mufwànyine kudifwànyikijila ne bânà bàvwa . . . pààkamònàbò mapwàpwà manène, mafike awu àpweka àfùmina mu dyulu byenzè mùdì mwíshì wùsòmbela pamutù pàà cimenga aci, mikunda yìfùmina mu nzùbu ne nzùbu yònsò amu, bânà abu bàvwa bafwànyine kwikala baye kùdì papa wabò bamba ne: “Papa, udi mutwishiiibwe ne tudi mwinshi mwà cimanyinu aci anyi?”

Nènkú ùvwa mwà kuya ku ciibi, kutàngila ku dikunji, ku mukamba, kwamba ne: “Mwanàanyi wa balùme, aci’s mbilondèshile Díyi Dyèndè.”

“Wavùluka ne, mèmè ke mwànààbuta webè. Papa, udi mutwishiiibwe anyi?”

<sup>51</sup> “Ndi mutwishiiibwe! Aci’s mbilondèshile cìdì mupròfetà mutwàmbile, ne yèyè ùdì ne Díyi dyà Mukalenge. Mwámbe ne: ‘Pangàamònà mashi, nèmpicilè pamutù pèènu. Angàtaayi mwànà wa mùkòòkò bwà nzùbu.’ Ndi munùbwejè nwènu bânà bònsò munda. Wèwè udi mwànààbutè wanyi, kàdì wanyi wa kumpàlà. Ke udi ufwà pambèlu pònsò pààpa; kàdì kùdì mashi. Aci ke cívwa EMU MMUDÌ MUKALENGE WAMBÀ. Pa nànkú ikìshà, mwanàanyi wa balùme, ikàlà ne mwoyi mutwè pa mukwàbò, bwalu Nzambi mmwenzè mulyi. Nwamònu anyi?”

“Èè, Papa, cyùdì muvwàdile bisàbaatà byèbè ku makàsà ncinyi? Bwà cinyi udi ne mulangala mu cyanza cyèbè? Bwà cinyi wèwè udi ne cipese cyà dyàmpà mu cyanza cimwè ne mwànà wa mùkòòkò mu cyanza cikwàbò? Bisekiseki byà bululu abi ne bikwàbò mbyà cinyi? Cyùdì ubìdiila ncinyi? Cìdì cikòpàkànyì cikupàtukila mu mpàlà nànkú ncinyi?”

“Mwanàanyi, lufù lùkaadi pabwípi ne kudikùma mu bantu.” Nwamònu’s, cívwa mmu cikondo cyà dishiikila.

<sup>52</sup> Mpindyewu, ndi ngùtabuuja ne tudi ne mwoyi mu matùkù atùdì . . . Anyi, mu ngakwilù mukwàbò, matùkù atùdì ne mwoyi aa àdì ne cyà kufikisha Èkèleeziyà ku díbwela ne kasukì mu dishiikila. Ndi ngùtabuuja ne, kacya ànu ku diyiiisha dyà mu dindà emu dyà kùdì Nzambi, kì mmèmè to, Ngèèla meeji ne bìvwa bìkèngela bwà kukùpadi disangisha dijimà edi mu dishiikila, bwàlu tùdì benzè bilèla ntàntà bule bukùmbàne. Tudi

bayè mu èkèleeziyà ntàntà bule bukumbàne. Bikèngela twènzè cintu kampànda.

<sup>53</sup> Mmunyi mutùdiku mwà kumòna bimanyinu bikwàbò binène ne maalu à kukèma byenjùbwe pa bakwàbò, kàdi bìshi bwètù twètù? Cìvwa ne cyà kulela ngiikàdilù wa dishiikila, mu mùshindù wà twangata dipàngadika, kumpàlà kwà Nzambì. Bimanyinu byà Dilwa Dyèndè bìvwa ne cyà kutwàla disangisha dijimà edi, patùdi bacibalè mu Dìyi...Nyumà Mwìmpè mmutwàmbile ne: “Ndà mu mwaba kampànda, cintu *kampànda* necyènzekè,” kì nkutwàmbila ne cìvwa ncinyi to, kàdi necyènzekè. Tuya kuntwaku, cyènzeka mùshindù awu. Bibejibeji mbicìpàtùle, bikàndàkàndà mbicìpàtùle, bìleeja cimfwànyi cyàci. Kwalukila apa ne kumòna maalu masokoka manène awu, masokoka mu Bible, matùkàngwila patòoke, mu cipidi cipyacìpyà citùvwa kacya katùyi bamanyè kumpàla nànsha, bìbwelakanangana pyòpyopyò mu Dilwa dyà Mukalenge Yesù.

<sup>54</sup> Pashìshe, ku ndekeelu kwà Mayiisha, tumòna cyenzedi cyà Nyumà Mwìmpè munène awu, tuMumòna ùpweka patòoke kumpàlà kwà bantu, bàMukwàta too ne fòtò. TuMumòna munkaci mwà kukwàta mudimu ne kuleeja ne kì mmuntu to, kì ng'anu muyiishi kampànda cyanànà to, kì ndisangisha kampànda to. N'Nyumà Mwìmpè munkaci mwà kuleeja cintu cimwècimwè cyàkenzàYe pàvwàYe mubwélè mu mubidi wà Yesù Kilibò apu. Mpindyewu Yèyè mmubwele mu Mubidi wà Mukàj'Èndè-musèla. Bìvwa bìkèngela kutùkùpacì mu dishiikila.

<sup>55</sup> Bantu abu bàkaavwa bamòne cyanza cyà Nzambì. Nènku dilòòlò dyà mèèsà à Mukalenge adi, bààkaàngata ne...mu dishiikila, bwalu bàvwa bamanyè ne cintu kampànda cìvwa pabwìpi ne kwenzeka. Ne tudi bamanyè ne cintu kampànda cìdi pabwìpi ne kwenzeka. Nènku vùlukàayi ne, Dilwa dyà Mukalenge nediiikale diya dyà cintùluntùlu, dyà mu musokoko. Yèyè neàlwe ne neàMwangàtè bu mwìbì munda mwà butùkù. Ne pa kwela meeji ne muntu kampànda, ku cintùluntùlu, kùdi bidimba byà dìkù dyètù bimanè kuya, ne wèwè mushàale paanyimà! Cìvwa ne cyà kutùkùpa mu dishiikila, dyà ne, ku ngàsà wa Nzambì, katwàkushiyiibwa paanyimà to. “Kwòkò cintu kampànda cìndi ncìyi muswè to...Kùun, kùunshiyi to, Mukalenge.”

<sup>56</sup> Kùkaadi ndambù wa matùkù mvwa ngùm vwa Mel Johnson wimba musambu awu ne:

Wamvùlukakù pàdi binsònjì bìmata, èyowà's  
Wamvùlukakù pàdi balundà kabàyi pabwìpi to  
Nènku pangàasabukà musùlù wa Yadènè ewu  
PaUdi ubiikila mènà ku mukàndà apu,  
wamvùlukakù.

57 Nènku mu Mukàndà wà Mwoyi wà Mwànà wa Mùkòòkò, ndi muswè bwà dìnà dyànyì diikalè difundibwemù. Ndi muswè bwà Yéyè kumvùlukakù dyàbiilàbo mènà ku mukàndà. Ne cidi cinkùpa mu dishiikila, mbwena kwamba ne, bu mwàkambà Pòlò ne: “Paanyimà pàà mèmè mumanè kuyiisha Èvànjeeliyò nêngiikalè mu—mubèngiibwe, nêngiikalè mwi—mwimànshiibwe anyi?” Bìvwa mwà kwenzeka. Pa nàнку cidi cinkùpa mu citùpà cyà dishiikila, dishiikila, bwà kwelakù meeji, paanyimà pàà bidimu byònsò byà diyiisha ebi, ndikù mufwànyine—ndikù mwà...mwaba kampànda wùndì mufwànyine kuMupangila anyi? Nkwaka udi ulonda ngwà mùshindù kaayi? Ncinyi cìndì mwà kwenza pashiishe? Nènku cidi cinkùpa mu ngiikàdìlù wa dibinduluka. Kàdi ncinyi cìndì mwà kwenza? Cidi cinkùpà ku mikùnà ne mu bibandabanda. Ne mbikolè, bwalu, pàndì ne bantu, bìdi bikèngela ngiikalè bintu byònsò kùdi bantu bònsò, bwà ngaamònakù mwà kufikisha bàmwè kùdi Kilstò, ànu ne Cimanyinu aci misangu yònsò kumpàlà kwànyì. Nwamònu anyi?

58 Ne ndi mmòna bintu bìdi byènda bipàtuka, kàdi kùyi mwà kubyàmbara bantu to. Udi umòna bintu bishiilèshiilàngàne, kàdi wèwè mukàndikiibwe. Bikèèna-kumòna bìdibo bàkeba abi, ne misangu mikwàbò mbifwànyine kwenza ne bàdyùmvwa bibì wèwè mubyàmbe, kàdi's wèwè udi mumanyè cidi citàmbe bwìmpè cyà kwenza pamutù pàà kwenza nàнку. Nènku pashiishe udi uya ntàntà mule mu bikèèna-kumòna too ne pàdi cintu cyònsò cilwa cikèèna-kumòna, ne cidi cikukùpà mu ngiikàdìlù wa dibinduluka. Udi—udi utàngila wamba ne: “Mpindyewu ndi mu cikèèna-kumòna anyi?” Mbyenze bu mùdi kusòmba kaaba aka mene ne: “Eci ncikèèna-kumòna anyi? Ndi cyà bushwùwà mwimànyine penyì?” Nwamònu's, udi—udi udyenzeja mudimu mutàmbidile, udi wenzeja mubidi mudimu mutàmbidile. Nènku udi ujàndula maalù à bantu awùdi ujinga ne uvwa'kwikalaku kuyi mumanya to. Bantu bàdi bàjinga bintu ebi, bwà kumanya bintu ebi, kabèèna bàjingulula mushinga wà mudimu wà bwambi wà mùshindù ewu to. Kwèna mumanyè cidiwu wùtwàla to. Dìbà adi cidi cikùpa mu dishiikila ne: “Mukalenge Nzambì, ndi mumanyè ne nebikèngelè bwà mèmè kwandamuna.”

59 Jack Moore ùvwa mungambile musangu kampànda ne: “Ndi mufwànyine kukina bwà kwandamuna muwìkalà wèwè mwà kwandamuna, mu Ditùkù dyà Cilumbulwidi.” Yéyè ne: “Nzambì mmutèèke bantu aba mu byanza byèbè, ne wèwè neùlumbululè bwà muntu ne muntu wa kùdibo. Neùkalumbùlulè bwà mudimu wèbè wà bwambi.” Kùkaadi bidimu bitwè ku dikùmi ne bitaanu, anyi pàmwàpa dikùmi ne mwandamukùlù. Ne kacya ànu piinè apu, nkààdi mu dishiikila. Nèngènzè cinyi?

“Swàkù ngàmbe ànu cyùdi Wèwè wamba aci, Mukalenge. Lekèlà mbàlondèlè cidi Bulelèlà, anyi cyàmbi kantu nànsha kàmwè to.” Cidi cingèla mu dishiikila.

<sup>60</sup> Dìbà adi pa kumòna bimanyinu ebi bilwa, pa kumòna Nyumà Mwimpè ùtùpàtulamù, ne ùtwàla Bitampì ebi, ne kubyàdijamù mùshindù awu. Kutwàla Bikondo byà Èkèleeziyà ne kubyàdijamù, pashiishe kupweka mu Dikunji dinènè dyà Kapyà mwàmwa, ne—ne kuDìbuulula Yèyè mwinè. Pashiishe kupweka pa cintu cìdì cìlonda, pa Bitampì Mwandamutekète, ne kubìbuulula. Nànsha kubìfùnda mene mu bibèjibeji ne mu bikàndàkàndà. Pashiishe kubwela ne kwangata banjèlò bàà Nzambi, banjèlò mwandamutekète bàdì ne Mikenji mwandamutekète abu, ne kucìshìndika menemene mùvwà Bible mwàmbe. Pashiishe, mu ciinè cikondo aci, kujuuka ne kubweja Bitampì abi. . . bimanyinu abi, bidì bipòdya byà cikondo cyà nshìikidilu, ne kucìtwàdila bantu ne kubàmbila cidìci, ne byònsò bidì bìcìtangila, ne Mukalenge ùkwàta mudimu mwaba awu mene ùDileea mwikàlepù. Nènku pashiishe, kupweka ànu bu mu dindà emu, kulwa ne kulòmba Cìmanyinu aci pa muntu ne muntu yònsò. Dìbà adi, nudi bantu bàanyi. Nudi aba bàndì munangè, aba mene bàdì bàtèèleja mikàbà yà mèyì, ne bikwàbò. Dìba adi nudi numòna ndishìikila kaayi dìdici cìtèèka munda mwànyì.

<sup>61</sup> Dishìikila. Bimanyinu byà Dilwa Dyèndè bìvwa ne cyà kukùpa cidimba cyònsò cyà Kilistò mu dishìikila mpindyewu, bwà bwalu bwà misùukà yètù, bwà bwalu bwà dyètù—dyètù—dyètù dyàkalengèlè bwà matùkù àcilwalwà. Èè, ncinyi cìtwàkùngwijà bu twètù mwà kupeta buloba bujimà ebu? Tudi ne mwoyi bwà, tudi ne mwoyi bwà cinyi? Cyùdì ukwacila mudimu ncinyi? Cyùdì udiila ncinyi? Cyùdì ulwangeena ncinyi? Bwà kwikala ne mwoyi. Udi ne mwoyi bwà cinyi? Bwà kufwà. Ne kwèna mukùmbànyìne kwikala ne mwoyi paùdì kùyì mukùmbànyìne kufwà to. Mbulelèlè.

<sup>62</sup> Ne tudi tumòna bishimà byàbúngì byà dyondopa, bìvwa bikèngela kutùbwejabì mu dishìikila.

<sup>63</sup> Bu kànà kàà balùme kakesè aku. . . Ndi munkaci mwà kutàngila kùdì Màndamù Peckinpaugh mpindyewu anyi? Ewu m'Màndamù Peckinpaugh anyi? Ngwèwè uvwa ne mwànà wa balùme mutekète mwab'ewu, cintu kampànda anyi cìkwàbò? Mòna's, ke mukàji mwena bwalu bùmvwà ngàmba mwab'ewu musòmbe apa nùnkù. Ndi mwènzè ànu ne nkènzakanà ngùmba mmumòna.

<sup>64</sup> Mpindyewu pìikalà Nzambi mwà kwenzaku nànkù bwà mwànà mukèsè wa balùme awu, s'bìvwa bikèngela kunùkùpacì nwènù mu dishìikila's.

<sup>65</sup> Muntu kampànda wa ku New Albany, ùdì mwà kwikala kaaba aka dilòlòlò edi. Yèyè mmulundà wa Mwanèètù Roberson. Ùvwa ne mwànà mukèsè wa balùme kaaba aka. Ngèèla meeji ne mukàjèndè ùvwa ne kànsèrè musangu kampànda kàdì wàkondopiibwa. Nènku—nènku mpindyewu, mwànà mukèsè wa



balùme ewu ùdi ne disaamà dyà mfwènke dibi be mu mùshindù wà ne ùdi ànu mu ngiikàdìlù mubi. Kalùmyàànà aku, kenze ànu bu kàdì ne muminu mukwàte kùdì kànsèrè, kòkò kiinè. Nwamònu anyi? Ke pashìishe kulwaye ne mwànà mukesè wa balùme awu, éyowà, mmèmè ewù mmòna cyanza cyèndè cyela muulu paanyimà, lwà paanyimà pààpa, mbamusambidile mu dindà emu, nwamònu's.

66 Dishìikila! Pàkaavwà mukàjì awu wàmba kufwà ne kànsèrè, ùvwa mumanyè ne Nzambi ùvwa mwà kumwondopa. Nènku piikalàbi ne Nzambi ùvwa mwà kwondopa mukàjì awu, Nzambi's ùdi mwà kwondopa mwànà wa balùme awu. Nènku cidi cikakubweja mu ngiikàdìlù wa dishìikila. Nwamònu anyi? Udi ne cyà kulwa; kàdì paùdì mushiikile apu, dìbà adi Nzambi neàkutèèlèjè. Kàdì wèwè mwikàle ànu mwena lulèngù, kùyì ucyùka ne Yèyè ní ùdi ùcyènta anyi to, èè, dìbà adi aci's ncishiilàngàne. Wèwè udi wamba ne udi ucyènta, kàdì bìdi bìkèngela dishìikila bwà kucyènta.

67 Ndi ngèèla meeji ne cidi cyènta ne katwèna ne dishìikila to mbwà dipanga dyà dinanga, Nzambi, dinanga dyà Nzambi. Ndi ngèèla meeji ne dinanga dyà Nzambi nditù ditwàla dishìikila. Nzambi mwikàle munda mwèbè, Cimanyinu munda mwèbè amu, ne wèwè umòna ngiikàdìlù yà bikondo, ne bantu bàdìvwànda mu mpèkaatù mu mùshindù ùdìbo awu, necikukùpè mu dishìikila. Ngèèla meeji ne necikukùpèmu.

68 Mpindyewu Dìyì didi dyàmba patòoke tòò, panwikalà baswè kufùnda cyòci eci, mu Galàtiyà 5.6, ne: “Diitabuuja didi dikwàta mudimu ku dinanga.” Nwamònu anyi? “Diitabuuja didi dikwàta mudimu ku dinanga.” Nènku mùshindù wùmwèpelè wùdiku mwà kwikala ne diitabuuja, nkupeta dinanga dyàmbedi. Bwalu, ndekeelu wa byònsò, diitabuuja ndisonsola dyà dinanga. Ndisonsola, aci's ke cidi menemene—ke cidi diitabuuja. Ncisonsodi cyà dinanga. Mpindyewu, nwènù, nwènù kanùyì ne dinanga to, kanwèna mwà kwikala ne diitabuuja to. Nwamònu anyi?

69 Mmunyi mùdì mwà kwikala ne diitabuuja mu mukàjèèbè wèwè kùyì mumunangè? Aci's mmu *dinanga dyà buumüntù*. Mpindyewu kàdì bishi bwà mu *dinanga dyà Nzambi*, bwà Nzambi? Bìdi mwà kwenzeka munyì pawikalà kùyì munange Nzambi?

Pawikalà uvwa mwámbe ne uvwa munangè mukàjèèbè, kàdì kacya kùyì mumwambileci, ne kùyìku kacya musòmbekù nendè panshì mwenzè nendè mananga, mumujìkwileci, mumutwè mishìku, mumuupùkile, ne mumwambile ne yèyè ke udi mumanya bwà kwenza cikukù cyà Kalanga wa Yòmbò kutàmba bònsò bàà mu ditùnga amu, bintu byònsò byùdì mumanyè abi, ne mùdiye mutàmbe kulengela, ne mùdì mutàmbe kumunanga; wèwè kùyì mwenzè aci to, yèyè kàakucimanyakù nànsha. Ki

mùshindù ngwôwò awu. Pawikalà mumunange cyà bushùwà, udi ucyàmba patòoke.

<sup>70</sup> Ki mùshindù wutùtù twenzela Nzambi ngwôwò awu. Patùdi baMunangè, tudi tuMwambilaci. Tudi tusòmba panshì ne tuMusaamuna, ne tuMukuukwila. Nènku, nwamònu's, dinanga didi ditùsàka ku cyòci aci.

<sup>71</sup> Mpindyewu ambàbi tǔng bu cintu kampànda mwà kwenjiibwa bwà mukàjèèbè? Mòna's, s'ncifwànyine kukukùpa mu dishiikila bwà kucifikisha ku dyenzeka. Ambàbi tǔng bu muntu kampànda mwà kwamba ne mukàjèèbè ùdi ne kànsèrè? Kàdi bu muntu kampànda mwà kwamba ne mukàjèèbè—webè ùdi ne disaamà dyà cyàdi, ne yèyè ùkaadi pabwìpi ne kufwà? Nànsha nàнку, wèwè, newènzè—newènzè cintu kampànda. Nwamònu's, necikukùpè mu dishiikila.

<sup>72</sup> Nènku ncintu ànu cyòci cimwècimwè aci. Tudi ne cyà kwikala ne dinanga kumpàla kwà twètù kupeta diitabuuja. Ne diitabuuja . . . Patùdi ne dinanga dishùwashùwàlè, didi dyenza cinyi? Didi disàka diitabuuja dyètù ku mwalu wà mvità bwà Nzambi. Nwamònu anyi? Dinanga dilelèlè dyà Nzambi bwà Nzambi ne bwà Dìyi Dyèndè ne bwà cisàmbà Cyèndè, nedisakè diitabuuja pambèlu pààpa. Dinanga didi dikwàta ànu ku diitabuuja cyanààna, ànu ne: “Kàànkamanàayi, tuyaayi!” Nènku dipàtuka ke dyòdi dyaaya dyàdya, bwalu ke cidi dinanga dyenza.

<sup>73</sup> Yone 14.23, Yesù wàkamba ne: “Muntu yèyè muNnangè, neàlamè Mèyi Àanyi.” Mpindyewu kwèna mwà kulama Mèyi Èndè kùyì ne diitabuuja mu cidiYe mwàmbè to. Pa nàнку, nudi numòna's, yèyè munangè Nzambi, dībà adi ùdi ùshààla mukwàte ku Dìyi dyà Nzambi. Yèyè mwambè ne: “Mémè ndi Mukalenge udi mukwondope,” yèyè's ùdi witabuuja aci. Dinanga didi dimufikisha ku diciitabuuja, bwalu dinanga didi dikòokèsha byònsò. “Nànsha mémè ngààkula mu myakulu yà bantu ne yà Banjèlò, ncìyi ne dinanga to, ncintu cyanààna, nwamònu's. Nànsha mémè ne diitabuuja dyà kutùntumuna naadi mikùnà, kàdi ncìyi ne dinanga to, ncintu cyanààna.” Dinanga ditu dikòokèsha byònsò, bwalu Nzambi ùdi dinanga, Nzambi wa dinanga. Mpindyewu, èyowà's, mukalenge! Piiikalàbi ne Yesù wàkamba ne: “Muntu yèyè muNnangè, neàlamè Mèyi Àanyi.”

<sup>74</sup> Tudi bamanyè ne ncyà bushùwà ne Nzambi nèatuutakeenè ne musùukà mushiikile. Mpindyewu, twètù bònsò tudi bamanyè cyòci aci. Kàdi bitu bikèngela cintu kampànda bwà kutùsàka mu cyòci aci, mu dishiikila adi, ku dishiikila. Bìdi bikèngela cintu kampànda bwà kucyènta.

<sup>75</sup> Tudi tujandula ne, mu Yakòbò 5.15, Bible mmwàmbè, ne: “Dyà bukolè dishimàte,” aci's ndishiikila, “disambila dyà bukolè dishimàte dyà muntu mukwàne didi ne dikwàcisha dyàbùngi. Pàdi muntu mwakàne, muntu mwìmpè, ùbwela mu mudimu

mukolè,” anyi musùukà wènza lwendu, anyi ùbwela mu mudimu mukolè, eci anyi eci. Ndi—ndi ngèèla meeji ne “kwenza lwendu” ki mwâkù mutàmbe bwîmpè. Kukwata mudimu, anyi kwenza lwendu, mwônso munwikalà baswè kuwùbiiikila amu. Kàdi pàdì mu—mu—musùukà ùbwela mu—mu dishiikila, mu dikwata dyà mudimu, disambila dyà bukolè dishimàte dyà muntu udi mwà kuleeja Cimanyinu, didi dyènza cintu kampànda. Nwamònu anyi?

<sup>76</sup> Mònaayi cidì Bible mwâmbè kàbidi kaaba aka, mu Yakòbò 16, 5.16, mwâmbè ne, patwikalà... “Biikàle tutonda bilèmà byètù,” biikàle tudilongolola, tubilongolola bwà bwalu abu, “tutondelangana bilèmà byètù muntu ne mukwèndè.” Katùyi ne—cilèmà nànsha cimwè... Lòmbaayi bantu bwà kunùsambidilabò, biikàle tutondelangana bilèmà byètù muntu ne mukwèndè, ne tusambidilangana muntu ne mukwèndè. Ki bwalu mbwòbù abu’s. Ne dinanga, dinanga dyà ne, ndi ne dyeyemena ne ndi mwà kukutondela cilèmà cyànyi; ne udi mwà kutondela cyèbè cilèmà. Nènku ndi mutàmbe kukunanga mu mùshindù wà ne nènkusambidilè, ne wèwè pèèbè unsambidila; ne netùshaalè ne cyòci eci, ne disambila dikolè dishimàte, too ne pàndamunyiibwàdi. Aci’s ke, ke dishiikila ndyòdi adi. Ki ciwà cikèngelà bwà twètù kwikala naaci dîbà dyònsò neyòci aci.

<sup>77</sup> Twàngatàayi ndambù wa bileejilu byà mu Mifundu byà cyòci aci, cidì cyenzèke ncinyi, mpindyewu, bwà tusunsa tukwàbò, tutwè ku dikùmi ne tùtaanu, bu Mukalenge mwà kwanyisha.

<sup>78</sup> Yakòbò, ùvwa muntu, dyàmbedi ùvwakù. . . bu nsongààlùmè uvwa kàyi ùditacisha bwà cintu to. Wàkadyèlela meeji mu mutù mwèndè ne ùvwa mumanyè ne bukenji bwà bwànààbutè bùvwa ne musinga kutàmbe byònsò bwèndè yèyè, kàdi kàakacyùka bwà mùshindù ùvwaye mwà kubùpeta nànsha, cikòlò ànu àbùpeta. Nènku paanyimà pàà yèyè mumanè kubwàngata, wàkadyàmbedila ne byònsò bìvwa ànu bìmpè, bwalu yèyè nguvwa ne bwànààbutè. Wàkeela meeji ne bwalu bùvwa budikòse. Wàkalwa kùdi mwanààbò pàvwaye ne nzala, ùcifùminakù ku budimi, ùmukila ku dikwàta dyà mudimu ne bimunà ne kudizomba dyà tushà. Kàdi mwanààbò, yèyè—yèyè ùvwa dijinga ne lwesu lunène lwà musàbù, nkùnde ya mu mpàta ne—ne bintu bisanga pàmwè. Bìvwa bifwànyine kwikala bisaamisha mwoyi wà munda dîbà didì muntu ne nzala, paanyimà pà yèyè mumanè kwendakana ditùku dijimà. Ki mwanààbò kwambayè ne: “Ndi mufwànyine ànu kukùluka. Mpèeshaku ndambù wa bintu ebi.”

Ki yèyè ne: “Èè, mèmè. . . bu wèwè mwà kudicipa kùndi mèmè ne ndi mpeta bukenji bwà bwànààbutè.” Nwamònu anyi? Yèyè kàakacyùka mwàkacyènzàye to, cibi àbùpeta ànu dibùpeta. Ki yèyè kudyàmbedila, pàakapètaye bwànààbutè abu, ne aci cyàkakòsa bwalu.

<sup>79</sup> Mpenta, s'ke mwaba wunwàkapangila ngwôwò awu's! Nwênù kudyàmbidila ne bwalu nudi balediibwe kùdi Nyumà, balediibwe ku Nyumà wa Nzambi, Bukenji bwà bwànaàbutè, aci's ncikosè bwalu. Kàdi cidi ànu cibùbanga cyanàànà. Nudi bavùlùke mu diyiisha dyà—dyà *Mutèèlèjaayi Yèyè*, mùshindù ùvwà mwànà awu, paanyimà pàà yèyè mumanè kulediibwa mu dikù, ùlwa mwànà wa balùme. Úvwa ne bukenji bwà bwànaàbutè, kàdi byàkakèngela bwà kujaadikiibwabù, kulongeshiibwa bu mwànà. Ne pashiishe yèyè kàyì mujaadikiibwe ne mmwànà wa—wa butùmike ku diswa dyà taatù to, dībà adi cidi ne cyà kwikala, èè, kacivwa cifika ku—ku. . . kàvwa. . . ùshààla mupyànyì to. Kàvwa ùpyàna cintu nànsha cimwè to, nànsha nànkù ùvwa mmwànà wa balùme, kàdi kàvwa ùpyàna cintu nànsha cimwè to pìikalayè kàyì ùcyùka mudimu wà taatù nànsha.

<sup>80</sup> Nènku pàakamatà Nyumà Mwîmpè pa cisàmbà cyà beena Mpenta ki kubangabò kwalujulula mapà ne bintu bìvwà mu èkèleeziyà; kwelabo meeji ne, bwalu mbalediibwe kùdi Nyumà, aci cìvwa cikòse bwalu. Kàdi, nudi numòna's, kùdi dishikikiibwa dyà mwànà wa balùme. Ne paanyimà pàà mwànà wa balùme ewu mujaadike ne mmwànà wa balùme mulelèlè, dībà adi bàvwa bàya nendè pa mwaba wà bantu bònsò bitùùle, ne pashiishe wìmakijiibwa kuulu, ne bàmushintulula mizàbì, ne bàmwimàkija mwaba awu; ne pashiishe kùvwa dishikikiibwa dyà mwànà, bwà yèyè kwikala mupyànyì wa byònsò bìvwà taatù naabì abi.

<sup>81</sup> Nzambi wàkenza cintu cimwècimwè aci kùdi Mwàn'Èndè pa Mukùnà wà Dikùdimuka dyà mpàla. Yèyè ùvwa mubwikila kùdi. . . anyì ditutu, ne wàkashintuludiibwa mpàla, ne bivwàlù Byèndè byàkakenka bu dībà, ke dīyì kwambadi ne: “Ewu m'Wwan'Àanyì munanga Mwena munda Mùndi nsànkila bîmpè.” Mòsà ne mikenji byàkapangila. Kàdi ewu n'Yèyè: “Mutèèlèjaayi Yèyè.” Wàkatèèkiibwa. Nwamònu anyì?

<sup>82</sup> Mpindyewu Yakòbò wàkadyàmbidila ne, bwalu yèyè nguvwa ne bukenji bwà bwànaàbutè, nànkù byònsò bìvwà byenjìibwe.

Ke mwàkenzà kàbìdi beena Mpenta, ne kubangabò kudivwija bulongolodi, ba—ba-unitaires, beena būsàtù, ne ba-trinitaires, ne malongolodi à mīshindù yònsò, ne makòkyanganyi ne ditùùkakanangana dyà kùdi ewu ne mukwàbò, bìshindika ne Cimanyinu kacivwa cimwènèka nànsha. Budimù, mucyàwùdi dikòkangana, nwamònu's, kàdi s'ke kùvwàbì ne cyà kufika aku's.

<sup>83</sup> Mpindyewu, nwamònu's, Yakòbò wàkadyàmbidila cintu cimwècimwè aci. Kàdi mu bwòwà, dilòòlò kampànda, bwà mwoyi wèndè yèyè mwinè, dishiikila kàdi kumukwàta, dībà divwàye ùdyàmbidila ne: “Ànu dyàmwàmwà dyà musùlu wàwa, mwanèètù mmungindile bwà kunshebeya. Ùdi ne

cyà kunshebeya.” Nwamònu’s, bukenji bwà bwànààbutè bwàkapetàye abu, s’ke cintu cìvwà ne cyà kumukèbela lufù.

Ne misangu mikwàbò cintu ciinè cyùdi upeta aci, bu mùdi Nyumà Mwímpè, ke cidìYe, ne balediibwe cyàkàbìdi ku Nyumà, wèwè kuyi mutàngile bimpè to, cintu cimwecimwè aci necìkupiishè ku ndekeelu. Ncyà bushùwà. Màyi miine àkasùngilà Noà awu, àkapiisha bàà pa buloba. Cintu ciinè cyùdi—cyùdi mufwànyine kubiikila ne ndikolesha dyà maalu aci ncifwànyine kwikala cintu ciine cìdi cìkupiisha ku ndekeelu kwà njila.

<sup>84</sup> Mpindyewu Yakòbò ùvwa mumanyè ne mwoyi wèndè wùvwa pabwìpi ne ku ndekeelu. Ùvwa ne mùsànjeelà mulwè kumwambila ne mwanààbò, ne bantu nkàmà yinaayi bambùle bingoma, ùvwa ùlwa kutuutakeena nendè, mumanyè ne yèyè ùvwa—yèyè ùvwa mu njila. Bwòwà kàdi kumukwàta. Wàkatuma bantu kumpàla ne ngombe, ne bimunà, ne mìkòòkò bwa kufila mulambu wa ditalala kùdi Esàwù. Pashiishe, paanyimà pàà cyòci aci, wàkalongolola cisùmbù cìkwàbò ne mulombodi mukwàbò. Ki pashiishe kulongololayè cisùmbù cìkwàbò, ùteeta bwà kutuutakeena nendè kumpàla bwà kuteeta kutuuyija ciji cyèndè. Pashiishe kubangayè kudyàmbidila ne: “Aci’s kacyàkumwimanyikakù to, bwalu pàmwàpa mmutàmà kubanjika kumpita mèmè. Kèna naabi dijinga to.” Pashiishe yèyè kwangata bakàji bèndè ne bânà bèndè bakesè abu, e kubàsabwishayè dyàmwàmwa, bwà ne Esàwù wàmònakù bânà batekète abu ne bakàji bèndè. Ne mu bushùwà bwà bwalu bwà bânà bàà mwanààbù bàà bakàji ne bàà balùme abu, kàvwa mwà kubàsheya to. Dìbà adi, yèyè, kàvwa ànu mufwànyine kucyènza to. Nzambì mmumanyè mwà kupeta muntu. Yakòbò wàkasabuka kasùlù aku. Ki yèyè kudyèla ku binù.

Nudi bamanyè’s, yèyè ùvwa mwenzè bu kenji kàà maalu makònyàngàle, kumpàla kwà cyòci aci. Nwàmfwilaayikù luse bwà cyakwidi aci, kàdi mu mùshindù kampànda mukèsè wa...Yèyè ùvwa Yakòbò. *Yakòbò* mbwena kwamba ne “mushimyanganyi,” nènku ke cìvwàye ncyòci aci. Kàdi kùvwa cintu kampànda cìvwà cimwenzèkèle. Mu dishiikila amu, muntwamu pàvwà lufù lutèeka kumpàla kwèndè... .

<sup>85</sup> Kùdi mwà kwikala balùme ne bakàji basòmbe kaaba aka dilòòlò edi, bàdi ne, lufù lùsanganyiibwa kumpàla kwènu mene. Kàdi mùshindù ùmwèpelè wà wèwè kukùmbana mwà kukùmbaja cintu cyùdi ùjinga aci, nkulwa ne dishiikila dyònsò. “Ndi ne cyà kucipeta, dilòòlò edi. Ndi ncipeta mpindyewu, anyi bwànyì mbutùuke. Maalabà dìbà nedìikalè dimanè kupita. Ndi ne cyà kucipeta mpindyewu!”

Paùdi usambila bwà dibàtiiza dyà Nyumà Mwímpè, Cimanyinu aci, kwàmbi ne: “Èè, mpindyewu nèmbandèku bwà kuteeta. Mukalenge, mèmè, ndi mucyòke ndambù.” Kaa, luse

wè, shààlà mu nkwasu webè amu! Kwikadikù nànsha—kwikadi nànsha wàteeta to. Wèwè mulwè, wamba ne: “Nèmpicilè mu mulongo wà babèèdi; bàndaabè maanyì pa mutù, nèmmonèbi ní cidi cingenzela bwalu bwímpè kampànda,” mbipicìibwe ne wèwè musòmbè mwaba wùdi awu. Too ne pawàfikà pa kaaba aku, too ne pàdi èkèleeziyà mujimà ùfika pa kaaba kàà ne, cidi pankacì pàà lufù ne mwoyi, nudi ne cyà kuMupeta mpindyewu anyi nùdi nufwà, díbà adi Nzambi neàbwele mu cyalu. Bidi bikèngela dishiikila bwà kubweja Nzambi mu cyalu.

<sup>86</sup> Yakòbò wàkeela lubìla kupita dyàmbedi. Ne dishiikila dyònsò wàkabiikila too ne pàakakwàtaye Nzambi. Nèku pààkenzaye nàku, wàkalwangana mvità yà bibùlà; kabiya bwà tusunsa dikumi ne tùtaanu to. Wàkalwangana mvità yà bibùlà bwà kuMulama, mu musùkà wèndè, bufùkù bujimà; kàdi nànsha nàku yèyè ùvwa mumanyè ne kàvwa ne dibènesha adi to, ne ùvwa mwà kushàala mukwàte too ne pàakalwà dibènesha adi. Wàkalwangana mvità yà bibùlà ayi ne dishiikila dyònsò mu mùshindù wà ne dibènesha dyàkalwa. Pashiishe, ne pàakamònyè. . . too ne pàakamatà Nzambi mu cyalu. Nèku pashiishe, mu dishiikila amu: “NcyàKukulekelakù uya to,” pààkabangaye kuumvwa dibènesha dyènda dimupwekela.

Bantu bàabùngì bàtu bàmba ne: “Butùmbi kùdi Nzambi, ngàcipeci mpindyewu.” Ke mwaba unùdi baseeswishibwe awu. Eyowà’s! Muntu kampànda ùdi wàmba ne: “Kaa, ndi ndyùm vwa ànu bìmpè be, Mwanèètù Branham, mvwa muyè kuntu kwàka ne musambile. Kaa, mubidi kunzakalalawù.” Nèku aci cívwa cifwànyine kwikala Nzambi. “Ngàkamòna bukènkè bunène kumpàlà kwànyì.” Aci’s cívwa ànu cifwànyine kwikala Nzambi, kàdi kí ng’aci cìndi mèmè ngàmba to.

<sup>87</sup> Bible mmwàmbè, mu Ebèlù nshapità mwi6 ne: “Mvùla ùtu ùlòkela bìmpè ne babì, mùshindù ànu wùmwèwùmwè awu.” Mpindyewu, udi wangata blé, ne wangata ne bisoosà bibi, kàdi ubikùna mu budimi. Kàdi mvùla mu bushùwà bwà bwalu mmutùmina blé, kàdi mvùla ùdi ùlòkela pa bisoosà bibi ànu mùdiye ùlòkela pa blé amu. Nèku, mvùla, ne bisoosà bibi bidi ànu ne disànka bwà mvùla mùdi blé amu, ne cidi ànu mvùla umweumwe awu. Nyumà Mwímpè mwinè ùdi mwà kumata pa mwena bupidyà ne kumwenzeja maalu ànu menemene mùshindù wùmwèwùmwè wùdi mwena kwitabuuja wènzà awu. Kàdi ku mamuma àbò nkudìbo bàmanyikila; ke cìndi mèmè ngàmba ncyòci aci, ke Cimanyinu ncyòci aci. Ne Da- . . .

<sup>88</sup> Nèku Yakòbò, èyowà’s we, mu dishiikila amu, kwambayè ne: “Ndi mumanyè ne ndi muKuumvwe, Wèwè udi nàànyì mwab’ewu, kàdi ncyàKukulekela uya to.”

Mùngà muntu ùdi ùcimòna cyakàne, kaadivwayila kàà kumpàla kakesè cyanààna, bàdi bàjuukila kuulu ne bàtwàdija kutùpika kuya muulu kuya panshi, ne kunyeemakana mu kajila,

bàmba ne: “Ndi muMupetè, ndi muMupetè, ndi muMupetè.” Kaa, to. Huh-uh. To.

Yakòbò wàkashààla mwaba awu too ne pààkenzekà cintu kampànda, cyàkamufikishà ku dyenda bishiilàngàne, cyàkamuvwija muntu mushiilàngàne, bwalu yèyè wàkashààla too ne pààkenzekà cyòci aci. Ne yèyè ùvwa ne bukolè... Bible mmwâmbè ne: “Wàkawkàta too ne pààkatàmbàye bukolè.” Mmunyì mùdiku muntu mwà kutàmba Nzambì bukolè? Kàdi’s wèwè udi mwà kucyènza. Udi mwà kucyènza. Muntu ùdi mwà kutàmba Nzambì bukolè.

<sup>89</sup> Musangu kampànda kùvwa muntu dìnà dyèndè Hezèkiyà, bàvwa bamwambìle kùdì mupròfetà ne: “EMU MMÛDÌ MUKALENGÈ WÀMBA, neùfwe.” Hezèkiyà kutàngijayè mpàla wèndè ku cimanu, ne mu dishiikila wàkadila mwadi, “Mukalenge, ntwèku mushinga. Ndi mwèndè kumpàlà Kwèbè ne mwoyi mupwàngàne, ne ndi dijinga ne bidimu bikwàbò dikùmi ne bitaanu,” paanyimà pàà Nzambì mumanè kumwambila ne cintu kampànda cívwa ne cyà kwenzeka, yèyè uvwa ne cyà kufwà. Nènku, mu dishiikila amu, yèyè kushintulula ndongamu wa Nzambì. Dishiikila, nànsha nànku, yèyè kudila mwadi wà bujindajinda mu dishiikila.

<sup>90</sup> Yakòbò wàkashààla mwaba awu too ne pààkalwà dibènesha, ne kushintulula dìnà dyèndè dyà “mushimyanganyi” adi too ne ku “mwànà wa mfùmù ne Nzambì.” Nànsha ditùnga diinè dyàkabiiikiidibwa mu dìnà dyèndè. Èyowà’s, mukalenge! Cívwa ncinyi? Bipeta bivwa ne bwalu yèyè wàkafika ku dishiikila pa cintu aci. Nènku ditùkù dyàkalondà pààkatutakeenàye ne Èsawù, kàvwa dijinga ne balami to. Wàkapàtuka buludì e kutuutakeenayè nèndè. Nwamònu anyi? Bwà cinyi? Ùkaavwa mubwelè mu dishiikila amu too ne pààkapetàye ditwishiiibwa.

Ne udi upeta dishiikila ànu paùdì upeta ditwishiiibwa. Kabiyyì nànku to, kùlu mene bwà kukusambidila to. Kùlu mene bwà kuya ku cyoshelu to. Indila too ne pùikalàci pankaci pàà mwoyi ne lufù, bwèbè wèwè, dībà adi cintu kampànda necyènzekè. Cyà bushùwà, dishiikila!

<sup>91</sup> Luutà wàkashiiikila, cikondo kampànda, pàvwàye ku luseke lwà Naòmì apu. Ùvwa mufwànyine kwalukila kùdì cisàmbà cyèndè, kùdì bònso bàvwàye munangè, ne byònso bivwàye—bivwàye ùkuukwila abi, tunzambì twèndè ne cisàmbà cyèndè, anyi ùvwa ne cyà kulamata kùdì Naòmì? Ncinyi cidi mukàjì awu ne cyà kwenza? Wàkabwela mu dishiikila, ke kwelayè lubilà lukolè ne: “Kuwàyà, ke kungààyà. Kuwàsòmbà, ke kungààsòmbà. Kuwàfwilà, ke kungààfwilà. Mwaba wùdì ujiikiibwa awu, nènjiikiibwè...anyi nènjiikiibwè. Ne Nzambì webè neikalè Nzambì wanyì.” Ki bwalu mbwòbù abu’s, mushiikile! Nzambì wàkamubènesha, wàkamupèesha mwànà

wa balùme, Obedè. Obedè wàkalela Ishààyi. Ishààyi wàkalela, ku Ishààyi aku, kwàkalwa Yesù. Bwalu bwà, dishiikila!

<sup>92</sup> Bu ndumbà mukesè awu, Laahàbà, ùvwa mushiikile. Ùvwa mumanyè ne lufù ùvwa lutèèkiibwe kumpàlà kwèndè. Ùkaavwa mwinshì mwà cilumbulwidi. Ki kushiikilayè, kwambayè ne: “Nènnùsokòkèku nwènù batentekedi. Nèngènzè cintu kanà cyònsò. Cibì, dicìpaayi kùdi Nzambi wenù, ne nzùbu wanyi neàshaale mwimàne.” Ki bwalu mbwòbù abu’s.

Yèyè kwamba ne: “Nèngiikalè... Wèwè mwangàte cimanyinu eci, neciikalè.”

<sup>93</sup> Eliyèzè wàkafika ku dishiikila pàakatèèkiibwa bujitu bwà kuyayè kakèba mukàji-musèla bwà Izàkà pambidi pèndè. Eliyèzè wa mu Damàsèkè ùvwa muntu munène. Ùvwa mutùtè dyèsè kùdi Abraham, ne bàvwa bamweyèmène kùdi Abraham bwà kuya kakèbangana ne mukàji-musèla, cifwànyikijilu cyà mùshindù mujaalàme cyà mukàji-musèla, bwà mwanèndè wa balùme, Izàkà. Ku yèyè awu nkùvwà mwà kupàtukila Kilistò.

<sup>94</sup> Mpindyewu, Eliyèzè, bu mùvwàye muntu wa nyumà, ùvwa mumanyè cìvwàci cìswa kwamba. Mukàji wa mùshindù mujaalàme ke uvwa ne cyà kwikala mukàji wa—wa muntu awu. Kàdi mmunyi mùvwàye mufwànyine kumusungula? Mu díbà dyà dishiikila dyèndè adi, pàakafikàye mu cimenga aci, kusambilayè e kwamba ne: “Mukalenge Nzambi!” Ke cintu ncyòci aci’s. Díbà dyùdi ushiikila, nda ùkasambilè. “Mukalenge Nzambi, nsongàakàji wa kumpàla wàpàtuka ne wànwisha kaameelu màyi awu, ne ùmpèèsha màyi à kunwà awu, ikalè yèyè awu.” Wàkasambila mu díbà dyà dishiikila dyèndè adi.

<sup>95</sup> Rebekah, nsongàakàji mulenga kumòna awu, kulwayè, kunwisha kaameelu màyi. Pashiishe kwambayè ne: “Kanùnjingakaji mu njila wanyi to.” Bìvwa bikèngela bwà kufikayè pa díbà dyà dipàngadika dyà ne ùvwa mwà kuya. Yèyè ùvwa cimfwànyì cyà Mukàji-musèla. Mmufwànyine—mmufwànyine kuya kasèdiibwa kùdi muntu udiyè kacya kàyiku mwànji kumòna anyi? Mpindyewu, aci’s ncintu cinène. Kacya kàyì mwànji kumumòna to, cikòlà ùvwa mumvwilè kùdi mwena mudimu wèndè.

<sup>96</sup> Aci’s ncifwànyikijilu cyà Mukàji-musèla. Kacya kùtukù mwànji kumòna Kilistò to. Kàdi udi umvwa, kùdi basadidi Bèndè, cidiYe. Nudi nusumbisha bintu byònsò, nushiya mèkù ènù, bikwàbò byònsò bìdi bikèngela, bwà kuya kaMupeta. Mpindyewu mònaayi ne, nènkù yèyè kwangata dipàngadika, cimfwànyì cyà Mukàji-musèla, kulekelayè dīkù dyèndè dyà cyena màngumba adi, nwamònu’s, bwà kuya.

<sup>97</sup> Yona, mukùpiibwe pamutù pàà mbù mu cikondo cyà cipeepèlè cikolè, panshì pàà mbù, mu difù dyà mushipa wà bàlenà. Ditèkemena dyònsò dyà dipànduka dikaavwa diyè. Kàdi byàkamulwila mu meeji èndè ne Solòmò, mu dilàmbula dyà



ntempèlù, wàkamba ne: “Mukalenge, bantu bôbò biikàle mu lutàtu mwaba kanà wônso, ne bôbò batàngije mpàla wabò ku ntempèlù eku ne basambìle, díbà adi wabùmvwila.” Nènku ùkùdimuka mu difù dyà mushipa wà bàlenà, kudìlongololayè bwà kutwa binù mwaba kampànda, ngèela meeji, mwikàle ne bilùshì byà mushipa wà bàlenà pambidi pajimà.

Ki yèyè awu kusambila mu dishiikila amu. Nènku mu cyôci aci, mushiikile; ànu ndambù wa myeyelu yà mbômbonè cyanààna ki cyônso cìvwàye naaci mu difù dyà mushipa wà bàlenà. Nènku mu myeyelu mikesè yìvwàye ùkòka ayi, pàngà apa kàvwà mumanyè luseka lùvwàye mutàngile to, wàkamba ne: “Mukalenge, ndi ngiitabuuja ne ndi munkaci mwà kutàngila muulu mu luseka lwà ntempèlù Webè.” Nènku ànu ne ndambù wa myeyelu mimushààdìle, mu dishiikila, kusambilayè, mu maalu à mùshindù awu. Cìvwà kaciyi cyànji kwenjiibwa kacya, kàdi ùvwa mushiikile. Wàkasambila, ne Nzambi wàkamulama ne mwoyi munda mwà matùkù àsàtù à muunyà ne à bufùkù, ne mumulòpwèle pa kaaba kàà kwambayè mukenji wèndè. Dishiikila’s!

<sup>98</sup> Anà, mukàji nkumba wa mu Bible awu, wàkajinga mwànà wa balùme, ne wàkaditwa mu dijila dyà byàkudyà bwà bwalu bwèndè. Nènku wàkajila byàkudyà ne kusambila too ne mwà kafikà mwakwidi wa mu ntempèlù ku dyela meeji ne ùvwa mukwàcike maalà. Yèyè ùvwa mu dishiikila dyà dikèma’s! Ne bakwàbò bakàji bàbandila mùshindù wà kafulu kàvwà mukwàbò mwàsé; ne nudi bamanyè mùshindù ùyaakwenzabò’s; ne mukwàbò ùmòna ne mbilàmbà byà mùshindù kaayi bìvwàbò balwàte pambidi, ne bàyiikila pa bintu bìvwà byènda byènzeka mu ferme. Kàdi kì ng’Anà to; wàkapàtuka dyàkàmwè mu musùmbà mujimà e kuya ku cyoshelu. Yèyè ùvwa munkaci mwà kujila byàkudyà. Ùvwa muswè bwà bundù bwèndè kuumushiibwabù.

Ndishiilangana kaayi didiku leelù ewu. Ncyenzè ànu bu bundù bwà kwikala ne mwànà. Díbà adi cìvwa—cìvwa bundù bwà kubènga kwikala ne mwànà.

Ki kutwaye binù. Ne yèyè kàvwakù mutùme meeji ku bulenga bwà ntempèlù to. Yèyè kàvwa mumòne mwakwidi wa buneemè pàvwàye wènda ùpàtuka to. Ùvwa mu dibungama dyà dikèma mu mùshindù wà ne binsònji byèndè bìvwa bimutùnkumukila pa matàma, ne ùvwa munkaci mwà kudila mwadi, mu dishiikila, “Éyi Mukalenge Nzambi, mpèèshèku mwànà wa balùme. Mpèèshèku mwànà wa balùme!”

<sup>99</sup> Nènku, mònaayi, yèyè kàvwa wa budisu to. Pààkamuumvwà Nzambi, ne kwandamunaYè disambila dyèndè ne kumupà mwànà wa balùme, yèyè wàkamwalujila Nzambi. Ne bwalu yèyè kàvwa muswè kwikala wa budisu to paanyimà pàà Nzambi mumanè kwandamuna ku disambila dyèndè, Wàkamupèèsha

mupròfetà. Kaa, adi òwà dibènesha dyà nsàkidilù. Kaa, Yéyè mmùle naawù tètè, mabènesha makesè àà nsàkidilù àdiYè ùfila awu. Kaciyi ànu mwàna to, kàdi mupròfetà. Ne kakùvwa cikèèna-kumòna cyà pa bùtookà to kùkaavwa bidimu byàbùngì, byàbùngì menemene, mu Izàlèlè. Samwèlè, mupròfetà wa kumpàla, bwà bidimu byàbùngì, byàbùngì menemene, bwalu maamù wàkapeta dishiikila; dyà ne kàvwa mwà kupeta bânà to, ne yéyè mwinè ùkaavwa mupicile díbà dyà kulelayè mwànà, kùkaavwa pàngà apa bidimu makùmi àsambòmbò, makumi mwandamutekète. Kì kusambilayè ne dishiikila, ùvwa ne cyà kupeta mwinè mwànà ewu! Cívwa ncinyi aci? Nzambi ùkaavwa mwakùle nendè, kakùyi mpatà to.

<sup>100</sup> Kwéna mwà kwikala mushiikile pàdi Nzambi kàyi mwànji kwakula neebè to. Kaa, Èkèleeziyà, juukà ùdinyùkùshè! Twà kondo kèèbè kàà mwoyi aku cizàdi, juukilà wèwè mwinè kuulu, pa díbà edi! Tudi ne cyà kwikala bashiikile, anyi kubùtuka! Kùdi kùlwa cintu kampànda cyà kùdi Mukalenge! Ndi mumanyè ne cidi EMU MMÙDÌ MUKALENGE WÀMBA. Kùdi cintu kampànda cilwalwà, nènku mbitàmbe bwìmpè twètù kwikala bashiikile. Bidi pankaci pàà lufu ne Mwoyi. Necitùpicilè mu mikòlò katùyi mwà kucimòna to.

<sup>101</sup> Bwalu yéyè kàvwa wa budisù to, wàkapèèbwa mupròfetà.

<sup>102</sup> Mukàji wa beena Suunèma ùvwa ne mwànà mukèsè wa balùme uvwa mupròfetà mwakùle Dìyi dyà Mukalenge pa bwalu bwèndè, nànsha mwinè mùvwayè mukùlakàji ne bàyèndè mukùlakàji. Kabàvwa ne mwànà to, kàdi yéyè ùvwa ne kalolo kùdi mupròfetà ewu—ewu. Ne ùvwa mumanyè ne yéyè ùvwa mulùme wa Nzambi. Wàkajingulula ne ùvwa wa kuneemekiibwa, muntu mulelèlè. Yéyè wàkabwela mu nzùbu, bàyèndè kàyimù to, ne bikwàbò byònsò. Ùvwa muntu wa cijila. Bàvwa mwà kumòna ne yéyè ùvwa muntu wa kuneemekiibwa. Ùvwa mumutàngile wènzà bimanyinu ne maalu à kukèma. Ùkaavwaku mumuumvwè wàmba maalu àvwà ènzekà. Ùvwa muntu wa kuneemekiibwa, wa cijila.

Kwambilayè bàyèndè ne: “Ndi njingulula ne muntu udi wènzà kupicila kwètù ewu mmuntu wa cijila.” Inàbànzà wa mu nzùbu awu, ùvwa mumanyè ne yéyè ùvwa muntu wa cijila. Kì yéyè kumwibakila kazùbu ku luseke aku bwèndè yéyè, bwà kùkadi wàlwa kutàcishiibwa nànsha. Ùvwa mwà kulwamù díbà dyònsò òvwayè muswè adi, ne bikwàbò. Kutèekayè ka—kalààlu kakesè kuntwaku, ne—ne mulòndò wà màyi, ne bikwàbò, bwà kwikalayè wòwa màyi nkàayèndè ne ùpeta cintu kampànda cyà kunwà. Nènku ùvwa mwà kutùma mwena mudimu mukàji, anyi muntu kampànda, mwena mudimu mulùme, ne—ne cyàkudyà kampànda cyà kumupèèsha, ne ùlwa ne ùmujingila di—ditùkù dilenga, anyi cintu kampànda.

<sup>103</sup> Nènku, pa nànku, pàakamòna Eliyà musàngeelu ewu

mumwenzela. . . Ne bàakafùnda ne: “Cinùdi nwenzela bàna Bàànyì bakesè aba, Mèmè ngunùdi nucyènzela.” Ki kumònayè cyôci aci, mukàji awu ùvwa ùtwa Nzambì musinga pàvwàye ùtwa mupròfetà ewu musinga, pàakamònayè Nzambì mu mupròfetà awu. Nènku, pa nàнку, kàvwa muswè bwà kumwenzelabu cintu nànsha cimwè bwà bwalu abu to. Kacivwa mu mwoyi wèndè bwà ní ncinyì cyònsò to. Wàkacyènza ànu bwalu ùvwa munangè Nzambì. Kàakacyènza bwà dibènesha kampànda to. Wàkacyènza ànu cyanààna.

<sup>104</sup> Mpindyewu, mpindyewu Eliyà wàkamba ne: “Ndà ùkamukonkè, ngàakulà ne mfùmù bwèndè yèyè anyi? Mèmè ndi mulundà wèndè wa katàpùlà-katèèka. Anyi, kàpiteenà munène, ndi—ndi mumumanyè bîmpè menemene. Kùdi dyèsè kampànda, cintu kampànda cîndi mwà kumwenzelakù, ndi muswè kumupèeshakù cintu kampànda bwà mùshindù ùdiye muditwàle kùndi. Yèyè—yèyè mmundiishe. Yèyè mmumpèeshe bulàlu bwà mèmè kulàalamù. Nènku—nènku ùvwa naanyi bîmpè menemene. Mpindyewu cîndi mwà kwenza ncinyi?”

Yèyè ne: “To, mèmè ndi musòmbèle ànu munkaci mwà cisambà cyànyì. Tudi—tudi basòmbè bîmpè. Byàkudyà tudi naabi, ne kwajiki. Katwèna dijinga ne cintu nànsha cimwè to.”

Ke Gehazi kumwambilayè ne: “Kàdi yèyè kèna ne bàna to.”

<sup>105</sup> Ànu pàvwà Gehazi mucimòne apu, kakùyì mpatà to mupròfetà wàkamòna cikèènà-kumòna, bwalu wàkamba ne: “EMU MMÜDÌ MUKALENGE WÀMBA. Ndàaku ùmwambilè ne, mu cikondo cikumbàne, anyi mu cikondo cyena diinà, cidimu cimwè kuumukila ku mpindyewu, yèyè neàmbule mwànà wa balume.”

<sup>106</sup> Nènku mwànà awu wàkalediibwa. Ùkaavwa ne bidimu bitwè ku dikùmi ne bìbidì. . . Mùshindù mwinè ùvwa babàka bakùlakàje abu ne cyà kwikala banange mwinè mwànà mukesè wa balùme awu’s wè, mulela nkààyà wabò bôbò awu. Nènku dîngà ditùkù ùvwa mupàtùkè mukakòse blé, ne papa wèndè. Cìvwa ne cyà kwikala dîbà diipacile nkankalà wa ditùkù adi, muunyà ùvwa mumwòshè, ngèèla meeji, bwalu wàkabanga kwela lubilà ne: “Mutù wànyì.” Disaamà kumuneemenadi. Papa wèndè ùvwa ne cyà kumuumusha mu budimi, nènku cìvwa bwalu bwà cìmpicìmpi kuntwaku, mu mùshindù wà ne wàkatùma mwena mudimu, e kumwaluja kumbèlu.

<sup>107</sup> Maamù ùvwa mumwambùle pa bibelu too ne pa dîbà nkànkalà, ki kufwàye. Mònaayi ne, mwanèndè umwèpelè mulela, wàkamupèeshabò kùdi Mukalenge awu, ku disambila ne mulayi wà mupròfetà ne EMU MMÜDÌ MUKALENGE WÀMBA. Ùvwa mumanyè ne kùvwa cintu kampànda cipampalàmùke mwaba kampànda. Kacivwa ànu cifwànyine kwenda bîmpè to. Mmunyi mùvwà Nzambì mufwànyine kumupà mwànà wa balùme awu ne kulekela dinanga dyèndè—

dyèndè dilwa kùdi mwànà wa mu dibòko awu? Pèndè yéyè kàvwa mumulòmbayè to. Ùkaavwa mutàmbe kukùlakaja bwà kumupetayè. Bìvwa bìkèngela bwà cyanza cyà Nzambi kucishindumunaci. Muntu kampàndà wàkacyàmba, mupròfetà awu. Nènku mwaba awu mwànà wa mu dibòko ewu mu ngiikàdilù ewu, uvwa mufwè, mwanèndè umwèpelè wa balùme.

Pa nàнку kwambilayè mwena mudimu ne: “Swika mikàbà pa kampundu, ne ùbandèpu, kàdi kwimanyi to. Muntu kanà yònsò ewu yéyè muswè kukwimanyika, kwambi diyi to, nènku wèwè tungunukà ànu ne kwendesha too ne ku Mukùnà wà Kaamèlà. Mu nyòngòlò mwàmwa mwaba kampànda, mùdi musadidi wa Nzambi Mutàmbe bunène wa mu Dyulu, mudikòkèlamù; ewu wàkangambila ne: EMU MMÜDÌ MUKALENGE WàMBA awu, mèmè nèmpetè mwànà awu. Ndi muswè kumanya bwà cinyi Nzambi mmwenze cyòci eci.” Pa nàнку kwambayè ne. . . “Ndàaku buludi mutàngile kumpàla ne kùkenkecikù kampundu aku to. Kàlekèle kàye lùbilu ne bukole bwaku bwònsò. Kàlekèle kànyeemè lùbilu too ne pawàfikà kuntwaku.” Dishiiikila’s wè!

<sup>108</sup> Ki Eliyà mupròfetà kjuukayè, kutàngilayè, e kwambayè ne: “Ke mwena Suunèmà ulwàlwa ewu, ne, yéyè, ùdi ne cintu kampànda cidi cimutàcisha. Nzambi mmucinsokòke. Ncyèna mumanyè ne lutàtu lùdi cinyi to.” Yéyè ne: “Ndàaku, ùkatwilàngànè nendè. Ndi ne. . . Tùlwijakajàayi. Kùdi cintu kampànda cidi kaciyi cyènda bimpè nànsha.”

Dishiiikila kukwàta mupròfetà, dishiiikila pa mukàji awu. Nwamònu’s, bàvwa munkaci mwà kudisanga; muntu ùkèba kumanya cìvwa Diyì dyà Mukalenge, ne mukwàbò yéyè kàvwa mumanyè cìvwa Diyì dyà Mukalenge to. Ki bwalu mbwòbù abu’s. Umwe ùvwa muswè kucimanya, ne mukwàbò yéyè kàvwa mucimanyè to. Mukàji awu ùvwa muswè kucimanya, kàdi mupròfetà kàvwa mucimanyè to. Kwambayè ne: “Nzambi mmucinsokòke. Ncyèna mumanyè cyà kwambila mukàji awu yéyè mufikè mwab’ewu nànsha.”

Pa nàнку mukàji awu ùkaavwa wàmba kufika mwaba awu díbà adi. Kwelayè cyanza muulu, kwambayè ne: “Maalu ónsò àdi ènda bimpè kùdi anyi? Maalu wònsò àdi ènda bimpè kùdi bàyebè anyi? Maalu wònsò àdi ènda bimpè ne mwànà anyi?”

<sup>109</sup> Mpindyewu, mukàji awu ùkaavwa mumanè kufika ku ndekeelu kwà dishiiikila dyèndè adi. Kwambayè ne: “Byònsò mbimpè!” Butùmbi’s wè! “Byònsò’s mbimpè!” Dishiiikila dyèndè dívwa dijikè. Ùkaavwa mupetè musadidi wa Mukalenge. Bu yéyè kàyikù to, nùku yéyè’s ùvwa kuciikala ànu mu dishiiikila. Kàdi, nudi numòna’s, yéyè ùvwa mwaba awu. Mukàji kwambayè ne: “Byònsò mbimpè!”

Elishà kudyambidilayè ne: “Èè, cidi munkaci mwà kwenzeka mpindyewu ncinyi?”

<sup>110</sup> Ki mukàjì kuyayè lubilu kupònayè panshì ku makàsà èndè. Aci's cìvwa cimwèka bu kaciyì cikumbànyine to, ki Gehazi kumujuulayè ànu kuulu cyanàànà. Yèyè kwamba ne: “Mulekèle, kwenji nàнку to.” Eliyà kwambilaye musadidi wendè ne: “Kwènji nàнку to. Mulekèle. Kùdi cintu kampànda cipampàlà mùke. Nzambi mmucinsokòke.” Pashìishe mukàjì awu kumubuulwila ne mwànà awu ùvwa mufwè.

<sup>111</sup> Mpindyewu, mupròfetà kàvwa mumanyè cyà dyenza to. Kwambayè ne: “Gehazi, angàtà mulangala wùndì mwendè naawù ewu.” Ùvwa mumanyè ne cyònsò cìvwàye mulenge aci cìvwa cibènèshìibwe, bwalu kàvwa n'yèyè to, uvwa n'Nzambi munda mwèndè. Ùvwa mumanyè cìvwàye. Ùvwa mumanyè ne yèyè ùvwa mupròfetà. Ki kwambulayè mulangala ewu e kwamba ne: “Gehazi, wàngàtà, ne ùye ùkawùtentèkèlè mwànà awu. Nènku muntu ní nganyi mukwakwishe, wèwè ikàlà mushiikilè. Kàdi kwèdì muntu mwoyi to, ne kùlekedikù. . . Tùngunuka wèwè ànu ne kuya, kwàkudi ne muntu nànsha umwe to. Ùwùtentèkèlè mwànà awu.”

<sup>112</sup> Kàdi, mukàjì awu, aci kaciyàkajikija dishiikila dyèndè to. Aci kaciyàkasankisha cìvwàye mulwile to. Yèyè ne: “Bu mùdì Mukalenge Nzambi ne mwoyi, mèmè—mèmè ncyàkukulekela paùdì kùyi uya kenza cintu ne mwànà mudimu to.”

<sup>113</sup> Ki Eliyà kufikayè ku dishiikila. Ki yèyè uyààya ewu, wènda ùpweka ne njila, yèyè ne mukàjì awu. Nènku pàakafikàbo kuntwaku, kùdì. . . bantu bònsò bàvwa pambèlu mu bulà amu, bèela mbilà mikolè bàdila myadi. Nènku mukàjì ùvwa mwenze cintu cìvwà citàmba kwikala my cyòci cìvwà mwà kwikala cyenjiibwe. Kwangataye mwànà awu ne kumulàadika pa bulàalu mwaba ùvwa Eliyà ùdyòlwela awu. Aci's cìvwa cìmpè ànu mùvwà mulangala wèndè awu amu. Kàdi yèyè kàakajuukakù to, pa nàнку cintu aci kacìvwa cìfwànyine kwenza bwalu to. Ùvwa muswè kumanya cintu kampànda cyà cishiilàngàne.

<sup>114</sup> Mupròfetà kubwelayè. Mpindyewu ùkaadi mu dishiikila. Mpindyewu cyènzàye ncinyi? Nènku tudi tusangana mu Bible ne wàkabànda kupweka mu nzùbu amu, mushiikile. “Ncyèna mumanyè cintu cikwàbò nànsha cimwè cyà dyenza to, Mukalenge. Ki mèmè ewu. Wèwè kungambila bwà mèmè kwambila mukàjì awu bwalu abu, ne EMU MMÙDÌ MUKALENGÈ WÀMBA. Ne bivwa menemene ànu mùshindù wùngàakamwambilà awu, bwalu Wèwè ngwàkangambila. Mpindyewu, s'ki yèyè awu mu lutàtu, ne mèmè ncyèna mumanyè cyà dyenza to. Ki nsongàalùmè ewu mulàadika apa mufwè. Cìndì mwà kwenza ncinyi, Mukalenge?”

<sup>115</sup> Kakùyi mpatà to Nyumà Mwìmpè wàkamba ne: “Piikalàbi ne Nzambi ùdi munda mwèbè, dìbà adi làadila pa mwànà awu.” Katancì aka anyi, kwimanayè, kunyeemayè e kumutentekela byanza pa byanza byèndè, dyùlù dyèndè

pa dyùlù dyèndè, mishikù yèndè pa mishikù yèndè. Nènkù dîbà dyàkamulààdilàye, mwànà awu kwelayè nyàshì misangu mwandamutekète. Dishìikila kuya mwamwamwa.

Mwanà kwalukila ku mwoyi, bwalu dishìikila dyàkapuusa mukàji awu kùdi mupròfetà, ne dishìikila dyàkapuusa mupròfetà kùdi mwànà awu. Ne dishìikila mu bônso bwàbò abu kupuusadi Nzambi kumwela mu cyalu. Ne dinanga dyà Nzambi, ne dinanga bwà cisàmbà cyèndè, kupwekeshadi dinanga dyà Nzambi panshì, ne kukùpa diitabuuja ku mwalu wà mvità, ne mudimu awu wàkenjiibwa. Bwalu kudikòsa. Amen! Ki cyòci aci. Dishìikila's didi dicyènza. Cyà bushùwà's! Yèyè kàvwa mwà kuumuka to.

<sup>116</sup> Mpofo Baatimààyò ùvwa wèla meeji ne Yesù ùvwa ne cyà kupìcila kùvwàye aku, musòmbe mwaba awu ku ciibi cyà cinène aci, mpofo mulòmbyanganyi wa kàà pa luse, bwà kàà pa luse. Katanci aka, kuumvwayè mutooyi kampànda; Yesù ùvwa ùpìcila mwaba awu. Yèyè ne: "Udi upita awu nganyi?" Muntu kampànda kumusàkilayè panshì. Kwambayè ne: "Bu wèwè mwà kuswà, muntu kampànda, udi upìcila kwàka awu nganyi?"

Umwe wa kùdìbo, èè, pàmwàpa muyiidi mukàji mutekète wa kalolo kampànda, kumwambila, wàmba ne: "Mukalenge, kwènàku mumanyè ne Nganyi udi upìcila mwaba awu anyi?"

"To. Ndi ngumvwa bàmwè bàà kùdìbo bàmba ne: 'Kùdi nkità mijimà mipàte tètè ne bantu bafwè muneemu emu. Pawikalà muzuulè bafwè, ndàaku ùkabàjuulè.' Mmupendi kampànda wa Nzambi anyi muntu kampànda?"

"To. Kacya ukààdikù mumvwè bààkula bwà Mupròfetà wa mu Ngaalèlè awu, Mupròfetà wa citende awu uvwa ubìkidiibwa ne n'Yesù wa mu Nazalèètà awu anyi?"

"To."

"Èè, udi mumanyè's, mu Bible mbàmbe mu mivungù yètù ne Mwànà wa Davidi neàjuudiibwe bwà kusòmbapù. N'Yèyè ewu."

"N'Yèyè awu anyi? N'Yèyè awu, ne n'Yèyè udi munkaci mwà kupita awu anyi?"

Dishìikila dyàkamufikisha ku dyela lubilà ne: "Éyi Yesù, Wèwè Mwànà wa Davidi, ikàlaku naanyi luse!"

Kùmpicikù to, Éyi Musungidi mupòle,  
Umvwa lubilà lwanyi lwà didipwekesha;  
PaÛcidi ubìkila bakwàbò apa,  
Kùmpicikù to.

"Éyi Yesù!"

Bàmwè bàà kùdìbo kwambabò ne: "Bwikilà mukana! Wèwè udi wenza mutooyi mupitèpitè búngì."

<sup>117</sup> Kàdi ùvwa mushìikile. Bu Yèyè ànu mudìdinge mupite, kàvwa mufwànyine kupeta mungà mpungà nànsha. Nànsha

twètù pèètù; eci ncifwànyine kwikala dilòlò dyà ndekeelu. Dishiiikila! Kwelayè lubilà lukolè ne: “Éyi Yesù!” Nànsha uvwa mumwambile bwà kwimanayè awu mwikàle nganyì, wakeela ànu lubilà byà mwomùmwe, mùshindù awu díyì dyènda ditàmba kubànda bikolè. Pàakamwambilàbo bwà kupùwayè, byàkamwenzeja bwà kubàndishayè díyì. Úvwa mushiiikile. Kakùvwa muntu uvwa mwà kumwimanyika to. “Wèwè Mwànà wa Davidi, ikàlàku naanyì luse!” Ki kwelayè mbilà mikolè mu dishiiikila.

118 Ne Mwànà wa Nzambì, mwikàle ne mpèkaatù yà bàà pa buloba pa makaaya Èndè, mutàngile ku Yelusàlemà bwà kalàmbudiibwakù, ànu díbà adi mene, bu mulàmbù bwà bàà pa buloba, e kwimana mu njila Wendè awu. Dishiiikila, lubilà lwà dishiiikila, lwàkiimanyika Mwànà wa Nzambì. Yèyè kwamba ne: “Udi muswè bwà Mémè kukwenzela cinyi?” Kaa!

Yèyè ne: “Mukalenge, bwà ngaamòna mwà kupeta lumònù lwànyì.”

Yèyè ne: “Kwàta njila ndààku, diitabuuja dyèbè ndìdì dikusungila.”

Aci cívwa cikòse bwalu. Dishiiikila! Díbà dìdì dishiiikila diikàle dyà kupeta cintu kampànda, dilenga ànu dyà ditàmbe bukesè dyà ditekète, diitabuuja dìdì dicikwàta. Nwamònu anyì? Yèyè kàakamba ne: “Mpindyewu anjì indilà kakesè, anjì indilà kakesè, shààla mukwàte kakesè mwaba awu, ngànjì mmonèbi ní ndi mwà kumòna mpindyewu. Kacya ncutukù mwanjì kumòna byanza byànyì to, kùkaadi bidimu byàbùngì. Tùmonèbi ní ndi mwà kubimòna. Ncyèna mwanjì kumòna cintu nànsha cìmwè to.” Pàakambà Yesù ne: “Diitabuuja dyèbè dyàkusungìdì,” aci cívwa cikòse bwalu. Ki cyònsò cívwaye muswè.

119 Dishiiikila dìdì dìbiiikila cyena-bwalu, ne díbà dìdì cyena-bwalu, nànsha bàmba ne ncitekète bìshi, bàdi bàcyàkidila, ncítàbùùjibwe ànu díbà adi mene, bwalu diitabuuja dìdì dikwàta pàdì dishiiikila munkaci mwà kudisàkila. Nwamònu anyì? Dinanga didìmu dìdì dìbwelakana naaci ne dicifikishakù. Dishiiikila dìdì dicyènza.

Mpofò Baatimààyò wàkabàkula cikèènà-kumòna aci ne lùkàsà lwònsò.

120 Peetèlo, úvwa mubolè yònsò bolabola, dilòlò kampànda pa mbù, díbà dyàkashiiikilàye. Ke kubangayè kwela mbilà ne: “Kùdì cintu kampànda cìdì kacìyì mu cyòcì to. Ndi mmòna mukishi ùlwa, wènda mutàngile kùndì!” Mázuwà àvwa pabwípì ne kudiina. Yèyè kwamba ne: “Ní ng’Wèwè, Mukalenge, tuma díyì bwà ndwe Kùdì aku pa màyi.” Ki kupàtukayè mu mázuwà e kwassayè lwendu; ki kukwàcikayè bwòwà pàakabangàye, e kubangayè kutùkina mu màyi, ne dishiiikila. . . Nànsha mùvwà cilema cyenzèka, mu kuteeta kulonda mèyi matùmà à Nzambì awu, . . . Ndi ntèkemena ne èkèleeziyà udi wùmvwa cyòcì aci.

Muntu awu ùvwa wènzà cìvwà Nzambì mumwambile bwà kwenzayè.

<sup>121</sup> Mpindyewu, wèwè mwena Kilistò dilòlò edi, udi mu njila wa mudimu, uteeta kulonda bulombodi bwà Nyumà Mwímpè; kàdi kànsèrè kukukwàtakù, anyi lu—lufù kukukwàtalù, kànsèrè, cyádi, ní ncinyi cyónsò aci. Mu njila wa mudimu, udi ne bukenji bùmwebùmwe bwákadi naabù Peetèlò abu.

“Mukalenge, nsùngilèku, pàtupù ndi mfwa.” Mu dishiikila amu wàkeela lubilà lukolè, ki cyanza koololokaci e kumujuulaci. Wèwè udi ne cintu cimwècimwè aci. Kàdi yèyè wàkeela lubilà lukolè ne: “Nsùngileku, Mukalenge!”

Yèyè kuumvwa lubilà lwànyì lwà dishiikila alu,  
Kumpàtula mu màyi, mpindyewu ndi  
mukùbìibwe. (Nwamònu anyi?)

<sup>122</sup> Ki cyòci aci, paùdi wela mbilà mikolè!

<sup>123</sup> Pàmwàpa mukàji ewu, maamù, cyónsò cìvwàku bwèndè yèyè aci, mwànà mukesè wa balùme, anyi mwikùlwèndè, anyi mwànà wa mwanàabù, cyónsò cìvwàku aci, wàkeela mbilà mu dishiikila. Nzambì kuumvwa.

<sup>124</sup> Pashiishe tudi tujandula ne, mu ditùkina amu, Nzambì wàkamuumvwa. Mu njila wa mudimu, wàkabanga kudiina mu màyi. Yèyè's ùvwa mwenzè cilèma. Nànsha wèwè mwenzè cilèma, aci kacyèna ne cidici cyènzà to. Twètù bònsò's tutu twàpangila. Tudi dipangila, ànu kwìnè kwònsò aku. Kàdi tudi ne Kàmpànda mwimàne mpindyewu ne cyanza cikolè, Udi mwà kutòolwela cyanza ne kutùpàtula kumutù kwà màyi awu.

<sup>125</sup> Pawikalà mwenzè cilèma, mukàji kàmpànda yèyè mwenzè cilèma, muntu mulùme kàmpànda mwenzè cilèma, nsongàalùme kàmpànda anyi nsongàakàji mwenzè cilèma; kùdiinyi to. Elà lubilà lukolè, mu dishiikila amu ne: “Mukalenge, nsùngilèku, cyanàànà ndi mfwa!” Shààla mushiikile bwà bwalu abu. Nzambì neàkuumvwè. Yèyè ùtu misangu yònsò ànu ùmvwa musùukà mushiikile. Ke cìndi nteeta kunwàmbila ncyòci aci.

<sup>126</sup> Mukalenge wetù Yesù munanga, Yèyè mwinè, mu cyalu cyà mvità citàmbe bunène cyà pa buloba, Getsèmànè, Wàkeela lubilà lukolè, mu dishiikila. Bìvwa bikèngela bwà Yèyè kwangata mpèkaatù yà bàà pa buloba, anyi Ùvwa mwà kushààla ànu pa buloba ne bayiidi Bèndè bananga, ciine cìvwàYe muswè kwenzà aci anyi? Kàdi tàngilàayi didìpwekesha Dyèndè mwàkadìpwekeshaYe ne: “Diswa Dyànyì to ànu diswa Dyèbè dyènzekè,” kuDìpwekesha Yèyè mwinè ku Dìyi, Dìyi dilaya dyà Nzambì wa mu Dyulu.

Mònaayi ne, dìbà adi, Wàkaya ntàntà mule ndambù. Nènku piikalàYe wàkaya ntàntà mule ndambù, mmunyi mutùvwà mwà kutàmbe pèètù kuya ntàntà mule ndambù. Nwamònu anyi? Nènku mònaayi ne, Mufundu ùdi wàmbe



mwaba ewu, mu Luukà, ne Wàkasambila mufwilekù. Mwanèètù wa balùme, mwanèètù wa bakàji, piikalàbi ne byàkakèngela bwà Yesù àsambilè mufwilekù, ambàaku tǔng mutwàtàmbà pèètù kusambila bafwilekù's! Piikalàbi ne Kilistò, Nzambi wa mu Dyulu awu, muvwijìbwe mubidi, byàkakèngela bwà kusambilayè mufwilekù, díbà adi nebitambè kwikala bìshi bwètù twètù bangènzàmpèkààtù basùngila ku ngàsà aba, bwà kusambila bafwilekù! Piikalàbi ne—piikalàbi ne dipàngadika dyàkakùpa Mwànà wa Nzambi mu dishiikila, ncinyi cyàkwenzelàbi wèwè ne mèmè? Ne dishiikila dyònsò tudi ne cyà kwela mbilà.

<sup>127</sup> Nzambi, mu matùkù à ndekeelu aa, mmuDimweneshe ànu menemene kutùdì, ku bimanyinu Byèndè binène ne bukolè Bwèndè, bìvwa ne cyà kutùvwija bashiikile. Ncyà bushùwà. Ne diswa Dyèndè bwà kutwòndopa ne kutùsùngila, bìvwa bikèngela kutùkùpadi twètù bònsò mu dishiikila dyà kufika ku Dibwe dyà dyondopa adi. Ncyà bushùwà.

<sup>128</sup> Tààngilàayi, bu Florence Nightingale . . . Kankànunwinà kàà Florence Nightingale ufwile wàkabanga Nkùrusè Mukùnze awu. Nuvwa bamòne fòtò wèndè mu mukàndà, ùvwa ne bujitu bwà kilò mitwè ku dikumi ne yisàtù. Kànsèrè kàvwa kamukunye kafitùle. Mu Londres, mu Angleterre; bàvwa bamutwàle buumukila nèndè mu Àfrikè, balwè nèndè ku Londres, mu Angleterre. Nènku mwaba awu mu dishiikila . . . Mwanèètù Bosworth kumwandamunayè mu mukàndà ne kumwambila, wàmba ne: “Katwèna mwà kulwa ku Àfrikè to.”

<sup>129</sup> Yèyè kufùnda kwandamuna, wàkapeta mungàngà mukàji bwà kufùndayè wàmba ne: “Ncyèna mwà kunyungishiibwa to. Ncyèna mwà kucyènza to.”

Kuleejayè fòtò. Nudi bamòne fòtò. Cikòlà tuvwa ànu ne cyà kubwilapu kalàmbà kakesè. Ùvwa ànu ne tukàbà tukesè tudijìngila. Mèmè kudyàmbidila ne pàngà apa muntu kampàndà, mèmè mumwèlè mu mukàndà, mufwànyine kumudyula bwalu ùvwa . . . mubidi wèndè ùvwa mwadija mwaba awu, nàнку . . . ke twètù kubwikila kantu kakesè pambidi pèndè *apa*. Yèyè ùvwa ànu ne—ne kakùsu kakesè, ditwàyà ditenteka pamutù, dicỳàmàkàne pa cimònù cyèndè apa. Kàdi lwà kuulu eku, kakùvwa cintu nànshà cimwè to. Kàdi nànsha nàнку . . . Twakadyàmbidila ne tuvwa ne cyà kutenteka kabèji kakesè mwaba awu ne kumukwàta fòtò . . . Kucikwàta fòtò. Cidi cilama bantu bàdi kabàyi ne ngiimànyinù mulenga mu ngeelèlù wabò wa meeji, bwà kabiiikadi bààdyula bwà diteèka dyà fòtò awu mu cibèjibeji amu.

<sup>130</sup> Kàdi pashiishe pààkambà ngàngàbukà ne kabèèna mwà kumunyungisha, ne yèyè pèndè mumanyè ne mvwa ne cyà katwà makàsà mu Angleterre, wàkabènzeja bwà kumutèèkabò mu kalààlù kàà dyambwila babèedi, ne kuya nèndè ku ndèkè, ne

kumufikisha ku Londres, mu Angleterre, ne kutùma mulami pambèlu ku ndèkè kumpàla kwà kuya ku Buckingham Palace, kutùma mulami pambèlu apu bwà kulwa kumusambidila. Kàdi ùvwa muyè muyiilèmu menemene mu mùshindù wà ne kàvwa nànsha mwà kwakula naanyi to. Byàkakèngela bwà kujuulabò byanza byèndè bwà kubitèèka mu byànyi.

<sup>131</sup> Nudi bamanyè mùdì Londres amu, bàmwè bàà ku nwènu bàsàlaayi bàvwa kuntwaku. Kùtu misangu yònsò cibungibungi. Ki mèmè kutwa binù mwaba awu ku luseke lwà dididiishi, ki yèyè. . .

Binsònji bìvwa bìpweka. Ùvwa ùjinga bwà...Ncyèna mumanyè mùshindù wàkapetàye citeleela cìvwa mwà kupàtwisha binsònji to. Cìvwa ànu mifùbà pa mifùbà, ne dikòbà dilamàtepu; ne yèndè—yèndè mikòlò lwà kuulu eku lwà mu cimònu emu kamùvwaku mufwànyine kwikala mupita, ku dyànyi dimòna, bu ntàntà wa centimètres yìtaanu anyi mwandamutekète ne citùpà to. Mijilu yèndè yìvwa myuminyine. Mùshindù mwine ùvwaye ne mwoyi, ke ùndi nciyi mumanyè to. Nudi bamòne fòtò wèndè pashìshe.

<sup>132</sup> Mèmè kutwà binù ku luseke lwà bulààlù. Mpindyewu, ùvwa mushiikile; nànsha bu mèmè mwà kulwa anyi to, bàvwa ànu ne cyà kumutwàla, mu mishindù yònsò. Ki mèmè kupweka kuntwaku, mwoyi wanyi ùvwa ùzòna mashi munda mwanyi, bwà diitabuuja dyà cìfùkùlùbwà cikesè cikwàte ne byà luse, cìvwa cìpunga ne lufù aci, ki mèmè kusambila ne mwoyi wònsò wùmvwà naawù awu. Kàdi pangàkabanga kusambila, ke kanyuunyi kakesè kàà nkuci kulwakù, kàbùùka kùkila pa dididiishi, kàbanga kààbànda kààpweka, kènda kàdila. Mèmè kudyàmbidila ne cìvwa nciimùna. Nciivwa mfikilaku mu Angleterre kukaavwa bu dìbà dimwè nànkù awu, nciifuminaku ànu ku cipalu cyà ndèkè kuntwaku. Ki mèmè kudyàmbidila ne cìvwa nciimuna. Kàdi ndi mwenze ànu njuuka, ne ngàmba ne: “Amen,” yèyè kubuuka e kuya.

Ki mèmè kubanga kukonka bàna bèètù abu ní, bàvwa bumvwè nkuci awu. Nènkù bàvwa bààkula bwèndè yèyè, kàdi pangàabàngì kwamba ne: “Nuvwa bamòne, cìvwa nyuunyi wa nkuci awu ùswa kwamba. . .” Kupàtukakù ne: “EMU MMÜDÌ MUKALENGÈ WÀMBA, newikalè ne mwoyi ne kwàkufwà to.”

Nènkù ùdi ne mwoyi leelù ewu. Bwà cinyi? Dishiikila. Dishiikila dyàkafikisha mukàji bwà kushàalayè mutwè makàsà panshi, kwikala ne mwoyi anyi kufwà. Dishiikila dyàkacìlongolola bwà yèyè kubwela muntwamu pa dìbà dimwèdimwè dingàakabwela adi. Nènkù cimanyinu cyà kùdì Nzambi, Yèyè wàkatùma nkuci, bwà kufila EMU MMÜDÌ MUKALENGÈ WÀMBA. Mushiikile's!

<sup>133</sup> Pàvwà mwanèètù wa bakàji, mukùlumpè Hattie Waldrop wa mu Phoenix, mu Arizona awu, ùvwa wènda ùlwila mu

kàà makàsà, mu disangisha dyànyì dyà kumpàla. Beena mu dīkù ne bàyendè bàvwa bàlwa nendè; ne kànsèrè kàà mwoyi. Ùvwa mwàngàtè dipàngadika dyèndè, mu kuteeta bwà kulwa kuntwaku mu disangisha amu, kàdi ùvwa ùsaama bibì be mu mùshindù wà ne ùvwa . . . kàvwa mwà kweyela kàbidì to, mashi àvwa àmacila paanyimà mu mwoyi wèndè mwaba ùvwa kànsèrè aku kadyè mu mwoyi wèndè amu. Mpindyewu, kànsèrè kàà mu mwoyi aku! Aci's nkùkaadi bidimu bitwè ku dikùmi ne mwandamukùlù, dikùmi ne citèemà, pàmwàpa makùmi àbidi, mùvwa mmu cidimu cyà 1947.

<sup>134</sup> Mpindyewu, kwambilayè bàyendè ne beena mu dīkù dyàbò ne: “Mémè mufwè mu njila emu, nùye naanyì kuntwaku.” Dishiiikila. Kujimijayè lungènyì. Ncyèna ngèèla meeji ne ùvwa mufwè to; ùvwa wàmba ne ùvwa mufwe. Mpindyewu, ùvwa mufwànyine kwikala mufwe. Yèyè ùdi mwà kuumvwa mukàbà wà mèyì ewu, nudi numòna's. Mpindyewu ndi—ndi—ndi . . . Yèyè, mukàjì awu ùvwa mwàmbè mùvwàye mufwè; ncyèna mumanyè to. Bàkangambila ne: “Kùdi mukàjì mumanè kufwa ènda bàbànda nendè mu mulongo emu.” Nèku pàakalwa mukàjì awu, kàvwa ne mwoyi to. Nèku pàakamufikishabo kuntwaku, Dìyì dyà Mukalenge dyàkalwa; ki mémè kuya kamutentekela byanza, ke yèyè kubiiika e kwalukila kumbèlu, wènda ùtwa ngendu. Eci kùkaadi bu, mùndi mwà kwamba, bulubulu, bidimu dikumi ne mwandamukùlù, ne ùdi ne mwoyi ne ne bukòlè bwà mubidi . . . Yèyè neikalè ku Tucson bwà kutwilangana naanyì pàngàafikà kuntwaku. Dishiiikila dyà ne: “Nànsha mémè mufwile mu njila kàdi, nànsha nàнку, mfikishaayi kuntwaku. Yèyè wàkondopa bakwàbò, Yèyè neàngòndòpè.” Ùjinga!

<sup>135</sup> Enzàku ne mwoyi yètù yikale myùlè ne disànkà munda mwà ditùkù edi, ne mifwileku, kàbidì mu dishiiikila. Paanyimà pàà katanci kakesè dībà dīdi mwà kwikala dimanè kuya.

<sup>136</sup> Yayilò musangu kampànda ùvwa ne mwànà wa bakàjì mutekète uvwa ùpùnga ne lufù. Ùvwa mwena kwitabuuja wa ku mikàlù. Ùvwa mwitabùùje Yesù, kàdi ùvwa ùcìina bwà kucitonda, bwalu bàvwa mwà kumwipata mu nsunàngòngà. Kàdi ngàngàbukà kulwa mu dīndà kampànda, wàmba ne: “Mwànà ùkaadi ùpùnga ne lufù mpindyewu.” Dishiiikila kubweladi. Kàvwa mwà kucitwa cyàdi to, bu kaaba kèndè, bwà kumujiikilabò ne Yesù wa mu Nazàlèetà, bwalu yèyè ùvwa mufwànyine kujimija kaaba kèndè bu mwakwidi.

Kàdi ndi nzwàmbila ne, pàakalwà bwalu bwà cìmpicìmpi, cyàkamukùpa ku dishiiikila. Ndi mwà kumumòna wènda ùkèbe kaankooci kèndè kàà muyiishi aku ne cifulu, ne ùkeela pambidi. Ki yèyè ewu wènda ùpicila mu musumbà wa bantu, wènda ùnyunguluka; mwaba ùvwa mukàjì kampànda ùlenga ànu civwalù Cyèndè, ne bikwàbò, ne bònsò bàvwa bèèla mbilà. Kàdi kubwelayè e kwamba ne: “Mulongeshi, mwanàànyì wa bakàjì mutekète mmulààle wàmba kufwà. Mulongeshi, Mulongeshi,

mwanàanyi wa bakàji mutekète mmulààle wamba kufwà, nènku bu Wèwè ànu mwà kulwa kamutentekela byanza Byèbè, yèyè neikalè ne mwoyi.” Kaa, ekèlekèle! Dishìikila’s didi dikufikisha ku dyamba bintu misangu mikwàbò, dikwenzeja bintu. Didi dikufikisha ku dyanza cyenzi. Mwanèndè wa bakàji wàkasungidiibwa ku dishìikila.

<sup>137</sup> Twikalàayi bashìikile, bu mùvwà mukàji uvwa mashi àlwa munda awu. Bible mmwambè ne wàkatùùla mfrangà yèndè yònsò, ku bangàngàbukà, kàdi nànsha nànkù kabàvwa mwà kumukwàcisha to. Ukaavwa mubangè cikondo cyà kàciyi ùya ku cijila to, bwà kupaasalala, ne mashi àlwa munda, kàdi kaàvwakù mwà kwimana to. Bàvwa pàmwàpa basùmbishe ferme, tumpundu, tubalù, ne cyònsò civwàku aci; ne cintu nànsha cimwè kacivwakù mwà kumukwàcisha to. Nènku baakwidi bààbò bàvwa bamwambile ne kùyi mwaba ùdi byà nànkù awu to. Kàdi dindà kampànda e kutàngilayè kwinshì kwàka. Úvwa musòmbèle ku mwelelu wà màyi aku, kwàka kùvwà ferme wèndè ùsanganyiibwa aku, e kumònayè musùmbà munène wà bantu munyungùlùkile Muntu kampànda kwinshì kwàka, ki kwambabò ne: “Cyàcyà ncyinyi?”

Yèyè ne: “Awu n’Yesù wa mu Nazàlèètà.” Dishìikila kubweladi.

Yèyè ne: “Mémè ndi bu udi kàyi ne musinga to. Ndi—ndi... Kàdi bu mémè ànu mwà kulenga luzemba lwà civwàlù Cyèndè, nèngòndopiibwè.” Kàdi wàkapicila ku kadiwù kònsò ne bintu bikwàbò byònsò. Kàdi pashìishe kufikayè pa kaaba aku, kulengayè civwàlù Cyèndè, mu dishìikila.

Nènku pàakenzàYe nànkù, Yèyè kukùdimuka e kwamba ne: “WàNdengì awu nganyi?” Ke bònsò kucivilabò. Kàdi Yèyè kukènzakana. Yèyè ùvwa ne dipà dinène dyà Nzambi. Yèyè ùvwa Nzambi; ki kusanganaYe mukàji mutekète awu ne kumwambila ne mashi èndè àvwà àlwa munda awu àvwa yimànyi. Dishìikila dyàkasàka mukàji awu bwà kwenzayè nànkù.

<sup>138</sup> Civwa ndishìikila dyàkasàka—dyàkasàka mukalenge mukàji wa ku Sud. Wàkumvwa ne dipà dyà Nzambi divwa dikwàcila mudimu kùdi Solòmò. Dishìikila dyàkamusàkà ku cyòci aci.

<sup>139</sup> Ne dishìikila dyònsò! Ki bantu mbòbò abu, bu nwènu, bu mémè kùnu. Kabàvwa bashìilàngàne ní nènù ne mémè to. Bàvwa ne byumvwilu bitaanu. Bàvwa bàdya, ne bànwà, ne bikwàbò, ànu mutùdi twenza emu, biikàle ne mwoyi ne tufwa. Bàvwa bantu.

<sup>140</sup> Cyàkamusàka mu dishìikila dyà mu mùshindù wà ne wàkashiya bukalenge bwèndè. Cyàkamusàka pa kaabà kàà ne yèyè kààkatùmakù meeji ku beena Yishimàèlè bàvwa mwà kumwiba mu cipèèlè amu to, wàkenza matùkù makumi citèemà paanyimà pàà kaamelù ùsambuluka Cipèèlè cyà Sahara. Dishìikila’s! Údi wènda ùya ànu kuya, nànsha byà munyi. Nènku pàakafikaye kuntwaku, kakùvwà cintu nànsha cimwè

cisokoka Solòmò to kàdi wàkamwambila bintu bìwwaye muswè bwà kumanya abi. Dishiiikila! Yesù wàkamba ne: “Neàjuukè mu Ditùkù dyà Cilumbulwidi, ne lukòngo elu, ne nealùpiishè, bwalu mutàmbe Solòmò ùvwa mwaba ewu.” Dishiiikila!

<sup>141</sup> Bwà kujikija ndi mufwànyine kwamba nùnkù ewu. Àbìdi àdi panshì aa, mu Mexique mwàmwa, mvwà mumòne cintu kampànda cyà dishiiikila. Mvwa mubande ku cibumbà cyà ku cyambilu, kuntu kwàka mu cipalu cyà manàyi, ne bantu bàvwa muntu amu kwambwila ku dībà citèemà jaajaaja mu dindà amu, nènku tukààvwa dībà bu dikùmi jaajaaja nànkù dilòlòlò adi. Muntu mulùme mukùlakàjì mpofo, dilòlòlò divwà didyànjiile adi, mwikàle mpofo ànu wetù wa menemene ewu munda mwà bidimu bitwè ku makùmi àsàtù, kupetayè lumònù lwèndè, ne ùvwa wènda ùnyungùlùka mu cimenga aci ditùkù adi munkacì mwà kufila bujaadiki. Mpelu wa kale wa bilàmbà, mutèeka wa bule bwà mètres makumi àbìdi ne mwandamutekète, anyi makumi àsàtù ne àsambòmbò, bule *abu*, ànu écharpes yà kale. Kùvwa pàmwàpa bantu binunu makùmi ànaayi, anyi makùmi àtaanu kuntwaku. Ne bifulu byà kale ne écharpes, mwenabi ùvwa nganyi, ndi ngèela meeji ne bàvwa mwà kwangata adi dipàngadika munkacì mwàbò. Nènku kùvwa kùupumuka mvùla.

<sup>142</sup> Kì kumpwekeshilabò ku mwònjì, pamutù pàà cimanu, ki mémè kupweka pa cibumbà cyà ku cyambilu. Mwambi awu... Muntu udi musòmbe apa ewu, mbamutwàle... Yèyè ne mwanèndè wa bakàjì mbafùmìne ku Michigan kùkaadi ndambù wa tusunsa, bàakula bwà Mwanèètù Arment. Tudi tumuvùluka kaaba aka. Ùdi mu misèèsù yà mu Butumbi dilòlòlò edi. Mwanèètù Arment ùvwa mwaba awu, ne kuumushayè cinkooci cyèndè, e kwimanayè mu mvùla amu, e kucipèèshayè Mwanèètù Jack Moore bwà kucilwàtayè, bwalu Jack ùvwa ùzakala mashika. Muntu wa ku Sud awu ùvwa mwàmbe kuuminyina ne mashika mu mvùla wa mashika mu Mexique amu. Kì yèyè awu mwimàne mwaba awu.

<sup>143</sup> Ke Billy Paul kulwayè kùndi, mwanàanyi wa balùme awu, e kwambayè ne: “Papa, nebikèngele bwà wèwè kwenza cintu kampànda. Kùdi mukàjì mukèsè wa beena Mexique kwinshi kwàka ne mwànà mufwè mu dindà emu. Ncyèna ne baawisiyè búngì bukumbàne bwà kuumumusha mu mulongo to.” Piikalàbi ne kutentekela kwà mpofo awu byanza kwàkamupèèsha lumònù lwèndè, kutentekela kwà mwanèndè wa mu dibòko uvwa mufwè awu byanza kùvwa mwà kumupèèsha mwoyi wèndè. Ùvwa mwena Kàtòlikè. Nènku, yèyè, kabàvwakù mwà kumulaminyina paanyimà to.

Nènku Mwanèètù Espinoza ne bakwàbò abu bàkaavwa bamwambile ne: “Katùcyèna kàbìdi ne twartà twà disambila to. Nebikèngelè windilè too ne dilòlòlò dikwàbò.”

<sup>144</sup> Yèyè ne: “Mwanàanyi wa mu dibòko mmufwè. Mmufwè

kubangila ànu mu dindà emu. Ndi ne cyà kubwela muntwamu.” Nènku ùvwa munkaci mwà kulwa, ikalè nè kartà kàà disambila anyi kàyì naakù. Ke kweleshabò ba wisiyè batwè ku nkàmà yisàtù mulongo kuntwaku. Nènku yèyè ùvwa mwà kubàpicila mwinshì mwà mikòlò yàbò amu, ne kubàtùpikila paanyimà pààbò apu, ne ùnyemakana ne mwànà mufwè awu, ne ùkùluka munkaci mwàbò amu. Aci kacivwa ne civwàci cishintulula bwèndè yèyè nànsha; yèyè ùvwa ùjinga kufika kuntwaku. Ùvwa mushiikile. Nzambi ùkaavwa mwakùle ne mwoyi wèndè, ne: “Nzambi ùvwa mwà kufila lùmònú awu, ùvwa mwà kufila mwoyi.” Kaa, ekèlekèle! Yèyè’s ùvwa mushiikile. Cintu kampànda civwa munkaci mwà kulàkuka kapyà munda mwèndè.

<sup>145</sup> Kaa, nwènù babèèdi, bu nwènù mwà kulekelakù aci cilàkuka mudilu munda mwènù bwà ndambù wa tusunsa, kàdi kutàngila cidì cyènzekà, dishiikila dyà mùshindù awu. Nzambi uvwa mwà kwondopa mwànà mukesè wa balùme ewu dilòlò adi awu, uvwa mwà kwondopa inàbànza uvwa ne kànsèrè awu, kwondopa muntu ewu, ne kwenza cyòci eci, Mandemwàzèlè Florence Nightingale, kaa, makùmi à binunu’s! Yèyè, aci, cileeji cyà kaciyi mwà kwela mpatà to; ùbiisha bafwè, ne wòndopa babèèdi, ne bikwàbò byònsò. Piikalàbi ne Yèyè ùdi Nzambi, ùdi mwà kwenza cyòci aci; Yèyè ùdi Nzambi makèèlèlè awu, Yèyè ùdi Nzambi leelù. Bwela wèwè ànu mu dishiikila, dībà adi neufikishe cintu kampànda ku dyenzeka.

<sup>146</sup> Pashiishe mu dishiikila adi, ki kushààlayè ànu ùlwijakaja. Mémè kwambila Mwanèètù Jack Moore, mémè kwamba ne: “Yèyè kī mmumanyè to. Kacya kàtu mwànji kummòna to. Kī mmumanyè ne nganyi mwinè udi pa cibùmbà cyà ku cyambilu apa to. Mukàji mutekète wa cyena-Kàtòlikè awu, mpindyewu, kàvwa mwà kwakula mwàkù wà Anglais nànsha ùmwè to, pa nàнку mmunyi mùdiyè mwà kumanya ne nganyi awu?” Mémè ne: “Pweka ndààku, ùsambidile mwànà awu, nènku aci necimusànkishè, ne yèyè neàtùngunuke.” Kwambayè ne: “Kàdi kacya kufikisha . . .” Civwa ànu mutooyi wà kacya wàtùngunuka kuntwaku. Ùvwa mwà kutùpika, ne bantu bònsò bàvwa ànu bèèla mbilà mikòlè. Ùvwa mwà kubàbànda pa makaaya apu, ne kukùluka panshì munkaci mwàbò amu. Ùvwa mwà kupetakù ndambù wa ntàntà wa makàsà, ne pashiishe bàvwa mwà kuteeta kumwaluja paanyimà; kàdi ki yèyè ulwàlwa ewu ànu munkaci mwà mikòlò yàbò mene amu, mukwàte mwànà wa mu dibòkò ewu, ùtácisha baawisiyè ne bikwàbò byònsò. Kabivwa ne civwàbi bishintulula to, yèyè mukàji awu ùvwa ànu wènda ùbànda kumpàla aku. Yèyè ùvwa ne cyà kufika kuntwaku! Kacivwa ne civwàci cishintulula to, yèyè ùvwa ne cyà kufika kuntwaku. Kupetayè mwambi . . .

<sup>147</sup> Mpindyewu aci kī mbwalu bulonda bu bwà mukàji wa mu Sunèmà anyi? Cìkòlà, aci kacivwà cyà kùkaadi bidimu binunu

bisàtù ne nkàmà yìtaanu to. Aci's cìvwa nkùkaadi bidimu bitwè ku bisàtù, anyi binaayi. Nwamònu anyi?

Bàdi mwà kwikala cintu cìmwècìmwè aci dilòlò edi. Pàdi dishiikila òmwèdimwè adi òjuukà, nedikupè dinanga ne diitabuuja kumpàla kwàka ku mwalu wà mvita aku, bwà kunana cyùdi muswè aci, bwalu mmulayi wà Nzambi bwà ne udi mwà kucipeta. Ncyà bushùwà menemene.

<sup>148</sup> Mémè kukùdimuka; mémè, mwambi ewu, anyi mutangadiki mwinè mwaba awu. Mémè kukùdimuka. Mémè kuumvwa luse bwà mukàjì awu, kàdi kakùvwa dishiikila to. Nwamònu anyi? Mémè kukùdimuka e kudyàmbidila ne: “Èè, Mwanètù Jack neàmùsambidile, nènku aci—aci's ncikòse bwalu.” Mémè kukùdimuka. Mémè kwamba ne: “Mùmvwà ngààkula mpindyewu amu, diitabuuja. . .”

Ki mémè kutàngila pambèlu apu, ke cikèènà-kumòna eci pwàà. Mémè kumòna mwànà mukesè wa mu dibòko musòmbè mwaba awu, mwànà mukesè wa mu dibòko wa kwisù kufiike, wa cyena Mexique kàyì ne mènù to. Mwikàle ùnsekeshà, musòmbè mwaba awu. Mémè kwamba ne: “Anjì indilà kakesè. Anjì indilà kakesè.” Dishiikila dyèndè dyàkasàka Nyumà Mwimpè bwà kushintulula cyena-bwalu cyànyì, kushintulula mèsù ànyì ne kundeeja mwanèndè wa mu dibòko musòmbè mwaba awu. Aci kwalujaci Nyumà. Mémè ne: “Anjì indilà kakesè. Anjì indilà kakesè. Ntwàdilaayi mwànà awu.”

Ki yèyè ulwàlwa ne mwànà wa mu dibòko ewu, mubole mvùla, bilàmbà bimata màyi, kambùlankètè kàà bleu ne katòoke, kànà kakesè, kafwè kipacila bule *ebu*. Kudishindayè panshì, ne nkùrusè mu cyanza cyèndè, anyi ne lùnzàadi, bwà kwamba “Myôyi Màriyà's.” Mémè kumwambila ne: “Mujuulaayi kuulu, aci kacyèna ne dikwàcisha to.”

Ki kuseemenayè pabwìpì ne mwaba wùmvwà awu, ne kwelayè mukunda ne kwelayè lubilà lukolè ne: “Padre,” mbwena kwamba ne, “Taatù.”

Mémè ne: “Kwàmbi nàнку to. Kwàmbi nàнку to. Udi witabuuja anyi?” Ki yèyè kumwambilaci mu ci-Espagnol, yèyè ùvwa mwitabùùje.

“Èyowà,” ùvwa mwitabuuje. Kumukonkayè mùshindù ùvwàye mwà kwitabuuja. Yèyè ne: “Piikalà Nzambi mwà kupèèsha muntu mukùlákàjè awu lumòndò lwèndè, Yèyè's ùdi mwà kupèèsha mwanàànyì wa mu dibòko ewu mwoyi.” Amen. Dishiikila dyàkamufikisha ku cyòci aci. Kì ncintu cyà mémè mwenze to; mvwa mumòne ànu cikèènà-kumòna.

Mémè kwamba ne: “Mukalenge Yesù, mémè ndi mumòne cikèènà-kumòna cyà mwànà mukesè wa mu dibòko, mmufwànyine kwikala ewu nùнку's.”

Ànu bu pa dîbà adi kutuutayè makàsà panshì, kwnzaye ne: “Wha! Wha! Wha!”

Mémè kwamba ne: “Mulondàayi ne kwà ngàngàbukà. Angàtayi dîyi difùnda dyà kùdi ngàngàbukà dyà ne: ‘Mwànà awu ùvwa mufwè.’” Nènku ùvwa . . . ngàngàbukà kufùndayè dîyi adi ne: “Mweyelu wà mwànà awu, mwoyi wàkiimana mu dindà emu, mu birò byànyì pa dîbà citèemà jaajaaja, mufwè disaamà dyà bisùlùsùlù mpitù yìbidì.” Kaa, mwànà wa mu dibòkò awu ùdi ne mwoyi mu Mexique dilòòlò edi, bwà ku dyànyì pàanyì dimanya. Bwà cinyì? Dishìikila adi dyàkabwela mu mwoyi wà maamù mutekète awu, ùdila mwadi bwà mwanèndè, ùvwa mumòne Nzambi wènza . . . wòndopa mèsù à muntu mpofo, ne mumanyè ne Yèyè ùvwa mwà kubiisha mwànà mufwè awu.

<sup>149</sup> Dishìikila’s! “Paùdi uNkèba ne mwoyi wèbè wònsò, dîbà adi Nènkutèèlèjè.” Nwamònu anyi?

<sup>150</sup> Bukalenge! “Mikenji ne bapròfeta byàkadiku too ne ku Yone. Kubangila ànu apu, Bukalenge bwà mu Dyulu mbuyiishìibwe, ne bantu bàdi bàlwangana bwà kubwelaMù.” Kwènà ànu wimana cyanàànà kàdi kwamba ne: “Ngambwilèku lwà ku nshìngù wa nkoolù eku, Mukalenge, ùmbwèjèmu to.” Udi ulwangana bwà kubwelaMù. Udi ushààla mushìikile, pankaci pàà Mwoyi ne lufù.

<sup>151</sup> Mvw’a njinga ngìkalakù ne dîbà bwà bukwàbò bwalu-bulonda, búmvwà munkaci mwà kwelanganapù meeji ànu mpindyewu mene, bwà mukàji kampànda, mwànà wa bakàji kampànda, uvwa mulondè njila mubi, ne mùvwàye mupàngàdikàpàngàdike bwà kubangulula nsombelu ne bikwàbò amu, mu mùshindù wà ne mémè kwamba ne: “Mwanèètù wa bakàji . . .”

Kujuukayè kuulu e kwamba ne: “Ndi—ndi ngìtabuuja ne nèngùmvwè bìmpè.”

Mémè ne: “To, to! Shààla mwaba awu.”

Nènku dîbà adi, dyàkààleelù ewu anyi, kutwàdijayè kusambila kakesè, dyàkàmwè kubangaye kubàndisha dîyi ne dyènda dibànda bikolè. Paanyimà pàà katanci yèyè kubwela mu dishìikila, kwambayè ne: “Éyi Nzambi wa yààya, nsùngilèku!”

<sup>152</sup> Lùpitaadi lwà baakanwàyi kalùvwa mwà kumwondopa to. Cintu nànsha cimwè kacivwa mwà kucyènza to. Kàdi mèsù manène, mafìike awu àvwa mantàngile, ne binsònjì bimupwekela pa matàma; kwambayè ne: “Cintu kampànda ncyenzèke.” Kaa, èyowà’s! Èyowà’s, mukalenge! Cintu kampànda kwenzekaci. Yèyè kushìikilayè.

<sup>153</sup> Twìkalàayi bashìikile bwà bwalu ebu; pankaci pàà lufù ne Mwoyi.

<sup>154</sup> Wèwè kùyi mufikè ku dishìikila to, kùlwidi apa to. Pawìkalà mushìikile, lwàkù mwab’ewu ne ùtangilè, wèwè—wèwè newùcipetè paùdi ànu ufika mwab’ewu.



155 Tùsambilàayi. Mu dishiikila indilaayi Bukalenge bwà Nzambi, neBùlwe pambidi pèènu.

156 Taatù wetù wa mu Dyulu, ndi nKulòmba mu Dîna dyà Yesù, ikàlàku neetù luse, Mukalenge. Ne bangà munda mwètù dishiikila. Éyì Mukalenge Nzambi, tùfwìlekù luse, ndi nkulòmba, ne lekèlàku bantu bàKukèbè dilòlòlò edi ne myoyi mishiikile. Tudi bamanyè ne Wèwè udi kaaba aka, Mukalenge. Wèwè udi umweumwe awu makèèlèlè, leelù, too ne kashidi.

157 Nènku mpindyewu swàkù bwà bantu bàdì ne Cimanyinu eci aba, bwà biikalè buumùke ku lufù bayè ku Mwoyi, mbashintùlùke buumùke ku mwoyi wà kale wà pa buloba awu bayè ku mupyamùpyà awu. Bakaadi naawù. Mashi àkaadi malaabiibwe; ne, Nzambi, mmubape cishindiki cyà Cimanyinu. Swàkù bwà bangate Cimanyinu aci mu byanza byàbò, aba bàdì bàsaamà, bàmbè ne: “Mémè ndi cintu cisumba cyà Nzambi. Ndi munda mwà Kilistò, ne munda Mwèndè kamwèna mabèèdì to. Mémè ndi munda mwà Kilistò, ne munda Mwèndè kamwèna mpèkaatù to. Mémè ndi munda mwà Kilistò, ne munda Mwèndè kamwèna bupidyà to. Ndi mbènga byònsò bìdì dyabùlù mungambìle abi. Ndi ngàngata Cimanyinu cyànyì cyà wanyì. . . Wàkatàpiibwa mpùtà bwà dishipa dyànyì dyà mikenji; Wàkazaajiibwa bwà bubì bwànyì; dinyooka dyà ditalala dyànyì dyàkaona pambidi Pèndè; ne ku mibùndàbùndà Yèndè ngàkwondopiibwa.’ Nènku ndi mpindyewu mukwàte Cimanyinu, cyà ne Nzambi mmunganyishe, kiipàcìlà aku, Muntu awu, musùmba ku Mashi à Mukalenge Yesù. Ne ndi mukwàte Cimanyinu cyà lufù Lwèndè mu byanza byànyì, bwalu Yèyè mmubiike cyàkàbìdì ku lufù, ne Mémè ndi Wèndè ne Yèyè ngwanyì. Ndi nya ne diitabuujà diimanyika, bwà ne kuumukila ku dilòlòlò edi, Ndi ngiitabuujà Nzambi, ne nengòndopiibwè pangàáfika kuntwaku ne kukùmbaja mishingà.”

Bwalu, Méyì à ndekeelu àkapàtukà ku mishikù Yèndè awu, àvwa nùnkù: “Bòbò batentèkèle babèèdì byanza, babèèdì nebàsàngalè.” Enzàku nànkù, Mukalenge. Swàkù bwà dishiikila dibwelè, bwalu ndi ndòmba nùnkù, mu Dîna dyà Yesù. Amen.

Ndi mwà kwitabuujà, ndi muswe bwà  
kwitabuujà, ndi ngiitabuujà bulelèlè;  
Ndi mwà kwitabuujà, ndi muswe bwà  
kwitabuujà, ndi ngiitabuujà bulelèlè;  
Ndi mwà kwitabuujà, ndi muswe bwà  
kwitabuujà, ndi ngiitabuujà bulelèlè  
Ne Yesù udi ùngondopa mpindyewu.

Kaa, ndi mwà kwitabuujà, ndi muswe bwà  
kwitabuujà, ndi ngiitabuujà bulelèlè;  
Ndi mwà kwitabuujà, ndi muswe bwà  
kwitabuujà, ndi ngiitabuujà bulelèlè;

Anji elààyibi ànu meeji ne: “Ndi mupàngàdike!”

Ndi mwà kwitabuuja, ndi muswe bwà  
kwitabuuja, ndi ngiitabuuja bulelèlè  
Ne Yesù ùdi ùngondopa mpindyewu.

<sup>158</sup> Nudi nwitabuuja nàнку anyi? “Ndi mupàngàdike! Ndi mupàngàdike, ku ngàsà wa Nzambì ne, ncyàdyàkwimanakù to too ne pàdi Cintu kampànda aci cindenga. Nènku ndi nya kuntwaku bwà kuntentekelabò byanza.”

Mpindyewu, Nzambì kàtukù mutùpangile to. Ne ndi ngiitabuuja ne Ngàngàbukà munène ùkaadi pabwipi mpindyewu. Ndi ngiitabuuja Nzambì wàkafùnda Diyì awu, ndi ngiitabuuja Nzambì wàkafila mulàmbù awu, Mèmè ndi ngiitabuuja Cimanyinu cyà Nzambì cidi citùkezulà ku mpèkaatù dilòòlò edi, Cimanyinu, Mwoyi Wèndè Yèyè mwìnè, ùdi neetù kaaba aka. “Nèngiikalè neenù, too ne ku ndekeelu kwà buloba mene. Mu katanci kakesè emu bàà pa buloba kabààkuMmòna kàbidì to, kàdi nwènù nenùMmònè, bwalu Nèngiikalè neenù, munda mwènù mene, too ne ku ndekeelu kwà buloba.” Nudi nwitabuuja nàнку anyi? Ndi muMweyemene. Ndi ngiitabuuja ne Yèyè neàcyènzè. Kì mmwòmò anyi?

<sup>159</sup> Mpindyewu, pàndì ànu mbanga cyòci aci, ndi mmòna bikèènà-kumòna bimweneka, amen, bikèènà-kumòna binène byà Mukalenge, byàmba bintu binène. Amen! Mèmè mubangè aci, netwikalè kaaba aka bufukù bujimà. Nenùcitabùùjè anyi? Udi witabuuja anyi? Amen! Ndi nciitabuuja ne mwoyi wànyì wònsò.

<sup>160</sup> Inàbànzà mutekète udi musòmbe pààpa wàwa pàmwè ne Mwanèètù Palmer, mmwenyi kùndì. Ngwa ku Géorgie, ne ùdi ùsaama dĩaamà dyà bânà bakàjì. Bu yèyè mwà kwitabuuja ne Nzambì neàmusàngàjè, Yèyè neàcyènzè. Kacya bandela ncitukù mwanjì kumòna mukàjì awu kacya to, kàdi's ke lutàtù lùdì kùdiye ndwòlò alu.

<sup>161</sup> Mukàjì mutekète awu, ncyèna mumanyè ní ùkaavwakù muumvwe Mukenji kumpalà eku, anyi to, kàdi pàmvwà munkaci mwà kuyiisha kaaba aka apu, mèmè kumumòna. Udi wèwè ànu ucitabuuja cyanàànà ne umòna ní ncyà bushùwà. Amen. Bu wèwè ànu mwà kwitabuuja cyanàànà! Ncyà bushùwà.

<sup>162</sup> Inàbànzà udi musòmbe lwà paanyimà apa ewu ne lutàtù lwà nyimà, ùsaama bibi be, dìnà dyèndè m'Màndàmù Wisdom. Wèwè mwitabùùjè ne mwoyi wèbè wònsò, Yesù Kilistò neàkusàngàjè. Kacya bandela ncitukù mwànji kumòna mukàjì wàwa kacya to, kàdi mmusòmbe mwaba wàwa, ùsaama. Mmuvwàle nkanzu wa kàlaabi. Ncyà bushùwà anyi? Èyo. Katwèna bamanyangàne to? Èyowà. Èyo, mukalenge. Alùkilaaku kwèbè kumbèlu, ùsangalè. Yesù Kilistò ùdi ùkusàngaja. Amen.

<sup>163</sup> Mukàjì mukwàbò wafùmu ku dicibàkula awu, dĩaamà dyà nyimà, mmusòmbe lwà mwab'ewu. Udi ne dĩaamà dyà nyimà. Udi ne mwànà wa balùme, ne ùdi ne dĩaamà dyà mutù. Uh-

huh. Ncyà bushùwà. Mandamu Parker ke dyèndè dìnà. Nudi nwitabuuja ne mwoyi wènu wònsò anyi, nènku Yesù Kilstò neànwondòpe nwènu bònsò bàbìdì. Amen! Nudi beenyi kùndì. Aci's ncyà bushùwà menemene. Amen! Itabuuja ne mwoyi wèbè wònsò.

<sup>164</sup> Muntu mushindàme nyèyè ewu musòmbe lwà paanyimà wa ku Michigan. Ùdi ne lutàtu mu maci endè. Kaa, yèyè udi wela meeji ne mèyi, lutàtu lwà nyumà. Ncyà bushùwà anyi? Udi witabuuja ne—ne... Kwèna mumanye ne n'Nzambì, anyi ne ncinyi cìdì cyàkula neebè aci to. Udi umvwa mitooyi mu maci èbè amu. Mèmè ndi mwenyi ànu wa menemene ewu kùdì. Pìikalàbi ne ncyà bushùwà, elà byanza byèbè muulu, nènku s'ke cìdì munkaci mwà kwenzeka ncyôci aci. Kacyàkukutàcishakù kàbìdì to, Yesù Kilstò ùdi ùkusàngaja.

Udi witabuuja Ngàngàbukà munène anyi?

<sup>165</sup> Ndi mufwànyine kwakula neenù, kàdì, wa ku Norvège, kàdì kwèna umvwa to; ngaakwilù wa cyena Norvège awu. Uh-huh. Èyo, mwambila bwà àye pambèlu, wènda wìtabuuja, mwanèètù wa bakàjì, ní udi mumanyè mwà kucyàkula. Mwambile ne lutàtu lwèndè lwà mutù alu nelùmuumùkè. Mpindyewu, s'udi mumanyè ne mèmè ncyèna mumumanyè to. Mmulwè mwaba ewu ùfùmina ku Norvège, bwà bàmusambìdìlè. Alùkilaaku, ne mubidi tumatuma. Amen.

<sup>166</sup> Kaa! “Yesù Kilstò umweumwe awu makèèlèlè, leelù, too ne kashidi!” Ncinyi aci? N'Dikunji dyà Kapyà adi. N'Nyumà Mwìmpè. N' Cimanyinu aci, cyà ne Yesù Kilstò ùdi ne mwoyi. Nènku pàvwà bantu, kùkaadi ntàntà mule, baMumòne wènza bintu abi, Yèyè wàkajingulula meeji àbò bwalu Yèyè ùdi Dìyi. “Ne Dìyi nditwè kutàmba mwelè wà mvità wà nseke yìbìdì, ne dijinguludi dyà meeji ne mapàngadika à mu mwoyi wàbò.” Amen.

<sup>167</sup> Mèmè kumòna màyi àsàmpuka, ne nsongàalùmè wa citende ewu wènda ùlwa. Ùvwa mùmvwe, ne mubalè mukàndà kuntu kwàka, ne kufundayè, mu cyena Norvège. Wàkafika ku dyumvwa; muntu kampànda kwakulayè nendè. Ùdi ne lutàtu, kàdì, bu yèyè mwà kwitabuuja ne mwoyi wèndè wònsò, Mukalenge Yesù neàmusàngajè. Yèyè mmulwè mu ntàntà mule, ne mwàna mukwate ne byà luse's, ku cyôci aci, ùlwijakaja bwà kubwela. Nènku netùmutentèkèlè byanza, mu katanci kakesè emu.

<sup>168</sup> Udi witabuuja anyi? Amen! Bilenga kaayi's wè! Kaa, ekèlekèle! “Ngàngàbukà munène ùdi pabwìpì mpindyewu.” Mwanèètù wa bakàjì, Mwanèètù wa bakàjì Ungren awu udi penyì, ne mwanèètù wa bakàjì mukwàbò wa ku pyànô awu? Ndi muswè ùlwe lùkàsàlùkàsà, bu wèwè mwà kuswà, ne ùtùpèèshèku musambu wà ne: “Ngàngàbukà munène awu ùdi mpindyewu pabwìpì, Yesù Mumvwidyanganyi wa luse.”

<sup>169</sup> Ndi muswè bwà bantu bàdi mu aka kajila lwà *apa*, bàdi baswè bwà kubàsambidilabò, ne kalolo kwònsò pwekèlaayi *elu* luseke, ànu kajila kàmwè ku musangu. Mwanèètù Neville, enzàku nàнку awu bu wèwè mwà kuswà. Mwanèètù Capps ùdi penyì anyì umwe wa ku balombodi bàà misambu abu? Kàdi bishi bwà Mwanèètù Ungren, anyì Mwanèètù Capps, anyì muntu kampànda, àlwe kaaba aka, neĩmbè musambu, neàlombòlè musambu ewu bwètù twètù bu wèwè mwà kuswà. Mwanèètù ùdi . . . Umwe wa ku bàna bèètù abu ùdi penyì? Èyo. Èyo, mukalenge, abi's mbìmpè. Èyo. Bantu bònsò mu disambila!

<sup>170</sup> Vùlukàayi ne, dishiikila! Nudi numòna cyènzà dishiikila anyì? Dishiikila nedikufikishe too ne dyàmwàmwa dyà mbú. Dishiikila nedikumùshe mu ditùnga dikwàbò. Dishiikila nedikumùshe mwaba kanà wònsò. Taatù mukùlumpè wa mushinga mukolè ne mwanèndè wa bakàji, ne dishiikila, kuteetabò bwà kubwela, kubwelabò, ne bikwàbò byònsò, ne kusòmbabò panshì nànsha nàнку; kùkaadi katanci kakesè Nyumà Mwìmpè ngwákamba cintu aci mu disangisha emu, kumpàla nememene kwà mèmè kubwela muneemu emu. Kaa!

Musambu mutàmbe bwìmpè ùkaadi kacya  
mwimbìibwe,  
Yesù, Yesù mubènèshìibwe.

Ngàngàbukà Munène ùkaadi pabwìpì  
mpindyewu,  
Mumvwidyanganyi wa luse. . .

Mukalenge Yesù, enzàku, tèèlejàku disambila dyà musadidi Webè, Mukalenge. Ndi ndòmba bwà Wèwè kutwilangana ne yònsò wa ku bòbò aba ne kubàsàngaja, bwà Butùmbì Bwèbè, mu Dìna dyà Yesù.

. . . dīyì dyà Yesù.

Cyonà citàmbe bwìmpè mu musambu wà  
bàselàfìmà,  
Dìna ditàmbe bwìmpè pa ludimì lwà bantu bàà  
cifwàkà,  
Kaa, musambu mutàmbe bwìmpè ùtù kacya  
mwimbìibwe.

Aba bàdi bashiikile mpindyewu abu, bàdi bamanyè menemene ne nudi ne cyà kwondopiibwa. . . Ngèèlàngana ànu meeji, ku dyànyì dimanya dyònsò, bantu lukàmà pa lukàmà bàwva, kuumukila ànu ku dyàlumingu dishààle dilòòlò, mbasàngàle lumingu elu.

Mumvwidyanganyi wa luse. . .

<sup>171</sup> Tàngilàayi, Ùdi ùlwa. Nwamònu's, Yèyè ùkaadi mumanè kukwondopa. Ùdi ùtwàla Dìyì Dyèndè, Ùdi ùDìshindika, Ùdi ùleeja Bwikadi Bwèndè. Muntu nànsha umwe kèna mwà kwenza bintu abi to pakuumusha Nzambì. Aci's nudi bamanyè.

Ncimanyinu cyà Maasiyà. Ne nudi bamanyè ne mèmè ncyèna Maasiyà to, pa nàнку n'Yéyè. Mpindyewu's ke Yéyè ewu munùjaadikile bintu byònsò.

Mpindyewu cìwva ne cyà kunùkùpa mu dishiikila. Cìwva ne cyà kwela nzembu mwaba ewu ne kulenga. . . To, ànu bu mùdi ka—ka—ka—kaci kàà alàmeetà ku dikopo dyà kapyà kàà mu cingoma. Cyà bushùwà's! Nènku cìwva ne cyà kutaayisha diitabuuja, nènku—nènku dinanga ne dishiikila bìbweja bantu abu buludi mu Bukalenge bwà Nzambi, bwà kwitabuuja ne mwoyi wàbò wònsò. Nudi nwtitabuuja mpindyewu anyi, yònsò wa kunùdi? Èyo. Mpindyewu, Billy, udi wangata. . .

<sup>172</sup> Tony, ntàngilà kùneeku kakesè. Ncyèna mukumòne to kùkaadi ntàntà mule, kàdi udi usaama. Udi usaama cintu kampànda cyènzè bu munda mashi. Ncyà bushùwà. Nemùkamè. Nemùkuumùkè. Ndi mumòne cintu aci cyènda cìmulonda pàvwàye ùpìcila mwaba awu apu. Kakwèna cintu nànsha cìmwè cidi mwà kusokoma kùdi Nzambi mpindyewu mene to. Kacya ncitukù mwanjì kumòna. . . Ncìtukù mwanjì kumòna Tony kùkaadi ngondo, ngèèla meeji, kàdi ndi mmòna ne ùdi ne cyòci aci. Úwva naaci; kèna naaci mpindyewu to.

<sup>173</sup> Twìnyikàayi mitù yètù. Kakwikadi dísù nànsha dìmwè ditàbàle to. Kakwikadi dísù nànsha dìmwè ditàngila to. Twìkalàayi bònsò mu disambila. Nènku Billy Paul anyi Mwanèètù Neville, umwe, neàbìikilè milongo yìdi yìlonda ayi pààlwà dìbà. Mpindyewu bantu bònsò mu disambila. Netùteetè mpindyewu; bàdi mu kajila kàà munkaci nebàlwilè ku luseke lwèbè lwà dyàbakàjì alu panwàbìikidiibwà, nènku ke mwikalà ka—kajila kàà ku luseke lwà dyàbakàjì *eku* mwà kulwa ku luseke lwènù lwà dyàbakàjì dìbà dinùdi nubìikidiibwa. Mwanèètù Neville neànùbìikilè.

Mpindyewu, ndi ndìkonka ní kùdikù umwe wa ku bânà bètù kaaba aka udi muswè kwimana kaaba aka bwà kutentekelangana byanza pa bantu aba pàdìbo bèndà bàlwa, pàmwè naanyi anyi? Yònsò wa kunùdi nwènù bambi naanyi, ncyà bushùwà ne tudi tunùjingila difika dilenga bwà kulwa kwimana pàmwè naanyi panwikalà baswè kucyènza. Kí ncintu cyà ciditòle to. Nudi ne bukenji bwà kusambidila babèèdi mùshindù ùmwèùmwe naanyi.

Ndi mumanyè ne Nyumà Mwìmpè ùdi kaaba aka. Muntu kanà yònsò udi kàyi mufwànyine kwitabuuja aci to, kùdi cintu cipampàlámùke mu yèyè amu.

<sup>174</sup> Èyo, twìtàbuujàayi mpindyewu ne myoyi yètù yònsò ne, Nzambi neènzè bintu bitùdi tulòmba ebi. Ikàlaayi ne diitabuuja mpindyewu. Kanwèdikù mpatà to.

Ne bantu bònsò sambilaayi, muntu bwà mukwèndè. Bible mmwambè cinyi? “Tùtondelanganàayi bilèmà byètù muntu ne mukwèndè; sambidilanganaayi muntu bwà. . .”

<sup>175</sup> Nènku nwênù bantu bàdì bàlwa mu mulongo abu, pàdì ànu byanza ebi bikulenga, udi upàtuka buludi mwaba ewu mwikàle ànu ne disànka ne wenda utùmbisha Nzambì ne udi mwondòpiibwe.

Èyo, bantu bônso bìikale mu disambila mpindyewu pàdì Mwanèètù Capps ùlombola misambu apu.

Mukalenge Yesù, mpindyewu tükwàcishèku. Ndi ndòmba, mu Dîna dyà Yesù Kilstò, bwà Nyumà Mwîmpè àlengèku muntu ne muntu, ne swàkù bwà bøndopiibwè patùdì tulonda mèyì Èbè matùma apa bwà ditentekela dyà babèèdì byanza. Wèwè wàkamba ne: “Nebàsangalè.” Tudi tucìtabuuja, Taatù, mu Dîna dyà Yesù. Amen.

Èyo, bantu bônso bìikale mu disambila mpindyewu patùdì tubanga kusambila apa. Dyàmbedi, mmwànà mukesè wa balùme ùsaama mu dikalù dyà balèmà.

Tudi tutentekela mwànà ewu byanza, mu Dîna dyà Yesù Kilstò, bwà wàmòna mwà kusàngajiibwa.

Èyowà's, mukalenge.

Mu Dîna dyà Yesù Kilstò... [Mulongo wà babèèdì wùdì wùnènga munda mwà tusunsa dikùmi ne mwandamukùlù, mèyì à Mwanèètù Branham kaèna ùmvwika to—Muf.]...?...

Musambu mutàmba bwîmpè ùkaadiku kacya  
mwimbìibwe,  
Yesù, Yesù mubènèshìibwe.

<sup>176</sup> Mbanganyì bàà kunùdì bàdì bìitabuuja ne Nzambì ùkaadi, bìikàle batwishìibwe mu mwoyi wènù, ne ditwishìibwa ditwìbwe citampì, ne Nzambì mmwandàmùne dilòmbà dyènù bwalu nudi batùmikile Dìyì Dyèndè? Mbudikòse. Nkujikè. Mbu—mbudikòse. Mwitàbùùjaayi ne mwoyi wènù wònsò ne, mmudimu mujikija.

<sup>177</sup> Mpindyewu tàngilààyi lumingu elu, ne panwàlukilà cyàkàbìdì, tàngilààyi nùmonè cìdì cyenzèke.

<sup>178</sup> Ndi ncinka ne, ku musangu wàlondà wùngààlukilà, bu Mukalenge mwà kwanyisha, Nèngìikalè ngènzela mulongo wa babèèdì mu cimwè cyà ku bibambalu ebi, mu kaacibambalu kakesè kàndì ne cyà kubafikisha aku, nudi numòna's. Ndi ngìitabuuja ne cìdì munkacì mwà kuvùnguluka mpindyewu, nudi numòna's, dìbà.

<sup>179</sup> Ndi muswè kulwa mwaba ùndì mwà kutwàla bantu umwe ku musangu, kukwàta naabò mudimu muntu pàà nkààyèndè, too ne pangààcikenketa ne kucijandula, ne pashìishe kutùngunuka mùshindù awu, too ne pàngààshààla ànu naabò pa dìbà adi.

<sup>180</sup> Nzambì ànùbènèshè bônso. Tudi ne disànka dyàbùngì bu munùvwà mwab'ewu. Nudi ne...? Nudi banàànkile mpindyewu anyi? Nudi...? Nudi mu dishìikila, dishìikila dyènù dinùvwà

naadi bwà dyondopiibwa dyènù adi anyi? Byònsò mbijikè mpindyewu, mu dinanga ne diitabuuja ne dyeyemena dyà ne Nzambi neénzè cìdiYe mulayè bwà kwenza aci anyi? Nzambi neénzè.

Ku bânà bakesè abu, kùdi bàbìdì anyi bàsàtù kaaba aka dilòòlò edi, mu màkalù à balèma, ndi . . . Netwìtabuuje bwàbò bôbò, mbânà, bwà ne nebòndopiibwè, pààbò. Nebàsàngalè. Kanwèna nùcitàbùùja anyi? Amen! “Nebàsàngalè.” Bikèngela bènzè nànkù. Nzambi ngudi mwambè nànkù. Nènku tudi bashiikilè, ne netùciitàbùùje mpindyewu, necyènzèkè.

<sup>181</sup> Mpindyewu, masangisha ètù àdi ànu àlamakaja cintu cìmwè paanyimà pàà cikwàbò. Mpindyewu netwìkalè mwà kutangalaja batèèleji bwà aba bàdi ne cyà kuya. Ne bilondèshile cìndi mwà kumòna pàànyi bìmpè, nkushààle tusunsa mwandamukùlù bwà díbà dikumi jaajaaja kukumbànadi. Nènku, byòbì bikèngela bwà wèwè kuya, tudi—tudi ne disànkà múvwà kaaba aka, ne tudi baswè bwà wàlukilè bwà kwikala neetù. Nwènu bàdi bashààle, paanyimà pàà twètù bamanè kwimana kuulu, netùsombè cyàkàbìdì; ne aba bàdi munkaci mwà kuya, ndàayi ànu ne lutùlù lwònsò. Ne pashìshe netwìkalè mwà kwenza disangisha dyà mèèsà à Mukalenge dyàkàmwè paanyimà pàà cyòci aci. Nudi babiikidiibwe bwà kushààla panwìkalà ne mùshindù. Pawìkalà kùyì ne mùshindù to, Nzambi àkubènèshè. Nsambidilèku. Mémè nènkusambidilè. Nènku, vùlukàayi ne, lamàayi Cìmanyinu citèeka, ne kwikala bashiikilè bwà kukolesha lwendu too ne ku Bukalenge bwà Nzambi. Amen!

Mpindyewu netwìkalè mwà kwimba musambu wètù wà ditangalajangana naawù awu, bu twètù mwà kwimba, ne: *Angàtà Dìnà Dyà Yesù Wèndè Naadi*, patùdi biimàne kuulu apa.

. . . Dìnà dyà Yesù wèndè naadi,  
Mwânà wa kanyinganyinga ne dikènga;  
Nedìkupè disànka ne busàmbi . . . (Udi mwà  
kubàtwàla mpindyewu's.)  
. . . Cyòci kwònsò kùyaaya.

Dìnà dyà mushinga mukolè, (Dìnà dyà  
mushinga mukolè!) Éyì dyà bupòle be!  
(Éyì dyà bupòle be!)  
Ditèkemena dyà buloba ne disànka dyà Dyulu;  
Dìnà dyà mushinga mukolè, Éyì dyà bupòle be!  
(Dyà bupòle be!)  
Ditèkemena dyà buloba ne disànka dyà Dyulu.

Labùlàngànaayi ku cyanza muntu ne mukwèndè, nwamba ne: “Mukalenge àkubènèshè, mwanèètù wa balùme mwena lwendu naanyi, mwanèètù wa bakàji.” Byà ndòndò, ne meeji matòòke, ne kaneemu kààbùngì, ne balundà beena Kilistò mu myonji yà bwobùmwè, labùlàngànaayi ku cyanza muntu ne

mukwèndè, mwanèètù wa balùme ne mwanèètù wa bakàji.  
Nzambi ànùbènèshè bônso, cyàpàmwè. Bilenga be!

Ndi muMunangè, ndi muMunangè  
Bwalu Yèyè wàkannanga kumpàlà  
Ne wàkampetela lupàndu  
Ku mucì wà Kàlvariyo.

Too ne patwàsangilà! too ne patwàsangilà!  
Too ne patwàsangilà ku makàsà à Yesù; (Too ne  
patwàsangilà!)

Too ne patwàsangilà! Kaa, too ne  
patwàsangilà!  
Nzambi ikalè neenù too ne patwàsangilà  
cyàkàbìdi.

Too ne patwàsangilà! too ne patwàsangilà!  
Too ne patwàsangilà ku makàsà à Yesù; (Too ne  
patwàsangilà!)

Too ne patwàsangilà! too ne patwàsangilà!  
Nzambi ikalè neenù too ne patwàsangilà  
cyàkàbìdi.

<sup>182</sup> Kalolo aka ne bwobùmwè bwà Cimonyinu cinènè cyà Nzambi, Nyumà Mwimpè, swàkù bwà Yèyè kushàala neenù mu mùshindù mubanjiike too ne patwàsangilà cyàkàbìdi. Ngàsà wa Nzambi endè neenù, ùmushè njila yónso yà lufù kumpàlà kwènù; ùnùlongolwela kajila kèenù, bwà nwènù kumòna Yesù misangu yónso kumpàlà kwènù, ne kanwàkunyungishiibwakù to.

<sup>183</sup> Taatù wa mu Dyulu, nyèwù tulàmbula disangisha edi, ne disangisha dyà mu dindà, masangisha awu ne bikaadi byenjiiibwe, ne butùmbi bwónso kùdì Wèwè, biikàle tuKwela twasàkidila ne butùmbi bwà disungila dyà cisàmbà, ne bwà dyondopiibwa dyà bantu, ne bwà kutupèèsha ngàsà Webè munènè utùdì bônso tukèba ewu. Tùsùngilèku. Mùshindù mwìnè wutùdì tuKwela twasàkidila bwà cyòci eci's wè. Ikàlàku neetù mpindyewu too ne patwàsangilà cyàkàbìdi. Disangishe neetù mu bwobùmwè. Ikàlà pa yèndà yà aba bàdi munkaci mwà kwendesha màshinyi, Mukalenge, bàtàngile ku mààbò. Bàlombolèku mu diikisha dyà njiwù edi, bwà ne bwalu bubì nànsha njiwù kabibenzèkèdì to. Mu Dìna dyà Yesù Kilistò mmutùdì tulòmba nùnkù. Amen.

Èyo, *Angàtà Dìna Dyà Yesù Wèndè Naadi* cyàkàbìdi.

Angàtà . . . Dìna dyà Yesù . . .

Nudi batangàlàjiiibwe mpindyewu, mu Dìna adi.

. . .neenù,

Bu Ngabu ku butèyi bwónso;

Pààkujingilà mateeciibwa . . . (Cyùdì wenza dìbà adi ncinyi?)



Nungana ànu cyanààna Dìna dyà cijila adi mu disambila.

Dìna dyà Mushinga mukolè, (Dìna dyà mushinga mukolè!) Éyi dyà bupòle be!  
(Éyi dyà bupòle be!)

Ditèkemena dyà buloba ne disànkà dyà Dyulu;  
Dìna dyà mushinga mukolè, (Dìna dyà mushinga mukolè!) Éyi dyà bupòle be!  
(Dyà bupòle be!)

Ditèkemena dyà buloba ne disànkà dyà Dyulu.

Twinamina Dìna dyà Yesù,

Tupona mikookwela ku makàsà Èndè,

Mfùmù wa bamfùmù mu Dyulu netùMwàsè  
cifulu cyà butùmbi,

Pààjika lwendu lwètù.

Dìna dyà mushinga mukolè, Éyi dyà bupòle be!  
Ditèkemena dyà buloba ne disànkà dyà Dyulu;  
Dìna dyà mushinga mukolè, Éyi dyà bupòle be!  
(Dyà bupòle be!)

Ditèkemena dyà buloba ne disànkà dyà Dyulu.

<sup>184</sup> Mpindyewu ànu kumpàlà mene kwà nwènù kusòmba panshì, pàdì musùmbà wènda ùshààla mu ditalala mpindyewu bwà mudimu wà mèsà à Mukalenge apa.

Mémè ncìyi mutùpàkàne to, ewu kî m’Mwanèètù Blair, mwambi ùmwà mutwilàngàne nendè mu Arkansas emu ànu àbidì àdì panshì aa anyi? Mvwa ndyambidila ne nyèyè. Ncìvwa mutwìshìibwe to. Uvwa mulwè kuneeku bwà dilàmbula dyà mwànà, mwànà mukesè kampànda, mu dindà emu. Mémè kudyàmbidila. . . Ncìvwakù mutwilàngàne neebè kî nkwanjì kwenza ntàntà mule, ku Hot Springs eku, mu Arkansas anyi? Ne wèwè uvwa ne. . . Cintu kampànda cìvwa pabwìpì ne kwenzeka, kàdi Nyumà Mwìmpè kucitèèlayè. Cìvwa cyà bushùwà anyi? Bìmpè. Mémè anu. . . Mémè kutùma meeji pàànyimà díbà adi, mémè kudyàmbidila ne: “Awu’s mmwanèètù awu.” Ndi ne disànkà dyàbùngì bu mùdi mwab’ewu, Mwanèètù Blair.

<sup>185</sup> Mpindyewu néndombèku bwà Mwanèètù Blair ní ùdikù mwà kusambila bwà Nzambì kutùkezulakù mpindyewu bwà mèèsà à Mukalenge àdì pabwìpì ne kwenzeka awu. Udiku mwà kusambila anyi, Mwanèètù Blair? [Mwanèètù Richard Blair ùdi ùsambila—Muf.] Éyowà’s. Éyowà’s, Mukalenge. Enzàku nàнку, Mukalenge. Éyowà’s, Mukalenge. Éyowà’s, Mukalenge. Éyowà’s, Mukalenge. Éyowà. Éyowà. Amen.

Nudi mwà kusòmbaayi mpindyewu, muntu ne muntu.

<sup>186</sup> Nènku mpindyewu pa cisanji cyà orgue, mwanèètù wa bakàjì, bu nwènù bònsò mwà kwimbaku *Kùdi Mpokolo Mùle Tèntè Ne Mashì*. Ne nudi mwà kutwàdija wenù. . . kuya naabò kuntwaku, cyònsò cidì cìkèngediibwà aci. Éyo, kubala

mpindyewu, bu twètù ànu mwà . . . kushàalakù bapùwe ànu bwà katanci kakesè cyanààna.

Èyowà's, mwanèètù wa bakàji? [Mwanèètù wa bakàji kampànda ùdi wàmba ne: “Ndi mwà kwangata mùshwàlà wanyi anyi?”—Muf.] Èyo, mwanèètù wa bakàji, udi ànu utàngidila lwà apa too ne paùdi uwùpeta, aci's neciikalè cìmpè dîbà adi, cyònsò cidìku aci. Ng'awu anyi? Èyo, mwanèètù wa bakàji.

<sup>187</sup> Èyo, mpindyewu Mwanèètù Neville neàbalè dilondangana dyà mèèsà à Mukalenge.

Ne pashìshe baawisiyé nebàlwe, kwòkù kwikalè beenyi kaaba aka, ku nkwasa ne nkwasa, ne kubweja ku kajila ku kajila, patùdi twenda tulwa apa, ne ku mulongo ku mulongo, bwà mèèsà à Mukalenge.

<sup>188</sup> Nènkù mpindyewu swâyì nwèlanganè meeji mpindyewu. Vùlukàayi ne, Izalèlèlà wàkaàdya mu dishiikila, ne mu lwendu amu kakùvwa muntu nànsha umwe ne butekètè munkaci mwàbò to, ku ndekeelu kwà bidimu makùmi ànaayi. Eci cidi dyondopa dyà kùdi Nzambi, kàbidi.

Mukalenge àkubènèshè, Mwanèètù Neville. [Mwanèètù Neville ùdi ùbala Kolintò wa Kumpàla 11.23-32—Muf.]

*[Bwalu ndi mupetè kùdi Mukalenge cìndi pàànyi munùtwàdìle, Cyà ne Mukalenge Yesù mu bufùkù bùmwebùmwe bwàkamutungilabo abu wàkangata dyàmpà:]*

*[Nènkù pààkamanàye kusàkidila, wàkadìcibula, wàmba ne: Angàtaayi, dyàyi: eci mmubidi wànyi, wùdi mucibùdìibwe bwà bwalu bwènù: nwìkalàayi nwenza nùnkù bwà kumvùluka.]*

*[Paanyimà byà mwomùmwe kàbidi yèyè wàkangata lupànza, pààkamanàye kudyà didyà dyà dilòdò, kwamba ne: Lupànza elu ncipungidi cipyacipyà mu mashi àanyi: nwìkalàayi nwenza nùnkù, misangu yònsò yinwàlunwà, bwà kumvùluka.]*

*[Bwalu misangu yònsò yinwàdyà dyàmpà edi, ne yinwànwà lupànza elu, kàyì nuleeja lufù lwà Mukalenge too ne pààlwàye.]*

*[Ki bwà cinyi ewu yònsò wadyà dyàmpà edi, ne wànwà lupànza lwà Mukalenge elu, kàyì mulùkumbànyine to, neikale mupùle ku mubidi ne mashi byà Mukalenge.]*

*[Kàdi muntu àdìkenkètè yèyè mwinè, ne nànkù àdye dyàmpà adi, ne ànwe lupànza alu.]*

*[Bwalu ewu udi udyà ne unwà kàyì mukùmbànyine to, ùdi ùdya ne ùnwa dipùla dyèndè yèyè mwinè, kàyì ùjìngulula mubidi wà Mukalenge to.]*

[*Bwà bwalu ebu bààbùngì mbatekete ne biikale basaama munkaci mwènu, ne bààbùngì mbalààle tulù.*]

[*Bwalu bu twètù mwà kudilumbulwisha twètù biinë, kabirwa bikèngela bwà twètù kulumbulwishiibwa to.*]

[*Kàdi patùdi tulumbulwishiibwa, tudi tunyookiibwa kùdi Mukalenge, bwà katùlu kupùshiibwa pàmwè ne bàà pa buloba to.*]

[Mukalenge àbeneshè kubala, kwà Dìyì.]

<sup>189</sup> Ndi mukwàte dyàmpà dyà kosher, dyelè minyèngù ne dicibula, dileeja mubidi wà Yesù Kilstò; kupìcila—kupìcila ku cilàmbà cikùdika eci tudi ne mpùngà wa kubwela mu Mwaba mutàmbe cijila.

<sup>190</sup> Taatù wetù wa mu Dyulu, dyàmpà edi ndilongolola bwà kuleeja mubidi mucibùdiibwe ne musùnsùdiibwe. Swàkukù bwà yònsò wa kutùdi, patùdi tudyàkidila apa, swàkù bwà biikalè bu ne tudi bènzè cyenzedi cilelèlè eci. Nènku swàkù bwà tùpetè difwìdiibwa dyà luse ku mpèkaatù yètù, ne mpùngà wa kufika ku Mwaba mutàmbe cijila, bwà kwikala ne mwoyi mu Bwikadi Bwèbè mu nsòmbelu wetù wa matùkù àcilwalwà; ne matùkù ônsò atwikalà ne mwoyi pa buloba apa, ne kwikala Neebè mu Cyendèlèlè bwà kashidi. Enzàku nàнку, Taatù. Bèneshàku dyàmpà edi bwà kiipàcilà kàvwà kadyènzela aku. Mu Dìnà dyà Yesù. Amen.

<sup>191</sup> Bible mmwambè ne: “Paanyimà pàà Yéyè mumanè kwangata ne mucibùle dyàmpà, mu mùshindù ùmwèumwè awu Yéyè wàkangata lupànza; ne pààkamanàYe kudyà didyà dyà dilòlò adi, kwamba ne: ‘Eci ndupànza lwà Dipungila Dipyadìpyà mu Mashi Àanyi, àdi meediibwe panshì bwènu nwènu.’” Mukalenge àswèkù àfilè mabènesha Èndè pa cyòci eci patùdi tusambila apa.

<sup>192</sup> Mukalenge Yesù, mmèmè ewu mukwàte mashi à mvinyò aa, màyi à tumuma twà mvinyò. Nènku, Taatù, cidi mbwà kuleeja Mashi à musinga mukolè àdi àtùkezulà awu, bwà ne Kwòkò aku ke kwàfùmina Cimanyinu. Ndi nKwela twasàkidila bwà Cyòci aci, Taatù, ne bwà cimfwànyì eci. Wèwè wàkamba ne: “Èwu udi udyà ne ùnwà Eci ùdi ne Mwoyi wà kashidi, ne Mèmè nèmnujuulè ku cikondo cyà ndekeelu.” Tudi tuKwela twasàkidila bwà mulayì ewu. Nènku, Taatù, tudi tulomba bwà Wèwè kukezula myoyi yètù, pàmwè, bwà twamòna mwà kwikala bakùmbànyine ku . . .diitabuuja dyètù; bamanyè ne mu twètù nkààyetù katwèna bakùmbànyine to, kàdi diitabuuja dyètù kadyàkupangilakù to, bwà ne tudi twitaba Mashi à Yesù Kilstò ànu mu wòwò menemene. Enzàku nàнку, Taatù.

<sup>193</sup> Nènku jidilaaku mvinyò bwà kiipàcilà kamwenzela aku. Swàkù bwà ewu yònsò udi unwà mvinyò ewu dilòlò edi, ne wàngata dyàmpà edi awu, àpetè dikàndà bwà lwendu lùdi lutèeka kumpàlà elu. Enzàku nàнку, Mukalenge. Swàkù bwà

bìikalè ne mubidi tumatuma ne dikàndà, ne bùjìbwe tètè ne Nyumà Webè, too ne pààlwà Yesù. Amen.

<sup>194</sup> [Katùpà kàà mukàbà wà mèyì munda mutupù—Muf.] Ndi ngùtabuuja ne Kòomunyò ndimwè dyà ku dikuukwila didi ditàmbe kwikala dyà kadiyì tuseku, dinsantu, dyà ditàmbe kwikala dyà kalolo didiku mu mudimu wà èkèleeziyà. Kùvwa bintu bìbidì bitùshìla, bintu bisàtù, bwà kwenza, bìdì—bìdì mèyì matùma ne mikenji. Pa nàнку bantu bààbùngì bàtu bàteeta kwamba ne: “Tudi ne musonso wà ku cibangidilu.” “Tudi ne kapese kàà nkùrusè.” Kàdi kùvwa bintu bisàtù bishiya: Mèèsà à Mukalenge, Dibàtiiza, Dyoweshangana dyà màyi ku makàsà, ke mèyì matùma àsàtù àvwà mashiila èkèleeziyà.

<sup>195</sup> Kàdi bwànyì mèmè, dilòlò edi divwa dimwèka bu ne ncikondo cyà pabwàcì menemene bwànyì mèmè. Pàmvwà mwimàne mwab'ewu ne kacya ngààtàngila; pa ciibidilu ntu—ntu misangu yònsò ànu kacya muditwe mu disambila. Kàdi dilòlò edi, pàndi ntàngila mèkù mashiilèshiiàngàne, pa kumòna àmwè à ku wòwò mèkù awu àlwa mwaba ewu kacya ngikala muyiishi wa citende, biimana mwaba ewu ne musenga wà mabaya panshi, ne mèmè. . . bàmwè bàà ku bòbò mbapyabàpyà. Kàdi mwikàle mbandila balùme bàlwa ne bakàjì bààbò batekète ne díkù, ne kumòna mùdìbo bàjingangana muntu ne mukwèndè, ne bunsantu bwà cyòci aci, mùdìbo bàtàngila bàna bààbò balela; kumòna inàbànza mutekète ewu ne byanza byèndè byolola, kàdi ndyàmbidila ne: “Cyanza cikesè cyàcya's ncisukùle, ne cikùpùle mwànà binsònji ku mèsù.”

<sup>196</sup> Pashiishe mmòna mèkù àlwa meena mu nzùbu mùmvwà díbà divwàbo bàsaama, ne mubidi kapyà, bàna; Mukalenga Yesù e kusàngaja bàna bààbò abu. Mvwa mubàmòne pàvwàbo ne lutàtù lwà mu díkù, Mukalenge kàdi kunkwàcisha bwà mèmè kulùtuuyisha; kubàmòna cyàkàbidì ne disànka. Nènku ndi ànu ngèèla meeji ne nebiikalè bishi patwàyà ku Didyà dinène dyà Dibanji adi. Ndi ne kusàkidila kwàbùngì mùdì Mukalenge mwènze bwà mèmè kwikala mulundà wenù ne kunwàmbulwisha. Ndi. . . s'ke cìndi muvwilè kaaba aka ncyòci aci.

<sup>197</sup> Nènku ndi, ànu munkaci mwà kudikonka ne ntàntà bule kaayi, bidimu bùngì kaayi; bìdì bwalu ebu, ngàkatwàdija kuyiisha, bu mu cidimu cyà 1930, nènku kwènjì bidimu bitwè bu ku makumi àsàtù ne bìdidì bwànyì mèmè, mpindyewu, bidimu makumi àsàtù ne bisàtù, bìndì munkaci mwà kuyiisha. Pashiishe, dilwangana dyònsò ne mateeciibwa ne, mùdìbi bimwèka, nànsha nàнку, díbà—díbà ditwàbàndà kùnweku, byònsò mbi—mbipwibwe mwoyi. Nwamònu anyi? Nudi—nudi numwèka bu ne kùdi cintu kampànda pa bìdì bitàngila Mèèsà à Mukalenge cidì ànu cipàtula dikònyangala dyònsò—dyònsò mu bintu, kwangata Mèèsà à Mukalenge. Mukalenge ànùbènèshè.

198 Mukùlù mpindyewu ùdi ùya, ùbala Mufùndu bwà mudimu wà dyoweshangana dyà mâyi ku makàsà.

199 [Mwanèètù Neville ùdi ùbala Yone 13.2-17, ne ùjikija mudimu—Muf.]

[Nèku didyà dyà dilòlò dimanè kujika, dyabùlù mumanè kutèeka mpindyewu mu mwoyi wà Yudaàsà Mpongoloki, mwànà wa Simonà, bwà kumutungila;]

[Yesù mumanyè ne Taatù ùwà mufile bintu byònsò mu byanza byèndè, ne yéyè ùwà mufùmìne kùdì Nzambi, ne muyè ku Nzambi;]

[Kujuukayè ku mèsà, ne kutèeka bivwàlù byèndè ku luseke; e kwangatayè ditwàyà, e kudijingiladi.]

[Paanyimà pàà cyòci aci e kwelayè mâyi mu dilòngò, ne kwàdija kwowesha bayiidi mâyi ku makàsà, ne kubàkùpula ne ditwàyà òwàye mudijingile adi.]

[Pashùshe kulwayè kùdì Simonà Peetèlò: ne Peetèlò kumwambila ne: Mukalenge, udi ungowesha mèmè mâyi ku makàsà anyi?]

[Yesù wàkandamuna ne kumwambila ne: Cìndì ngèza eci kwènà mucìmanyè mpindyewu to; kàdì neucìmanyè pashùshe.]

[Peetèlò kumwabilayè ne: Wèwè kwènà mwà kungwowesha mèmè mâyi ku makàsà nànsha. Yesù kumwandamuna ne: Mèmè nciyi mukwoweshe mâyi to, kwènà naanyi mu bwobùmwe to.]

[Simonà Peetèlò wàkamwambila ne: Mukalenge, kì ng'anu ku makàsà àanyi nkaayakù to, kàdì ne byanza byànyi ne mutù wànyi.]

[Yesù kumwambila ne: Ewu udi mwowèshùbwe ùdi dijinga ànu ne kwoweshùbwa ànu ku makàsà, kàdì mmukezùke mubidi wònsò: ne nwènù nudi bakezùke, kàdì kì mbònsò to.]

[Bwalu yéyè ùwà mumanyè ewu uwà ne cyà kumutungila; kì bwà cinyi wàkamba ne: Nwènù kanwèna bònsò bakezùke to.]

[Nàku paanyimà pàà yéyè mumanè kubwòwesha mâyi ku makàsà, ne mumanè kwangata bivwàlù byèndè, ne mumanè kusòmba cyàkàbìdì panshi, yéyè kubàmbila ne: Nudi bamanyè cingaanwenzèdì eci anyi?]

[Nudi numbùkila Mulongeshi ne Mukalenge: ne nudi nwamba bimpè; bwalu ke cìNdì.]

[Pìkalàbi dība adi ne Mèmè, Mukalenge wenù ne Mulongeshi, munwoweshè mâyi ku makàsà; nwènù pèènù nudi ne cyà kwoweshangana muntu ne mukwèndè mâyi ku makàsà.]

[*Bwalu ndi munùpèèshe cileejilu, bwà nwènu kwenza mungaanwenzèdì emu.*]

[*Bulelèlà, bulelèlà, Ndi nzwàmbila ne: Musadidì kì mmutàmbe mukalenge wendè to; anyì ewu udi mutùmùbwe mutàmbe yéyè udi mumutùme awu to.*]


[*Nwènu bamanyè bintu ebi, nudi ne disànka bu nwènu mwà kubyènza.*]

[Mukalenge àbeneshèku kubala kwà Dîyì Dyèndè.]

[Bu mwikalà bààbùngì mwà kwabanyangana, bantu balùme nebwòweshanganè mâyi ku makàsà mu eci cibambalu, lwà eku nùнку; ne bainàbànzà nebwòweshanganè mâyi ku makàsà mu cibambalu cyà ku dyàbakàjì eku, lwà apa nùнку, mu kaacibambalu kakesè kàà dibàtìijilanganyinamù aku. Ndi ne disànka dyàmba kundya bwà kumòna bààbùngì baswè bwà, ne bakùmbàne mwà, bwà kulwa kubwela neetù mu dyoweshangana dyà mâyi ku makàsà edi.]

[Tudi mwà kwimanyinakù pàmwè anyì? Bwà aba bàdì ne cyà kuya.]

[Kàbidì tudi twamba ne tudi ne kusàkidila bulelèlà ne twanyisha kumpàlà kwà Nzambi bwà ditùkù dîmpè edi, aci cìvwa dikànkamika dinène bwà mwoyi wètù, mu dimòna Bwikadi bunène ne bwà bukolè bwà Nzambi wetù bùlwa munkaci mwètù bwà kwikala kaaba aka bwà kutùkànkamika ne kutùbènesha.]

[Patùdì twinyika mitù yètù pàmwè apa, netùlombè Mwanèètù Earl Martin ní ùdikù mwà kutangalaja aba bàdì ne cyà kuya.] 

63-0901E Dishikila  
Branham Tabernacle  
Jeffersonville, Indiana États-Unis

CILUBA

©2024 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Dîyì dya bwena-cintu

Makenji ònsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiyi bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyì wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)